

**LESONA AOGA SAPATI**

**Vasega Au-mātutua**



**‘OA O LE UPU MONI (I)**

***Filifili ma lo  
Tatou Foafoa***

Vol. 99, No. 1

lanuari—Mati, 2023

## *Upu Tomua*

E moni lava o se foafoaga matua mata'ina na fausia ma fa'atū e Lē e ona le malosi uma lava i le lalolagi, mo le silia i le 6,000 tausaga. Ma o le paleali'i o Lana foafoaga maoa'e o le tagata na faia i Lona lava fa'atusa! O le tupulaga lenei o tagata na foafoaina ia nofoia ai lenei paneta ma fa'ao'o atu iai i luga lana pule. Ona o le atamai ma le mana o le mafaufau ua tu'uina mai i luga o tagata, i lenei ituaiga—o tagata o le lalolagi—ua tu'uina atu iai lenei avanoa—ae sili atu nai lo o lenā, ua na o le pau lea o le vaega e tasi i le lalolagi ua ofoina atu i ai le avanoa e ola ai e fa'avavau i le afioaga fiafia o le Foafoa mamalu e o'o i le fa'avavau.

E pei lava o so'o se avanoa ma tiutetauave, e o mai fa'atasi ma tu'utu'uga. O le Foafoa amiotonu ma le alofa mutimutivale o le univesa, na Ia fa'ata'atia manino mai nei tu'utu'uga i o tatou luma ma vala'aulia i tatou ia filifili ma Ia ina ia mafai ona tatou malamalama i āiaiga o Lana feagaiga.

O le mea lea, mo le isi tolu masina, o le a su'esu'e ai e tamaiti aoga o le aoga Fa'a-Sapati i le lalolagi atoa le autu tāua, “Filifili ma Lo Tatou Foafoa.” O le vaega muamua lenei o se fa'asologa o le tausaga atoa ua fa'aautūina ““Oa o le Upumoni,” ua tu'uina mai ai se malamalama'aga tāua i ma'a matagofie o le upumoni o loo i ai se aogā tele e fa'aa'uupegaina ai mo le fa'avavau. O i latou uma o le a fa'asaoina, e tataua ona iai le fa'atuatua loloto ma le fa'amaoni i le Atua, ma o se molimau a se Kerisiano manumalo, o le a tumau e o'o lava i puapuagā faigatā o le toe itula i le talafa'asolopito o le lalolagi.

“O se tapuaiga e fa'atatau i foafoaga atamamai ma le malamalama o le a maua mai ai ni fa'amaoniga talafeagai o lona moni, auā o le a i ai ni taunu'uga iloga i le loto ma amioga. O le a fa'aalia le alofa tunoa o Keriso i a latou amio i aso taitasi. E mafai ona tatou fesili tu'usa'o ia i latou o e ta'utino mai ua fa'apaiaina, Pe o i ai fua o le Agaga i lou olaga? Pe o e fa'aalia ea le agamalu ma le maualalo o Keriso, ma fa'aali atu le mea moni o oe o se tagata e a'oa'o i aso uma i le aoga a Keriso, fa'atulagaina lou olaga i le ata o Lona soifua'aga lē manatu fa'apito?

“O le fa'amaoniga sili e mafai e so'o se tasi o i tatou ona maua i lo tatou so'otaga ma le Atua o le lagi o le tatou tausaiaina lea o Ana poloāiga. O le fa'amaoniga sili o le fa'atuatua iā Keriso o le fa'alagolago ma fa'atuatua lea i le Atua ae e lē o le fa'alagolago lea o le tagata iā te ia lava. Na pau lava lea o le fa'amaoniga o lo tatou fa'atuatua o le tumau iā Keriso o le a ātagia mai ai Lona fa'atusa. E o'o mai lava i le taimi nei a o tatou faia lenei mea, tatou te tu'uina atu le fa'amaoniga ua fa'apaiaina i tatou e ala i le upumoni, auā o loo fa'aalia le upumoni i o tatou olaga i aso ta'itasi.”—*Ye Shall Receive Power*, p. 121.

“E toatele i latou, e ui o lo'o taumafai e usita'i i poloāiga a le Atua, ae e itiiti le filemu po o le olioli latou te maua. O le leai o sa latou molimau o le taunu'uga lea o le lē fa'atinoina o le fa'atuatua. Latou te savavali e pei o se laueleele masima, o se Vaomatua mātutu. E itiiti se mea latou te maua, pe a afai latou manatu e tele ni a latou mea; auā e leai se tapula'a i folafolaga a le Atua.”—*The Acts of the Apostles*, p. 563.

O la matou tatalo ina ia fa'atamāoa'igaina i tatou uma i lesona fa'ale-Tusi Paia o le Aoga Sapati i lenei kuata, ma ia matuā fa'amalosiā lo tatou fa'atuatua e ala i feso'ota'iga ma Lē Silisili Ese!

*O le Matāgaluega a le A'oga Sapati a le Koneferenisi Aoao*

## Taulaga Fa'apitoa o le Sapati mo se Nofoga o A'oa'oga ma le Soifua Maloloina i Adygea, North Caucasus, Rusia

O le teritori o Rusia e 17,125,191 (6,612,073 sikuea kilomita) ma le faitau aofa'i e tusa ma le 146,780,000 tagata, lea e 111 miliona o tagata Rusia. Fa'atasi ai ma le 35 miliona o loo totoe o sui ia o le silia ma le 180 atunu'u. O le lotu autu o le Orthodox (42%), o le isi o Isalama (30%). O isi lotu e aofia ai le Katoliko (3%), Old Believers (o se lala o Kerisiano Orthodox i Sasa'e) ma Porotesano (2%), Buddhism, Iutaia ma Eleni Katoliko (1%).



Talu mai le 1925, na folafola atu ai i'inei le fe'au o le Toe Fuata'iga i tulaga faigatā. E to'atele uso na fa'afalepuipuiina ona o le Afioga a le Atua. O nisi na fa'atulagaina o latou ola mo le upu moni. I le 1990 na maua ai e le matou ekalesia le avanoa e tala'i sa'oloto ai ma sa latou fa'aaogāina lenei avanoa. Ia Iuni 2018, na fa'atulagaina ai le Iuni a Rusia. I nai tausaga ua tuana'i, ua matuā utiuti lava o matou avanoa e tala'i atu ai, o lea na matou sa'ilia ai se fasi fanua i le natura e fai ai sauniga i tōlauapiga ma le galuega tala'i o le soifua mālōlōina. Ua fa'atagaina i matou e le Alii e fa'atau e tusa ma le 5 hectares i se tasi o itū o le mauga o Caucasus fa'atasi ai ma va'aiga i laufanua matagofie o mauga. Ona o le faigata tele ona maua o se vai i vaega maugā, o le tau o le fanua sa fai si maualalo. Ae na tausia e le Alii lenei mea ma fesoasoani ia i matou e maua se vaipuna i luga o le fanua e le gata mo le inu, ae mo se vaituloto foi. Matou te fa'afetai atu ia te Ia mo lenei fa'amanuiaga silisili o Lana Pulega! I le tau māfanafana o le 2019, na faia ai le matou tōlauapiga muamua i lenei laueleele, e ui lava sa mafai na matou fausiaina fale o le tau māfanafana mo sauniga, se faleaiga, ma se tama'i fale, e lua potu. Sa vala'aulia se foma'i e faia se semina mo le soifua maloloina iinā. E tusa ai ma le malamalama mai le Agaga o Valoaga ma le amana'ia o o tatou tulaga, na matou vaa'ia ai le āga'iga'i tele i luma o le galuega fa'amisionare fa'afoma'i pe afai o le a fausia se nofoaga talafeagai mo lenei fa'amoemoega.

Matou te talitonu e ala i le alofa mutimutivale o le Atua ma fa'atasi ai ma le fesoasoani a le au uso mai le lalolagi atoa, o le a fesoasoani mai ai le Alii ia i matou i le fa'ataunu'uina o lenei galuega e lē mafai e o tatou uso i le lotoifale ona totogi na o i latou. Ia fa'amanuia le Alii ia i latou uma e fia lagolagoina lenei galuega i tatalo ma le fa'atupeina.

*O ou uso ma tuafāfine mai le Iuni a Rusia*

## Afioga a le Atua mo Tagata i Aso Nei

**MAU AUTŪ:** “O lo’o fa’apea ona fetalai mai o Ieova, Ia malaia le tagata e fa’atuatua i tagata, ma ua fai tagata mona lima a ua liliu ese lona loto i le Alii” (Jeremia 17:5).

“I le alofa mutimutivale ma le fa’amaoni e masani ona fa’atagaina ai e le Atua i latou ua tatou tu’u atu i ai le fa’atuatuga e to’ilalo ai i tatou, ina ia mafai ai ona tatou a’oa’oina le valea o le fa’alagolago i le tagata ma avea le tino ma o tatou lima.”—*The Ministry of Healing*, p. 486.

**Faitauga Fautuaina:** *Counsels to Parents, Teachers and Students*, pp. 460–463; *Fundamentals of Christian Education*, pp. 129–137.

*Ulua’i Aso*

*Ianuari 1*

### 1. NA FA’APEFEA ONA TU’UINA MAI LE TUSI PAIA?

- a. O le ā le auala na tu’uina mai ai le Tusi Paia? (Tu’u mai fa’amatalaga patino.) 2 Timoteo 3:16; 2 Peteru 1:21; Numera 12:6.

---

“E le o upu o le Tusi Paia na musuia, ae o tagata na tusia sa musuia. O musumusuga e lē galue i upu a le tagata po o ana fa’amatalaga ae e galue i luga o le tagata lava ia, o lē, o lo’o i lalo o le ūna’iga a le Agaga Paia, e fa’atumulia i mafauauga. Ae o upu ma mafauauga e maua ai le fiafia o le mafaufau o le tagata. Ua fa’aioa mai le finagalo o le Atua. O le mafaufau ma le finagalo paia ua tu’ufa’atasia ma le mafaufau ma le loto o le tagata; ua fa’apea ona avea upu a le tagata ma afioga a le Atua.”—*Selected Messages*, bk. 1, p. 21.

- e. Pe a sa’ilia le ta’ita’iga mai le Atua, o le a se mea e tatau ona tatou iloa e uiga i miti ma fa’aaliga? Teuteronomie 13:1–5; Jeremia 29:8.

- i. O a nisi mafua’aga mo miti? Failaūga 5:3, 7.

- o. E fa’apefea ona tatou tofotofoina perofeta? 1 Korinito 14:32; Isaia 8:19, 20

## 2. PE E LĒ MASU'ESU'EINA EA TUSITUSIGA PAIA?

- a. O le ā le tele e mafai ona tatou fa'atuatua ai le mamā o le Afioga a le Atua? Salamo 12:6, 7.

---

“Ua iā i tatou se Tusi Paia ua tumu i upumoni e sili ona tāua. O lo'o i ai le alefa ma le omeka o le malamalama.”—*Gospel Workers*, p. 309.

“I le Tusi Paia ua tatou maua ai fautu'aga sasa'o mai i le Atua. O Ana a'oa'oga e fa'atinoina lava, o le a fetau lelei ma tagata mo so'o se tofiga o tiute. O le si'ufofoga o le Atua e fetalai mai i aso uma i le agaga. E tatau ona su'esu'e le autalavou ma le fa'aeteete i le afioga a le Atua ma teuina le tāua o a'oa'oga i le loto, ina ia faia Ana poloāiga e pulea ai amioga uma.”—*Testimonies for the Church*, vol. 4. p. 441.

“I Ana Afioga, ua tu'uina mai ai e le Atua i tagata le malamalama e tatau ai mo le fa'aolataga. O Tusitusiga Paia e tatau ona taliaina ma avea o se fa'aaliga e lē fa'asesēina mo Lona finagalo. E fa'aalia mai a'oa'oga fa'avae le tulaga tau i le amio ma le tofotofoina o le poto masani.”—*The Faith I Live By*, p. 13.

“[O le autalavou] e mana'omia se faufautua e tonu ma moni, ma se ta'iala e lē fa'asesēina. O le a latou maua leni mea i le Afioga a le Atua. Se'ivagana ua avea i latou o ni tamaiti a'oga e maēlegā mo le Upu, o le a latou faia ni mea sesē mātuiā, lea o le a fa'aleagaina ai lo latou fiafia fa'apea foi ma isi, mo le taimi nei ma le olaga a sau.”—*Messages to Young People*, p. 443.

- e. O le ā le umi e tumau ai mataupu fa'avae o lo'o i le Tusi Paia? Mataio 24:35; Salamo 119:160; Isaia 40:8.

---

“Na a'oa'o mai [Keriso] o le afioga a le Atua e tatau ona malamalama i ai tagata uma. Na ia fa'asino atu i le Tusi Paia o se pule e lē māfesiligia, ma e tatau foi ona tatou faia fa'apea. O le Tusi Paia e tatau ona tu'uina atu o le afioga a le Atua e lē i'u, ma o le i'uga lea o finauga uma ma le fa'avae o le fa'atuatua uma.”—*Christ's Object Lessons*, pp. 39, 40.

“O le Tusi Paia, ua taliaina atoatoa ma su'esu'eina o le si'ufofoga a le Atua, ua ta'u mai ai i le aiga tagata le auala e o'o atu ai i le aiga e maua ai le fiafia e fa'avavau, ma fa'amautūina ai 'oa o le lagi.”—*Fundamentals of Christians Education*, p. 444.

“E lē tatau ea ona fa'apea le a'oa'oga e tu'uina atu iā tatou aoga lea o le a maua ai se malamalama sili atu i le afioga a le Atua, ma o le a aumaia ea le agaga i se so'otaga tāua ma le Atua, ia fa'amamua le Atua i luma o tatou mafaufau, ma fa'aosofia ai lagona lelei uma o le agaga? O ituaiga a'oa'oga lea e tumau e o'o lava i le fa'avavau.”—*General Conference Daily Bulletin*, March 6, 1899.

### 3. MAUAINA O TUSITUSIGA O MUSUMUSUGA FA'ALELAGI

- a. **O le a se mea e tatau ona tatou iloa pe a fetalai mai le Atua e ala mai i Ana perofeta? Ieremia 1:4–9; 1 Tesalonia 2:13.**

“Na a’oa’o atu e Keriso Ona so’o e tatau ona tatala o latou mafaufau i fa’atonuga, ma ia saunia e talitonu. Sa ia fofogaina se fa’amanuiaga i o latou luga auā na latou va’aia e mata ma fa’alogo i taliga e talitonu ai. . . .

“E na o lē e na te taliaina le Tusi Paia o le si’ufofoga o le Atua o lo’o fetalai mai iā te ia lava o se tagata a’oa’o moni. E gatete o ia i le upu; ua ia te ia o le ola moni.”—*Christ’s Objects Lessons, p. 59.*

“O le Tusi Paia e fa’asino atu i le Atua o se tusitala; e ui ina sa tusia e lima o tagata; ma i le matalasi o ona tusi ese’ese o lo’o tu’uina mai ai uiga o nisi o tusitala. O upumoni ua fa’alia mai ma ‘tu’uina mai ina ua musuia e le Agaga o le Atua’ (2 Timoteo 3:16); ae ua fa’aalia i upu a tagata. O Lē mai Anamuā e ala i Lona Agaga paia ua fa’asusulu mai ai le malamalama i mafaufau ma loto o Ana auauna. Ua Ia tu’uina mai i miti ma fa’aaliga, o fa’atusa ma numera; ma o i latou na fa’aalia i ai le upu moni, ua i ai iā i latou lava le manatu i le gagana a tagata.”—*Selected Messages, bk. 1, p. 25.*

- e. **O le a le mea e masani ona fa’aalia mai e le Atua e ala mai i Ana perofeta ina ia mafai ona fesoasoani iā i tatou ia malamalama i le silafiaina e le Atua o mea uma atoa ai ma le natura e fa’avavau? Aмоса 3:7; Isaia 46:9, 10.**

“Ua molimauina e talafa’asolopito ma valoaga ua fa’aalia e le Atua mea lilo i le lalolagi atoa e ala mai i ē o lo’o tauaveina Lona malamalama i le lalolagi. O se lalolagi lē mautonu, e talanoa ma tusitusi uiga o a’oa’oga maualuluga, o lo o talanoa i mea e lē malamalama i ai. E le o iloa ai o a’oa’oga moni ma maualuluga e fa’amalamalamaina atu e le malamalama sili ona atoatoa o le Atua ma Iesu Keriso, ua Ia auina mai. E to’aitiiti i latou e malamalama o le fa’asaienisi moni uma a tagata e mai i le Atua ia o le fa’asaienisi sili, ma ua fa’aailoa mai e le Atua i le lalolagi o Ia o le Tupu i mea uma lava.”—*Bible Training School, December 1, 1912.*

“I tala fa’asolopito o tagata, o le tuputupu a’e o atunu’u, o le si’itia ma le pa’u o malō, e foliga mai e fa’alagolago i le loto ma le malosi o le tagata; o le fa’avasegaina o mea e tutupu e foliga mai, i se tulaga maoa’e, e fuafuaina i lona malosi, fia sili, po o le lē mautonu. Ae i le afioga a le Atua ua toso ese ai le pupuni, ma tatou va’aia ai, i luga, i tua, ma e ala i tala ma fa’atinoga uma ma le fa’afeagai o le fiafia ma le malosi o le tagata ma tu’inauga, o fa’alapotopotoga a le Silisiliese, o lo’o galulue fifilemu, ma le onosa’i fautu’aga o Lona lava finagalo.”—*Prophets and Kings, pp. 499, 500.*

#### 4. O LE Ā LE MEA E MANA'OMIA I LA TATOU VAEGA?

- a. O le ā le ituaiga o uiga e tatau ona iā i tatou pe a su'esu'eina le Tusi Paia? Isaia 66:1, 2; Ioane 7:17; Galuega 17:10, 11.

---



---

“Pe a tu'uina atu e le agaga o ia lava iā Keriso, o le a maua e le loto fou se avanoa ma se malosi fou. Ua faia se suiga e lē mafai lava e le tagata ona faia mo ia lava. O se galuega fa'alelagi, e aumaia ai se elemeni uiga ese i le natura fa'alētagata ua tu'uina atu iā Keriso e avea ma Ona lava olo, lea ua Ia taofia i se lalolagi fouvale, ma ua Ia finagalo e leai se pule e iloa ai na o Lana lava pule. O se agaga o lo'o taofia pea e pulega fa'alelagi e lē mafai ona fa'ato'ilaloina i osofa'iga a Satani. Se'i vaganā ua tu'uina atu i tatou lava i le pule a Keriso, e fa'ato'ilaloina i tatou e le au amioleaga.” —*The Desire of Ages*, p. 324.

“O le fefinaua'i, o fesili, o faitioga, o le ulagia, o a'oa'oga lea ua maua e le to'atele ma iloa i fua latou te fuaina mai. Latou te mumusu e talia fa'amaoniga. O le loto fa'alēnatura o lo'o faia le taua e fa'asaga i le malamalama, upumoni, ma le potu. Sa i ai Iesu Keriso i potu moe uma na e fa'afiafia ai. E fia tatalo na alu a'e i le lagi mai nei potu?” —*The Ellen G. White 1888 Materials*, p.140.

“E leai se fa'amautinoāga e sa'o a tatou a'oa'oga fa'avae ma sa'oloto mai aputi ma mea sesē uma se'ivagana ua tatou faia i aso uma le finagalo o le Atua. Afai tatou te faia Lona finagalo, o le a tatou iloa ai le a'oa'oga fa'avae. O le a tatou va'ai i le upumoni i lona matagofie paia. E tatau ona tatou taliaina ma le migao ma le mata'u fa'ale-atua, ona mafai lea ona tatou tu'uina atu le mea ua tatou iloa o le upumoni i isi. E lē tatau ona i ai se lagona o le maualuga po o le fa'aeaina o le tagata lava ia i lenei lalolagi mamalu.” —*Ibid.*, p. 46.

- e. O le ā le vaega o le Tusi Paia e sili atu ona tāua na i lo isi? Roma 15:4; Luka 24:27; Isaia 28:10.

---



---

“O vaega uma lava o le Tusi Paia na tu'uina mai i le musumusuga a le agaga o le Atua ma e aogā. O le Feagaiga Tuai, e lē itiiti ifo nai lo le Feagaiga Fou, e tatau ona gaua'i atu i ai. A o tatou su'esu'e i le Feagaiga Tuai o le a tatou maua ai vaipuna ola o loo puna mai i le mea e iloa ai e le tagata faitau fa'atamāla ua o sina mea'ai suamalie.

“O le Feagaiga Tuai ua fa'amalamalamaina ai le Feagaiga Fou, ma le Feagaiga Fou i le Feagaiga Tuai. O mea ta'itasi o se fa'aaliga o le mamalu o le Atua iā Keriso.” —*Counsels to Parents, Teachers, and Students*, p. 462.

## 5. E LĒ LAVA NA'O LE FAITAU MA SU'ESU'E

- a. **O le ā e tatau ona tatou faia i mea ua tatou a'oa'oina a o su'esu'eina le Tusi Paia? Faataoto 2:1-5; Salamo 119:11, 16.**

“E fiafia le Agaga Paia e talanoa atu i le autalavou, ma ia latou iloa ai oa ma le matagofie o le afioga a le Atua. O folafolaga na fetalaiia e le Faiaoga sili o le a fa'aosofia ai lagona ma fa'aosofia ai le agaga i le mana paia fa'alelagi. O le a tupu a'e i le mafaufau ni fua se tele o le masaniga i mea fa'alelagi ma o le a aveva ma pa puipui e tete'e atu ai i fa'aosoosoga.

“O le a fa'atupula'ia le tāua o upu o le upumoni, ma maua ai se lautele ma le atoatoa o le uiga tatou te le'i moe miti i ai. O le matagofie ma le tamāōa'iga o le upu ua i ai se a'afiaga liua i le mafaufau ma uiga. O le a pa'u ifo le malamalama o le alofa fa'alelagi i luga o le loto ua musuia.”—*Christ's Object Lessons*, p. 132.

- e. **Afai tatou te teulotoina nei mea, o le ā ua tatou fa'atusatusaina ia i? Luka 6:46-49.**

“O le loto ua teuina ai upu moni tāua o le Afioga a le Atua, e fa'amalosia e tete'e ai i fa'aosoosoga a Satani, e tete'e ai i mafaufauga lē mamā ma amioga lē paia.”—*My Life Today*, p. 28.

- i. **O le a le mea tatou ole atu ai i le Alii e fai mo i tatou—ma aiseā? Salamo 119:133.**

“O le atamai fa'ale-lagi na te fa'atonutonuina ala o i latou o e tu'uina atu atoa lo latou fa'atuatuga i le Alii. O le alofa fa'alelagi e si'omia ai i latou, ma o le a latou iloa ai le fa'atasi mai o le Fesoasoani sili, o le Agaga Paia lea.”—*Our High Calling*, p. 324.

## FESILI TOE FAAMANATU

1. Fa'aapefea ona tu'uina mai musumusuga a le Atua i tagata?
2. O le ā le tele e mafai ona tatou talitonuina ai le Tusi Paia, ma aiseā?
3. O le ā le fuafuaga o le tu'uina atu o tusitusiga fa'avalōāga, ma o le ā le pule ua aumaia fa'atasi ai ma tusitusiga musuia uma.
4. E fa'aapefea e uiga fa'aalia ona a'afia ai le su'esu'eina o le Tusi Paia?
5. E fa'aapefea ona fausia o tatou olaga i se fa'avae mausalī?



## O Le Afioga Mamana a le Atua

**MAU AUTŪ:** “Le Atua e, ia e faia se loto mamā mo a’u; ma ia e fa’afouina se loto mau i totonu iā te a’u” (Salamo 51:10).

“E masani ona foliga mai e lē mafai ona tete’e atu i fa’aosoosoga ona, e ala i le fa’atamāla ma lē amana’ia o le tatalo ma le su’esu’eina o le Tusi Paia, e lē mafai e lē ua fa’aoso’osoina ona manatua folafolaga a le Atua ma fetaia’i ma Satani ma ’aūpega o le Tusi Paia.”—*The Great Controversy*, p. 600.

**Faitauga Fautuaina:** *Fundamentals of Christian Education*, pp. 123–128.

*Ulua’i Aso*

*Ianuari 8*

### 1. FITAFITA O LE SATAURO

- a. **O le a le mea e tatau ona tatou nofo’uta i taimi uma i lo tatou aumau ai i le lalolagi? 1 Peteru 5:8. E fa’aapefa la ona fa’atusatusa e Paulo le olaga o se Kerisiano? 2 Timoteo 2:3.**

---

“E leai se mea e sili atu ona vaivai, e leai foi se mea e sili atu ona fa’alagolago i ai, nai lo le agaga e lagonaina lona lē aogā ma fa’alagolago atoa atu i le galuega o le toto o le Fa’aola na fa’asatauroina ma toetū mai. O le olaga fa’a-Kerisiano o se olaga o taua, ma fete’ena’iga faifai pea. O se taua ma se savaliga. Ae o galuega uma o le usiusita’i iā Keriso, o galuega uma o le fa’afitia o le tagata o ia lava ona o Ia, o tofotofoga uma e onosa’ia lelei, o manumalo uma e maua mai fa’aosoosoga, o se la’asaga lea i se savaliga atu i le mamalu o le manumalo mulimuli.”—*That I May Know Him*, p. 253.

- e. **E fa’aapefa ona tatou manumalo I le i’uga? Efeso 6:11–17.**

---

“O i latou o e o le a o’ofu i le ofutau atoatoa a le Atua ma tu’uina atu nisi taimi i aso uma e mafaufau loloto ai ma tatalo ma su’esu’e i Tusitusiga Paia o le a feso’ota’i ma le lagi ma o le a i ai se lavea’iina, ma se liuaga ma se a’afiaga i luga o i latou o si’omiaina i latou. O mafaufauga maoga’e, o fa’anaunauga tamāli’i, o va’aiga manino o le upumoni ma le tiute i le Atua, o le a fai mo i latou. . . . O le a maua e lenei vasega se lototele fa’apaiaina e o mai ai i luma o le Silisili Ese. O le a latou lagonaina o le malamalama ma mamalu o le lagi e mo i latou, ma o le a fa’amamāina, o le a si’itiaina, ma fa’amamaluina e lenei mafutaga vavalalata ma le Atua. E fa’apenā le avanoa mo Kerisiano moni.”—*Testimonies for the Church*, vol. 5, p. 112, 113.

## 2. O LE MANA I LE UPU

### a. O le ā le loloto o le Upu pe a talia moni i le agaga? Eperu 4:12.

---



---

“O upu o musumusuga, e manatunatu loloto i ai i le loto, o le a pei o tāfega e tafe mai i le vaitafe o le vai o le ola. Na tatalo lo tatou Fa’aola ina ia tatalaina mafaufau o le ‘au so’o ina ia malamalama i le Tusi Paia. Ma so’o se taimi lava tatou te su’esu’e ai i le Tusi Paia ma le loto tatalo, o le a latalata mai le Agaga Paia e tatala mai iā i tatou le uiga o upu tatou te faitauina.”—*Our High Calling*, p. 205.

“E tatau ona aumaia le upu moni aogā i le olaga, ma o le Upu, e pei o se pelu ma’ai ona itu e lua, e tatau ona vavae ese le fa’asiliga o le tagata lava ia o loo i ai i o tatou uiga.

“O le Upu e fa’amauualaloina ai ē fa’amauualuluga, e agamalu ma salamō ai, ma ē lē usiusita’i. O masaniga o le agasala e masani ai le tagata ua fefiloi ma faiga masani i aso ta’itasi. Ae e vavaeeseina e le Upu le tu’inanau o le tino. O le iloatino o manatu ma fa’amoemoega o le mafaufau. E vavaeeseina ai so’oga ma le mafaufau e vavae ese ai tu’inanau o le tino, ma loto i ai tagata e puapuagātia mo lo latou Alii.”—*The SDA Bible Commentary [E. G. White Comments]*, vol. 7, p. 928.

### e. I le amataga, na fa’apefea ona vave faia e le Upu le lagi ma le lalolagi? Kenese 1:1; Salamo 33:6, 9.

---



---

### i. O ā mea na foafoaina ai e le Atua le lalolagi e fa’aaogā ai Lana afioga? Eperu 11:3. Ina ua uma ona foafoaina le lalolagi, pe na tu’ua ea e le Atua le foafoaga ina ia tausia mo ia lava? Eperu 1:3.

---



---

“O le malosiaga foafoa lava lea e tasi na aumaia ai le lalolagi o lo’o galulue pea i le lagolagoina o le atulaulau ma le fa’aauauina o galuega a le natura. O le a’ao o le Atua e ta’ita’ia paneta i la latou savaliga maopopo i le lagi. E lē ona o le mana o loo iai i lea tausaga ma lea tausaga, o loo fa’aauau pea ona ta’amilo le lalolagi i le la ma fua mai ai lona telē. O le afioga a le Atua e pulea elemeni. Na te ufitia le lagi i ao ma saunia le timu mo le lalolagi. Na te faia vanu ia fua mai ma ‘mutia e tutupu i luga o mauga; Salamo 147:8. E ala i Lona mana e tupu olaola ai vao, e tutupu ai lau ma fuga mai fuga.”—*Counsels to Parents, Teachers, and Students*, pp. 185, 186.

### 3. ILOA O LE AGASALA

- a. O le a le fa'anaunauga o Tavita ina ua uma ona ia faia le agasala i le Atua ma Patesepa? Salamo 51:1-4.
- 
- 
- 

- e. I le faitauina o le fa'ailoaga o le salamō o Tavita o lo'o teuina i fa'amaumauga paia, o ā ona popolega loloto—o ā taunu'uga o le a feagai ma ia—po o le toefuata'ina o lana so'otaga ma le Atua? Salamo 51:5–10.
- 
- 
- 

“I le tausaga atoa ina ua mavae lona paū, sa nofo ai Tavita i se tulaga saogalemu; e leai se fa'amaoniga vaa'ia o le lē fiafia o le Atua. Ae o le fa'asalaga fa'alelagi na tumau pea i ona luga. Ua vave ma mautinoa ua lata mai le aso o le tau ma le fa'amasinoga, e lē mafai e le salamō ona aveesea, o tigā ma le ma'asiasi e fa'apogisa'ina ai lona olaga atoa fa'alelalolagi. O i latou o ē, e ala i le fa'asino atu i le fa'aa'oa'oga a Tavita, ua taumafai e fa'aitiitia le ta'usalaina o a latou lava agasala, e tatau ona latou a'oa'oina mai fa'amaumauga a le Tusi Paia e fa'apea, e faigatā le ala o le solitulafono. E ui e tatau ona latou liliuese mai i o latou ala leaga e pei o Tavita, ae o le taunu'uga o le agasala, e o'o lava i lenei olaga, o le a maua ai le o'ona ma le faigatā ona onosa'ia.”—*Patriarchs and Prophets*, pp. 723, 724.

“Sa fa'amaoni ma loloto le salamō o Tavita. Sa leai se taumafaiga e fa'aitiitia ai lana solitulafono. Sa leai se mana'o e sola ese mai le fa'amasinoga ua fa'amata'uina, na musuia ai lana tatalo. Ae na ia iloa le telē o lana solitulafono i le Atua, na ia iloa atu ai le leaga o lona agaga, na ia ino'ino ai i lana agasala. E le na o le fa'amagaloga na ia tatalo ai, ae mo lona loto ia mamā. E le'i fa'avaivai Tavita i le tauiviga. I le folafolaga a le Atua mo tagata agasala ua salamō na ia vaa'ia ai le fa'amaoniga o lana fa'amagaloga ma lona taliaina.”—*Ibid.*, p. 725.

“Na fa'amagaloina Tavita i lana solitulafono ona sa ia fa'amaulaloina lona loto i luma o le Atua i le salamō ma le ofoina atu o lona agaga, ma talitonu o le a fa'ataunu'uina le folafolaga a le Atua e fa'amagalo. Sa ia ta'uta'u atu lana agasala, sa ia salamō, ma toe liuaina. I le fa'agae'etia o le mautinoa o le fa'amagaloga, na ia alaga mai ai, ‘Amuia le tagata ua fa'amagaloina lona solitulafono, ma ua ufitia lana agasala. Amuia le tagata e le ta'usalaina e Ieova, e leai foi se ‘ole'olega i lona loto.’ Salamo 32:1, 2. E o'o mai fa'amanuiaga ona o le fa'amagaloga; e o'o mai le fa'amagaloga e ala i le fa'atuatua, o le agasala ua ta'uta'u atu ma salamō i ai, ua tauaveina e Lē na tauaveina le Agasala sili. O lea e mai iā Keriso o tatou fa'amanuiaga uma. O Lona maliu o se taulaga togiola mo a tatou agasala. O Ia o le Ala sili lea tatou te maua ai le alofa mutimutivale ma le alofa tunoa o le Atua.” – *Our High Calling*, p. 83.

#### 4. O LE MANA E SUIA AI LE LOTO O LE TAGATA

- a. **O le a le mea e aumaia ai le fa’amoemoe i le avanoa e suia ai le olaga ele’elea ma le agasala i se olaga mamā? Iopu 14:4; Ieremia 13:23; Esekielu 36:26, 27.**
- 
- 

“E moni atonu e i ai se fa’asa’oga i fafo o le aveesea e aunoa ma le mana fa’afouina o Keriso. O le fiafia i fa’atosinaga ma le fa’anaunau mo le fa’atāuaina o isi e mafai ona maua ai se olaga e fa’atulagaina lelei. O le fa’aaloalo o le tagata iā te ia lava e ono ta’ita’i atu ai i tatou e aloese mai i foliga va’aia o le leaga. E mafaia ea e se loto manatu fa’apito ona fa’atino ni gaoiga o le foa’i atu ma agalelei. O le a la le mafuaaga tatou te filifili ai po o ai le itu tatou te i ai?”—*Steps to Christ*, p. 58.

“Ua saunia e le Atua le tele o auala mo le fa’amanuiaina o le taua e tete’e atu ai i mea leaga o lo’o i le lalolagi. O le Tusi Paia o le ofutau lea e mafai ona tatou fa’aa’uupegaina ai mo le tauiviga.”—*The Acts of the Apostles*, p. 502.

- e. **O le ā le auala e tasi e suia ai le loto leaga o le tagata i se tasi e fiafia i le amiotonu? Ioane 3:3.**
- 
- 

“O mea sa latou ino’ino muamua i ai, ua latou fiafia ai nei, a o mea sa latou mua’i fiafia i ai, ua latou ino’ino i ai. O e fa’amauualuluga ma fa’alialiavale e avea ma tagata agamalū ma loto mauualalo. O mea lē aogā ma fa’atauva’a e avea ma mea lelei ma tauagafau. O e onanā e o’o ina mafaufau lelei, ma e amio leaga ua mamā.”—*Steps to Christ*, p. 58.

- i. **O ā fa’amaoniga o lenā suiga? Kalatia 5:22, 23.**
- 
- 

“O le natura tuai, na fanau mai i le toto ma le loto o le tino, e lē mafai ona fai mo latou tofi o le malo o le Atua. O ala tuai, o tu’inauga tu’ufa’asolo, o masaniga muamua, e tatau ona lafoa’ia, auā e lē tu’ufa’asolo mai le alofa tunoa. O le fanaufouina e aofia ai le i ai o fa’amoemoega fou, o se tofo fou, ma se fa’anaunauga fou. O i latou o e ua fanauina mo le ola fou e le Agaga Paia, ua tofutofusia i latou i le natura paia, ma o a latou masaniga ma amioga uma o le a latou fa’aailoa atu ai le fa’amaoniga o lo latou so’otaga ma Keriso. Pe a manatu tagata i le fa’apea mai o ni Kerisiano, a o taofi mau atu i a latou fa’alētonu fa’alēnatura o uiga ma le mafaufau, o le ā la se ese’esega o a latou tulaga mai i le tulaga fa’alelalolagi? Latou te lē taliaina le upu moni o Sē e Fa’apaiaina, Fa’alauleleina. E le’i toe fanaufouina i latou”—*The SDA Bible Commentary*[E.G. White Comments], vol.6, p 1101.

## 5. FANAUINA MAI I LE AFIOGA A LE ATUA

- a. **O le ā e iai le mana e faia ai se suiga mata’utia i le loto o se tagata pi’opi’o ma amioleaga? Roma 1:16; Ioane 1:1; 15:3; 1 Peteru 1:23.**
- 
- 

“O le Tusi Paia e aupito sili ona matagofie i talafa’asolopito uma, auā o le foafoaga lea a le Atua, ae lē o le mafaufau e gata mai. Na te toe aumaia i tatou i tua i seneturi o le amataga o mea uma, ma fa’ailoa mai ai le talafa’asolopito o taimi ma va’aiga ia semanū e lē mafai ona iloa. Ua fa’aalia mai ai le mamalu o le Atua i le galuega a Lana tausiga e lavea’i ai le lalolagi pa’ū. O lo’o fa’ailoa mai ai i se gagana sili ona faigofie o le mana malosi o le talalelei, lea na mauaina, o le a motusia ai filifili e noatia ai tagata i le kariota a Satani.”—*Fundamentals of Christian Education*, p. 377.

- e. **O le ā o lo’o fa’agaio’ia e le Upu i totonu iā i tatou, ma aiseā e matuā talafeagai ai mo se olaga manumalo? Roma 10:17; 1 Ioane 5:4. Fa’aapefa ona tatou fa’atumauiina lenā ituaiga manumalo i taimi totoe o ō tatou olaga? Kolose 2:6.**
- 

“A o fa’aapea ona maua le fa’atuatua i le malamalama i mataupu fa’avae o le upumoni, o le a i ai se malosi ma se ūna’iga o fa’amoemoega o olaga i se vaega o tagata. O le a taliaina i le agaga le afioga a le Atua, e fa’atonutonuina ai manatu, ma ulu atu ai i le fausiaina o uiga ma amioga fa’alētagata.

“O le va’ava’ai atu pea iā Iesu i mata o le fa’atuatua, o le a fa’amalosia ai i tatou. O le a faia e le Atua fa’aaliga sili ona tāua i Ona tagata fia a’ai ma fia feinu. O le a latou iloa ai o Keriso o se Fa’aola patino. A o latou a’ai i Lana afioga, latou te iloa ai o le agaga ma le ola. O le upu e fa’aumatia ai le natura, o le fa’alelalolagi, ma maua ai se olaga fou iā Keriso Iesu. E o’o mai le Agaga Paia o se Fesoasoani mo le agaga. E ala i le suia ai o filifiliga e Lona alofa tunoa, ua toe faia ai i le fa’atusa o le Atua i le au so’o; ma avea ai o ia o se tagata fou. O le alofa e suitulaga i le ita, ma maua ai e le loto le fa’atusa paia.”—*The Desire of Ages*, p. 391.

## FESILI TOE FAAMANATU

1. **O le ā le mātuiā o le taua a le Kerisiano ma le leaga?**
2. **O le ā le tulaga tāua o loo i ai le Afioga i lenei taua?**
3. **E fa’aapefa ona malamalama i le loloto o le natura fa’ataumo’oi o le agasala?**
4. **E fa’aapefa ona tupu le suiga o le agaga?**
5. **E fa’aapefa ona fa’atumauiina la tatou faiā ma Keriso?**

## Gata Ūogo

**MAU AUTŪ:** “Ia outou ōmai iā te a’u, o outou uma o ē tigāina ma mafatia i avega, o a’u foi e malōlō ai outou. Ia outou amoina la’u amo, ma ia outou fa’aa’oa’o iā te a’u, auā o a’u lē agamalū ma le loto maualalo; ona maua lea e outou o le mālologa mo outou agaga. Auā e avegofie la’u amo, o la’u avega foi e māmā ia” (Mataio 11:28-30).

“O le itu tagata o le Alo o le Atua o mea uma ia iā i tatou. O le filifili auro lea e fusia ai o tatou agaga iā Keriso, ma e ala mai iā Keriso i le Atua. E tatau ona avea lenei mea ma a tatou su’esu’ega.”—*Selected Messages, bk. 1, p. 244.*

**Faitauga Fautuaina:** *The Desire of Ages, pp. 48, 49, 114–123.*

*Ulua’i Aso*

*Ianuari 15*

### 1. O FANAU A APERAAMO

a. Fa’amatala se uiga mata’utia e a’afia ai le olaga fa’alēagaga. Ioane 8:33.

---



---

e. O le ā le mea ua avea ai i tatou ma pologa i le agasala? Ioane 8:34, 39–44.

---



---

“Sa ta’utino mai e le ‘au Faresaio o i latou lava o fanau a Aperaamo. Sa fa’ailoa atu e Iesu iā i latou o lenei ta’utinoga, e tasi lava le mea e mafai ai ona fa’amaonia i latou faia lea o galuega a Aperaamo. O le fanau moni a Aperaamo o le a ola i se olaga, e pei ona faia e ia, o se olaga usiusita’i i le Atua. Latou te lē taumafai e fasioti se tasi o lo’o tautala i le upumoni na tu’uina atu iā te Ia mai le Atua. I a latou ma le taupulepulega fa’asaga iā Keriso, na le’i faia ai e le ‘au a’oa’o galuega a Aperaamo. E leai se tāua o sē tupuga mai iā Aperaamo. A aunoa ma se so’otaga fa’alēagaga ma Ia, lea o le a fa’aalia i le mauaina o lea lava agaga e tasi, ma le faia o nei lava galuega e tasi, e lē o ni ana fanau i latou.”—*The Desire of Ages, pp. 466, 467.*

i. E mafai fa’aapefea ona lavea’iina mai lenei pule i se matai sāuā? Ioane 8:32, 36; Kalatia 3:29.

---



---

## 2. O LE A LE UIGA O LE “ILOA”?

- a. **O le ā le fesili tāua na fai atu e Pilato i le maota fa’amasino? Ioane 18:38 (vaega muamua). O le a se tali semanū na te maua pe ana fa’apea e tū mo sina taimi e fa’alogo i le tali a le Fa’aola? Ioane 14:6.**

“Sa i ai le naunauta’iga iā Pilato ia iloa le upumoni. Sa fenumia’i lona mafaufau. Sa ia taofimau ma le naunauta’i i upu a le Fa’aola, ma sa o’otia lona loto i le naunau tele e fia iloa po o le ā moni lava, ma pe fa’apefea ona ia mauaina. ‘O le ā le upumoni?’ o lana fesili lea. Ae sa ia lē fa’atali mo se tali. O le vevesi ma le vavaō mai o fafo na ia manatua ai le itula; ona alalaga mai lea o ositaulaga ina ia fa’avave se gaioiga. Sa ia alu atu i tagata Iutaia, ma ia ta’utino atu ai ma le malosi, ‘Ou te lē maua lava se mea e sesē ai o Ia.’ ”—*The Desire of Ages*, p. 727.

- e. **Fa’amatala le mea e tupu pe a su’esu’e e se tagata le Upu ae na te lē iloa le Atua. Mareko 12:24; 2 Timoteo 3:7.**

“Sa fa’avi’ivi’i e le ‘au Satukaio i latou lava e fa’apea, o i latou uma lava ua matuā tausisi atu i Tususiga Paia. Ae na fa’aalia e Iesu, latou te le’i iloaina lo latou uiga moni.”—*The Desire of Ages*, p. 605.

- i. **E mafai fa’apefea ona tōsina atu i se Tasi e lē o fa’ananau i ai lo tatou natura pa’ū? Ioane 12:32; 8:28; Mataio 11:28-30.**

“So’o se taimi e tu’uina atu ai le tulafono i luma o tagata, ia tu’u atu i le a’oa’o o le upu moni o lo’o fa’ailoa mai ai le nofoali’i ua si’omiaina i le nuanua o le folafolaga, o le amiotonu a Keriso lea. O le mamalu o le tulafono o Keriso lea; Na afio mai o Ia e fa’alautele le tulafono, ma fa’amamaluina. Ina ia fa’amanino atu, o le alofa tunoa ma le upumoni ua fa’atasia iā Keriso, ma ua fusia e le amiotonu ma le filemu le tasi ma le isi. O lou va’ava’ai atu i Lona nofoali’i, o le ofoina atu o lou salamōina ma vi’iga ma le fa’afetai i le Atua, o oe o se Kerisiano atoatoa, ma avea ma sui o Keriso i le lalolagi. Ia outou tutumau iā Keriso, ma o lo’o tumau Keriso i totonu iā te outou; ma ua iā te oe lenā filemu e silisili i mea uma lava e manatu i ai. E mana’omia ona tatou mafaufau loloto e lē aunoa iā Keriso ma Lona alofa matagofie. E tatau ona taula’i atu pea o tatou mafaufau iā Iesu, ma fa’amauiina i tatou iā te Ia. I talanoaga uma lava ia mafaufau i uiga paia.”—*The Ellen G. White 1888 Materials*, p. 730.

“Ia su’esu’e ma le fa’aeteete i uiga paia fa’alētagata, ma fesili so’o, ‘O le ā se mea e faia e Iesu pe ana fa’apea o Ia e i lo’u tulaga?’ ”—*The Ministry of Healing*, p. 491.

### 3. O GATA I LE VAO

- a. **O le ā le vaifofō na saunia e le Atua mo i latou na ūtia e gata ūogo i le toafa? O le a le mea na mana'omia mo le fa'amālologa ina ia faia? Numera 21:6–9.**
- 

“Auā sa puipuia i latou i le mana fa'alelagi [o le fanauga a Israelu] latou le'i iloaina le anoanoa'i o lamatiaga na fa'aauau pea ona si'omia ai i latou. I lo latou lē loto fa'afetai ma lo latou lē talitonu na latou fa'atalitalia ai le oti, ma o lenei ua fa'atagaina e le Alii le oti ia o'o mai iā i latou. O gata o'ona na feoa'i i le vao sa ta'ua o gata ūogo, ona o le mata'utia o a'afiaga e maua mai i lo latou tui, e mafua ai le fula ma le oti vave. A'o aveesea le a'ao puipui o le Atua mai iā Israelu, o se fuainumera tele o tagata na osofa'ia e nei meaola o'ona. . . .

“Na poloa'i mai le lagi iā Mose e fai se gata apamemea e pei o le gata o lo'o ola, ma si'itia ai i luma o le nu'u. I lenei mea, o i latou uma na ūtia e tataua ona va'ava'ai, ma o le a latou maua ai se mapusaga. Sa ia faia fa'apea, ma sa fa'alogoina le tala fiafia i le togālauapi atoa ina ia mafai e i latou uma na ūtia ona va'ai atu i le gata apamemea ma ola ai. E to'atele ua māliliu, ma ina ua si'i a'e e Mose le gata i luga o le pou, sa lē talitonu nisi fa'apea e na o le va'ai atu i le fa'atagata uāmea ona fa'amāloloaina ai lea o i latou; na fano i latou nei i lo latou lē talitonu. Peita'i sa i ai le to'atele o ē sa fa'atuatua i le sauniuniga na faia e le Atua. . . . Afai o i latou nei, e ui ina matapogia ma feoti, e na o le tasi lava le taimi e mafai ai ona va'ai, o le a toe fa'aleleia atoatoa. E ui ina matapogia ma feoti, ae ana faapea e na o le tasi lava le taimi e mafai ai ona latou vaai atu iai, o le a toe manuia atoatoa i latou nei.

“Na iloa lelei e tagata e leai se mana i le gata apamemea e mafai ai ona faia se suiga fa'apenā ia i latou o ē na va'ava'ai i ai. O le mana fa'amālōlō sa mai i le Atua lava. I Lona atamai na Ia filifilia ai lenei auala e fa'aalia ai Lona mana. O lenei auala faigofie na iloa ai e tagata o lenei puapuagā na o'o mai iā i latou ona o a latou agasala. Sa fa'amautinoa atu foi iā i latou a usiusita'i i le Atua e leai se mafua'aga latou te fefefe ai, aua o le a Ia fa'asaoina i latou.”—*Patriarchs and Prophets*, pp. 429, 430.

- e. **Fa'apefea ona laugatasi'a lenei molimau ma i latou o lo'o mafatia i le ū a lenā gata tuai (Fa'aaliga 12:9) ma le fa'anaunauga ia fa'amālōlō? Ioane 3:14, 15; 1:29.**
- 

“Ia tu'u atu i le tagata agasala ua salamō e taula'i atu ona mata i le 'Tama'i Mamoe a le Atua, na te aveesea le agasala a le lalolagi' (Ioane 1:29); ma o le va'ai atu, e suia ai o ia. O lona fefe ua liua i le olioli, ma ona masalosologa i le fa'amoemoe. E puna a'e ai le agaga fa'afetai. O le loto e pei o se papa ua nutimomoia. E pei o se galu le sosolo atu o le alofa i le agaga. O Keriso o lo'o i totonu iā te ia le vaipuna, e puna a'e i luga i le ola e fa'avavau.”—*The Desire of Ages*, p. 439.



#### 4. O AI IESU?

- a. **Sa soifua Keriso i se soifua’aga atoatoa i le lalolagi (1 Peteru 2:21, 22), ae nai lo le tōsina atu ia te Ia ma Ona so’o fa’amaoni, o le ā le tali o le to’atele o tagata? 2 Timoteo 3:12; Ioane 3:19, 20.**

“E moni lava o ulua’i Kerisiano o ni tagata tulaga ese i latou. O o latou uiga lē mata’uleagaina mo lo latou fa’atuatua e lē maluelue, o se a’oa’iga faifai pea lea na fa’aleagaina ai le filemu o le tagata agasala. E ui ina to’aitiiti i latou, e aunoa ma ni tamāōa’iga, o tulaga, po o ni fa’alupega, ae sa avea i latou ma mea mata’utia i tagata amioleaga i so’o se mea na iloa ai o latou uiga ma a’oa’oga fa’avae. O le mea lea na inosia ai i latou e ē amioleaga, e pei o Apelu na inosia e le lē amioatua o Kaino. O le mafuaaga lea e tasi na fasiotia ai e Kaino ia Apelu, o ē ua saili e lafoa’i le puipuiga a le Agaga Paia, ua fasiotia ai foi tagata o le Atua. O le mafuaaga lava lea e tasi na te’ena ma fa’asatauroina e Iutaia le Fa’aola—auā o le māmā ma le paia o Lana amio o se a’oa’iga faifaiepa lea i lo latou manatu fa’apito ma faiga pi’opi’o. Talu mai onapō o Keriso e o’o mai i le taimi nei, o Ona so’o fa’amaoni ua fa’aosofia ai le ita ma le tete’e o i latou o ē alolofa ma mulimuli i ala o le agasala.”—*The Great Controversy*, p. 46.

- e. **O le a le mana silisiliese o lo’o fa’aalia i le Fa’aola o le lalolagi o lo’o i ai lea mana e tōsina mai ai tagata? 1 Timoteo 3:16; Ioane 1:1–3; Eperu 1:8.**

“Afai na faia e Keriso mea uma, na muamua o Ia i mea uma. O upu tautalagia e uiga i lenei mea sa matuā fa’aeteeteina lava, ma e lē mana’omia ona māsalomia e se tasi. O Keriso o le Atua moni lava, ma e i le tulaga aupito maualuga. Sa i ai o Ia fa’atasi ma le Atua e mai le vavau uma lava, o le Atua e i mea uma lava, ua fa’amanuiaina e fa’avavau.”—*Selected Messages*, bk. 1, p. 247.

“I le mafiafia o le pogisa, sa ufitia ai e le Atua le tigā mulimuli fa’alētagata o Lona Alo. O i latou o ē na va’ava’ai iā Keriso i Ona puapuagā na latou ta’usala i Lona paia. O na foliga, sa va’aia muamua e tagata, sa le’i fa’agaloina. E pei ona fa’aalia e Kaino ona foliga i lona nofosala ai o se fasioti tagata, o lea na fa’aalia mai ai i fofoga o Keriso le māmā, to’afilemu, agalelei—o le fa’atusa lea o le Atua. Ae o ē na molia o Ia o le a lē fa’alogo i fa’amaufa’ailoga o le lagi. I le tele o itula o puapuagā ma tigā, sa sioa atu ai Keriso i le motu o tagata na tauemu. O lea na nātia ai o Ia i le ofu talaloo o le alofa mutimutivale o le Atua.”—*The Desire of Ages*, p. 754.

“Ia mafaufau i le fa’alumaina o Keriso. Na Ia tauaveina i Ona luga le pa’ū, o le mafatia i le natura fa’alētagata, fa’aleagaina ma le talepeina e le agasala. Na Ia aveina o tatou fa’anoanoaga, ma tau’ave o tatou fa’alētonu ma le ma’asiasi. Sa Ia onosa’ia tofotofoga uma na o’o i ai le tagata. Na Ia tu’ufa’atasia le tagata ma le Atua: ma sa nofo ai le agaga paia i le malumalu o le tino.”—*The SDA Bible Commentary* [E. G. White Comments], vol. 4, p. 1147.

## 5. NA AVEA LE ATUA MA TAGATA

a. O le ā le mea na avea le Tagata Paia ina ia lavea'iina ai tagata mai lona tulaga oga'oga mātuiā ma le leai o se fa'amoemoe? Ioane 1:14; Eperu 2:9.

---

e. Fa'amatala mea na tau'ave e Iesu i Lona natura paia e lē ponā. Eperu 2:10, 11, 14, 17.

---

i. O le ā le telē na fa'amaualaloina ai e Iesu o Ia lava ina ia i ai le mana i le satauro i Kalevario? Eperu 2:14; Filipi 2:6–8; 2 Timoteo 2:8.

---

“I le ilo'iloina o lenei mea, e mafai ea ona maua e tagata se vaega e tasi o le fa'aeaga? A o latou saili atu i le soifua'aga ma puapuagā ma le fa'alumaina o Keriso, e mafai ea ona ea i luga o latou ulu fa'amaualuluga e peiseaī latou te le'i tauaveina tofotofoga, o le lē fa'alumaina, ma lē fa'amaualaloina? Ou te fai atu i so'o o Keriso, Va'ava'ai i Kalevario, ma le fa'anoanoa i le ma'asiasi i ou manatu fa'alētagata lava ia. O nei mea uma na fa'alumaina ai le Silisiliese o le lagi, e mo tagata nofosala ma ta'usalaina. Na Ia afio ifo i lalo i Lona fa'alumaina, se'ia o'ina leai se loloto maualalo e mafai ona Ia a'apa atu i ai, ina ia si'itia a'e ai le tagata, mai i lona amio leaga.”—*The SDA Bible Commentary [E.G. White Comments], vol. 5, pp. 1127, 1128.*

“O le ā le mea tatou te lafoa'i, pe afai ua tatou tu'uina atu mea uma? O se loto ua tumu i le agasala, o Iesu e fa'amāmāina, e fufuluina i Lona lava toto, ma fa'aola i Lona alofa e lē mafai'atusalia. Peita'i, e manatu tagata e faigata ona lafoa'i mea uma! Ou te mā e fa'alogo atu o tautalagia ma tusi.

“E lē mana'omia e le Atua ona tatou lafoa'ia so'o se mea e mo lo tatou lava lelei ia fa'atumauina. I mea uma Na te faia, o lo'o iā te Ia le soifua manuia o Ana fanau. Ma'imau pe ana iloa e i latou uma e le'i filifilia Keriso o lo'o iā te Ia se mea e sili atu ona lelei e ofoina atu iā i latou nai lo o mea o lo'o latou sa'ilia mo i latou lava.”—*Steps to Christ, p. 46.*

## FESILI TOE FA'AMANATU

1. O ā ni lesona e mafai ona tatou a'oa'oina mai le avea ai o tagata Iutaia ma fanau a Aperaamo?
2. E mafai fa'apefea ona matuā misia le manatu o le Tusi Paia a o su'esu'eina?
3. O ā ni lesona e mafai ona ou a'oa'oina mai gata feai i le vao?
4. O le ā le mea e mafai ai ona tōsina atu i le Tagata o Kalevario?
5. Aiseā na faia ai e Iesu le natura fa'alētagata ma agasala?

## Aumai iā te A’u le suāu’u i la’u lamepa

**MAU AUTŪ:** “E lē o le fitafita, e lē o le malosi, a’o Lo’u Agaga, ua fetalai mai ai Ieova o ‘Au” (Sakaria 4:6).

“O le fa’apaiaina o i tatou o le galuega lea a le Tamā, ma le Alo, ma le Agaga Paia, o le fa’a taunu’uga lea o le feagaiga na osia e le Atua ma i latou o ē ua noatia fa’atasi ma Ia, ma tutū fa’atasi ma Ia, atoa ai ma Lona Alo, ma Lona Agaga i se so’otaga paia. Po ua e toe fanaufouina ea? Po ua avea ea oe ma tagata fou iā Keriso Iesu? O le a galulue fa’atasi ia mana po’o ia malosiaga tetele e to’atolu o i le lagi fa’atasi ma i tatou. O le mea lea o le a mafai ai ona e fa’aailoa atu ai i le lalolagi mataupu silisili o le amiotonu.”—*The Signs of the Times, June 19, 1901.*

**Faitauga Fautuaina:** *The Acts of the Apostles, pp. 47-56.*

*Ulua’i Aso*

*Ianuari 22*

### 1. O AILE AGAGA PAIA?

a. O le ā le umi talu ona i ai le Agaga Paia? Kenese 1:2; Salamo 51:11; Eperu 9:14.

---



---

e. Fa’amatala ma talanoa i le uiga lautele o le natura o le Agaga o le Atua? Salamo 139:7-12; 1 Korinito 2:9-12; 2 Peteru 1:21.

---



---

“I ona po o le tamāōaiga o le malo o Iutaia, sa va’aia ai lava le a’afiaga o le Agaga o le Atua i se tulaga iloga, ae e le’i i ai i se tulaga atoatoa. Mai i le tele o tausaga na faia iai tatalo mo le fa’ataunu’uina o le folafolaga a le Atua mo le auina mai o Lona Agaga, ma e le’i i ai ma se vaega o nei tatalo ma aio’iga fa’atauanau na galo i le Atua.”—*My Life Today, p. 36.*

“A o le’i ulufale mai le agasala, sa matuā fa’afiafiaina lava Atamu i le la so’otaga ma Lē na faia o ia; peita’i talu ona vavae’eseina e le tagata ia lava mai le Atua e ola i le soliga o le tulafono, ua vavaeeseina ai le fanau a tagata mai lenei avanoa sili ona maualuga lea na mafai ai e tagata o le lalolagi ona maua pea le so’otaga ma le lagi. Ma ua feso’ota’i ai le Atua ma le tagata e ala i Lona Agaga, ma ua tu’uina mai ai le malamalama fa’alelagi i le lalolagi e ala i fa’aaliga mai Ana auauna filifilia.”—*God’s Amazing Grace, p. 190.*

## 2. PE O IA EA O SE TAGATA MONI LAVA?

### a. Ta'u mai nisi o uiga e fa'aalia ai uiga o le Agaga Paia?

(1) E silafia e le Agaga. Korinito 2:9-12.

(2) E mafai ona alofa. Roma 15:30.

(3) E mafai ona talanoa mai. 2 Korinito 13:14.

(4) Afai e mafai ona Ia talanoa mai, e tatau ona Ia tautala mai. 1 Timoteo 4:1.

(5) O le mea foi lea e mafai ai e Ia ona a'oa'o atu. 1 Korinito 2:13.

(6) E mafai ona avea o Ia ma molimau. Roma 8:16.

“Na tu'uina atu e Keriso se folafolaga moni lava i Ona so'o e fa'apea, a mavae Lona afio a'e i le lagi, o le ā Ia auina mai Lona Agaga iā i latou. ‘O lenei, ia outou o atu,’ o Lana fetalaiga lea, ‘e fai nu'u uma lava ma so'o, ma papatiso atu iā te i latou i le suafa o le Tamā [o le Atua moni lava], ma le Alo [o le Alii ia ma le Fa'aola moni lava], ma le Agaga Paia [o lē na auina mai le lagi e suitulaga ia Keriso]: a'oa'o atu iā te i latou ia tausi i mea uma ua Ou fai atu ai iā te outou; fa'auta foi, Ou te iā te outou i aso uma lava, e o'o lava i le gata'aga o le lalolagi.”—*The Review and Herald, October 26, 1897.*

“E tatau ona tatou iloa o le Agaga Paia, o Ia o le tagata e pei foi o le Atua o Ia o le tagata, o lo'o femāliua'i i luga o lenei fogāelele.

“O le Agaga Paia o ia o le tagata, auā e molimau mai o Ia fa'atasi ma o tatou agaga o i tatou o fanau a le Atua. Pe a o'o ina tu'uina atu lenei molimau, e na te tau'avea fa'atasi ma ana lava fa'amaoniga. O taimi fa'apenā tatou te talitonu ai ma le mautinoa o i tatou lava o le fanau a le Atua. . . .

“O le Agaga Paia e i ai Lona uiga moni lava, a aunoa ma lea o lona uiga e lē mafai ona Ia molimau mai i o tatou agaga atoa ai ma o tatou lava agaga o i tatou o fanau a le Atua. E tatau lava ona avea o Ia ma tagata e paia, auā a aunoa ma lea, o lona uiga e lē mafai foi ona Ia iloa ma su'esu'eina mea lilo o lo'o nātia i le finagalo o le Atua. ‘Auā o ai ea se tagata na te iloa mea a le tagata, e na'o le agaga o le tagata o lo'o nofo i totonu iā te ia? e fa'apea foi ona lē iloa e se tasi mea a le Atua, ua na'o le Agaga o le Atua.’—*Evangelism, pp. 616, 617.*

“O le i ai o Ia i le tino tagata, na le'i mafai ai e Keriso ona i ai i mea uma i le taimi e tasi; o le mea lea na matuā talafeagai ai mo Ia ina ia tu'ua i latou, ae afio a'e i Lona Tamā, ina ia auina mai ai le Agaga Paia e fai ma Ona sui tulaga i le lalolagi. O le Agaga Paia lava ia ua lē o toe tauaveina uiga fa'alētagata ma ua tuto'atasi mai ai. O le a sui tulaga le Agaga Paia mo Ia i le mafai lea ona iai i mea uma lava i le taimi e tasi (Omnipresent).”—*Manuscript Releases, vol. 4, p. 23.*

“E to'atolu peresona soifua o lo'o molimau i le lagi: o suafa nei o nei malosiaga po'o mana silisili fa'alelagi e to'atolu—o le Tamā, o le Alo, ma le Agaga Paia—o i latou uma o ē talia Keriso i le fa'atuatua o le a papatisoina, ma o malosiaga uma nei o le a latou galulue fa'atasi ma tagata ina ia usiusita'i atu i le lagi e ala i ā latou taumafaiga finafinau o le a latou ola i se olaga fou iā Keriso.”—*Evangelism, p. 615.*

### 3. O IA EA O SE TAGATA MONI LAVA? (FA'A'UAU)

#### a. O ā nisi o uiga e fa'aalia ai uiga o le Agaga Paia?

(1) Na te fautua mo i tatou pe a tatou tatalo. Roma 8:26, 27.

(2) Na te tufatufaina mai meaālofa fa'apitoa. 1 Korinito 12:7-11.

(3) Na te vala'aulia foi le tagata agasala ina ia salamō. Fa'aaliga 22:17.

(4) E lē gata i le vala'aulia o le tagata ina ia salamō; ae Na te fa'amaufa'ailogaina pe fa'amausalīina le tagata i le fa'atuatua. Efeso 1:13.

(5) Ona ua Ia fa'amaufa'ailogaina pe fa'amausalīina i tatou, o le ā se mea ua lapata'ia ai i tatou? Efeso 4:30.

(6) Ona o Ia o se tagata moni lava, o le mea lea e fa'atatau ai e Iesu lana fetalaiga i le suinauna o 'Ia' (He) ma 'Ia' (Him) i le Agaga Paia e fa'alua sefulu ma le fa taimi. O se tasi o na fa'ata'ita'iga o le Ioane 14:16, 17.

“O Keriso lo tatou Puluvaaga, ma le Agaga Paia o lo'o fautua pea lava pea mo le tagata, peita'i e lē 'ole pe 'aioi atu le Agaga Paia mo i tatou e pei ona faia e Keriso, o Lē na foa'iina mai Lona toto na fa'amaligiina talu mai le fa'avaeina o le lalolagi; auā o le Agaga e galue i o tatou loto, e aumaia ai tatalo ma le salamō, o vi'iga ma le fa'afetai. O le agaga fa'afetai lea e pua'ina mai i o tatou laugutu, o le taunu'uga lea o le loto ua ta'ia e le Agaga i manatunatuga paia, ma fafaguina ai musika mai le loto.”  
—*The SDA Bible Commentary [E.G. White Comments], vol. 6, pp. 1077, 1078.*

“O le fiafia e aofia ai mea nini'i ae fa'apea foi i mea tetele. . . . Afai tatou te fia fa'apei o Keriso ma ia tatou mauaina Lana amio, e tatau lava la ona tatou a'oa'oina mea nini'i e a'oa'o ai le agaga i le fa'apaiaina i aso uma. E leai se taimi e tatau ona faia'ina ai. Ia e fa'atumauina le fa'amaufa'ailoga ina ia maua mai ai manatu mamā i luga o le loto, e te lē faia e ala i se gaioiga so'ona fai ma le sāuā, ae e te tu'uina ma le fa'aeteete ia fa'amaufa'ailoga ma ia mausalī ma taofia i lalo se'ia o'o ina maua e le loto lona fa'asinomaga. E fa'apenā foi ona fetaia'i Le Alii ma o tatou agaga. . . . E lē o le taimi nei po'o lea taimi ma lea taimi, a'o le fa'afouina o le olaga e lē aunoa lea e totōina e le Agaga Paia lea e foliga ai iā Keriso.”—*In Heavenly Places, p. 66.*

“O le Agaga Paia e fa'aailoa mai ai tatalo fa'amaoni uma. Ua ou a'oa'oina ia ou iloa e fautua mai le Agaga mo a'u ma le 'au paia uma; auā o Ana musumusuga e tusa ia ma le finagalo o le Atua, auā e lē fete'ena'i ma Lona lava finagalo. E fesoasoani foi le Agaga i o tatou vaivai; auā o le Agaga o Ia lava o le Atua, ua silafia lava e Ia le finagalo o le Atua; o le mea lea a faia ai a tatou tatalo uma mo e mama'i, po'o nisi foi o manaoga, e ao lava ona tatou amana'iaina le finagalo o le Atua.”—*The Signs of the Times, October 3, 1892.*

#### 4. O LE Ā LANA GALUEGA?

a. A’o afio atu Iesu e fautua mo i tatou i le itu taumatau o le nofoali’i o le Atua, o le a se mea ua fa’ailoa mai ai o le Agaga Paia o le sui moni lava lea o le Fa’aola? Ioane 15:26; 16:13, 14.

---

e. O le ā se mea e foa’iina mai e le Agaga Paia i o tatou loto ta’ito’atasi pe a leai so tatou Uo Pele? Ioane 16:7.

---

i. E fa’aapefea ona Ia ta’ita’iina i tatou i le liuaga? Ioane 16:8 (margin); Sakaria 4:6.

---

“O le a foa’iina mai le Agaga o le a avea o se sui e na te toe aumaia le fa’afouga, auā a aunoa ma lea, po ua leai se aogā o le taulaga a Keriso. O le malosi o le amioleaga na matuā fa’amalosia mo le tele o seneturi, ma na matuā mata’utia lava le gaua’i atu o tagata i lenei fa’atagataotauaina fa’a-satani. Peita’i e mafai ona te’ena ma fa’ato’ilaloina le agasala e ala i le galuega mamana a le Peresona Lona Tolu o le Aiga Atua, o Lē o le a afio mai ma le malosi e lē māsua, e tusa ma le ato’atoāga o le mana fa’alelagi. O le Agaga na te fa’ataunu’uina mea na faia e le Fa’aola o le lalolagi. O le Agaga foi e fa’amāmāina ai le loto. E avea ai foi le tagata talitonu ma lē e tofusua i le natura paia e ala i le Agaga. Ua foa’iina mai e Keriso Lona Agaga o se mana paia lea e fa’ato’ilaloina ai faufaūga uma ma tu’inanauga fa’atupula’ia o le amio leaga, ma si’itia ai Lana lava amio i luga o Lana ekalesia.”—*The Desire of Ages*, p. 671.

“O le fa’atusa o Keriso ua tāina i totonu o le loto e ātagia mai lea i le amio, e ala i le olaga fa’atino, i lea aso ma lea aso, auā ua avea i tatou ma sui o se Fa’aola moni lava. Ua folafolaina mai le Agaga Paia mo i latou uma o ē ‘ole atu ai, auā o lo’o i ou autafa lava le Agaga Paia, o le fa’atusaina lea o Iesu Keriso.”—*General Conference Bulletin*, February 15, 1895.

“E leai se aogā o le tala’iga po’o le folafolaina o le upu pe a aunoa ma le fesoasoani mai ma le fa’atasi mai o le Agaga Paia; auā o lenei Agaga ua na’o le pau lea o le faia’oga aogā mo upu moni paia. E na’o le Agaga lava e mafai ona tu’ufa’atasia upu moni i le loto, lea e mafai ai ona aumaia le loto ma suia ai le olaga. Atonu e mafai ona tu’uina atu e se faifeau tusitusiga o le afioga a le Atua; atonu e mafai ona ia tu’uina atu ana fa’atonuga ma folafolaga uma; auā o lona luluina o le fatu o le talalelei o le a lē fa’amanuiaina se’ivaganā ua fa’atupuina le ola o lenei fatu i le sau mai le lagi. A aunoa ma le galulue fa’atasi ma le Agaga o le Atua, o le a leai se aogā i a’oa’oga, leai sona tulaga lelei, tusa lava po’o le a le maoa’e, e mafai ai ona avea se tasi ma ala o le malamalama.”—*Gospel Workers*, p. 284.

## 5. O LE FESO'OTA'IGA A LE AGAGA PAIA MA LE EKALEZIA

a. E fa'apefea ona maua e se tagata le malamalama atoatoa o le upu moni? Ioane 16:13.

---

e. Talu ai ona o le galuega lenei a le Agaga Paia, o le ā la Lana matāfaioi i le fesoasoani lea iā i tatou ina ia tatou maua le ekalesia moni? 1 Timoteo 3:15.

---

i. Talu ai ona e tāua tele le Agaga Paia i o tatou olaga, o le ā le mea e tatau lava ona tatou faia ina ia maua ai le ato'atoāga o le mana o le Agaga Paia? Luka 11:9-13.

---

“O le mana o le perenise o le amio leaga e mafai ona taofia e le mana o le Atua e ala i le peresona lona tolu o le Aiga Atua, o le Agaga Paia lea.”—*Evangelism, p. 617.*

“Afai e fa'amalieina le ekalesia i nai mea iti, o le a lē agava'a i latou i le mauaina o mea silisili a le Atua. Ae Aiseā tatou te le fia 'a'ai ai ma fia feinu i le meaālofa sili o le Agaga Paia, auā o le auala lea e mafai ai ona tausia le loto māmā? Ua fuafuaina e le Alii ina ia galulue fa'atasi le mana fa'alelagi ma taumafaiga fa'alētagata. E tāua tele mo le Kerisiano ona malamalama i ai i le uiga o le folafolaga a le Agaga Paia a'o le'i o'o i le afio fa'alua mai o lo tatou Alii o Iesu. Ia talanoa e uiga iā te ia, ma tatalo i ai, ia lauga e uiga iā te ia, auā e sili atu le finagalo o le Alii e tu'uina mai e ala i le Agaga Paia nai lo le tu'uina atu e matua o meaālofa sili ona lelei i a latou fanau.”—*The Review and Herald, November 15, 1892.*

## FESILI TOE FA'AMANATU

1. E fa'apefea ona tatou iloa o le Agaga Paia o se sui sili lea ona malosi i ona po o le Feagaiga Tuai?
2. O ā ni fa'amaoniga o uiga o le Agaga Paia?
3. O le ā le ese'esega i le va o le galuega fa'afautua a Keriso ma le galuega a le Agaga Paia?
4. O ā nisi o matāfaioi sili ona tāua a le Agaga Paia i le fuafuaga o le Fa'aolataga?
5. O le ā le sao tāua a le Agaga Paia i le fesoasoani atu lea i tagata ia malamalama ai i le ekalesia moni?

## Taulaga Fa'apitoa o le Sapati Muamua mo To'omaga mai Fa'alavelave i le Lalolagi

Ua amata ona fa'atuputeleina ma tupu so'o ma le oga'oga o mala fa'alēnatura i le lalolagi atoa. O nei mea e aofia ai—ae e lē fa'atapula'aina—mafu'iē, galulolo, matagi, āsiosio, 'afā, lologa, ma mauga mu. “E sau le āsiosio mai le itu i saute, ma le malūlū mai le itu i matū. O le mānava mai o le Atua e au mai ai le vaito'a. . . . Na te fa'ata'ape'apeina lona puao pupula: ona liua ai lea fa'ata'amilo i ana fautu'aga: ina ia faia o mea uma ua Ia finagalo i ai i luga o le atu laulau uma lava. Na te fa'ao'oina mai ai, po o le a'oa'iga, po o lona laueleele, po o le alofa” (Iopu 37:9-13).



E i ai pea i le finagalo o Lē Silisiliese le mea sili ona lelei mo lenei paneta matagofie ma foafoaga uma na Ia faia—ae o le taimi nei, o le tele o mea uiga ese ma le oga'oga o le tau e aga'i fa'apitoa mai i aūpega a le fili sili o agaga:

“E ui ina fa'aali atu i le fanauga a tagata o se foma'i maoa'e e mafai ona fa'amāloloina o latou ma'i uma, ae o le a aumaia e [Satani] fa'ama'i ma mala, se'ia o'o ina fa'aititia a'ai tetele i le fa'aleagaina ma le fa'atafunaina. E o'o lava i le taimi nei o lo'o galue pea o ia. I fa'alavelave fa'afuase'i ma mala i tafatafa o le sami ma le laueleele, i afi tetele, i āsiosio ma uato'a tetele, i afā, lologa, matagi, galu fafati, ma mafu'iē, i nofoaga uma ma i le afe o ituaiga, o lo'o fa'aaogāina ai e Satani lona mana. E na te tafi'esea le seleselega ua matua, ma mulimuli mai ai le oge ma puapuagā. Ua ia tu'uina atu i le 'ea se ma'i mata'utia, ma e faitau afe na fano i le fa'ama'i. O nei asi'asiga ua avea ma mea e sili atu ona fai so'o ma ua mata'utia. O le a o'o mai le fa'aumatiaga i tagata ma manu. 'Ua fa'anoanoa le lalolagi,' ma ua mamae; o tagata fa'amaualuluga, ua loto vaivai. Ua leaga le nuu i ē o nonofo ai; auā ua latou solia tulafono; ua latou suia sauniga, ua latou solia le feagaiga e fa'avavau' Isaia 24:4, 5.”—*The Great Controversy*, pp. 589, 590.

Po o le a lava le mea e ono tupu, e fa'apefea ona vala'auina fanau a le Atua e tali atu i mafatiāga maoa'e fa'alētagata lea e mafua mai i mala fa'alēnatura?

Ua poloa'i mai le Alii iā i tatou e mulimuli i Lana lava fa'ata'ita'iga i le lalolagi e ala i le a'apa atu e fa'amamā avega o mafatiāga i so'o se mea e maua ai. O mea autū e mana'omia o le olaga o le a vave lava ona mou fa'afuase'i atu pe a tupu se mala fa'alēnatura, o lea la, o lo tatou tiute fa'a-Kerisiano le fesoasoani atu po o le ā lava le tulaga ma so'o se mea e mafai ona tatou faia. O lau foa'i agalelei mo fesoasoani lavea'i i le Lalolagi, e fesoasoani e mafai ai ona faia fa'apea. Fa'afetai tele lava!

*O outou Uso mai le Koneferenisi Aoao*



## O Le Talalelei i le Feagaiga Tuai

**MAU AUTŪ:** “Auā o mea uma foi na tusia anamua, na tusia e a’oa’o mai ai iā te i tatou, ‘ina ia tatou maua le fa’amoemoe e tupu mai i le onosa’i, ma le fa’amāfanafana mai o tusi” (Roma 15:4).

“Na afio mai Keriso i le lalolagi lenei e lavea’iina Ona tagata mai a latou agasala. Na te lē fa’aolaina i tatou i a tatou agasala, auā e lē o Ia o se auauna o le agasala. E tatau ona tatou tali atu i uiga fa’alelagi o le amio a Keriso, ma ia tatou salamō mai iā tatou agasala, ma tu’uina atu i tatou lava iā Keriso e pei ona pipi’i atu le lālā i le vine.”—*The Signs of the Times, February 15, 1892.*

**Faitauga Fautuaina:** *Patriarchs and Prophets, pp. 63-70.*

*Ulua’i Aso*

*Ianuari 29*

### 1. LESONA MAI I LE TALA FA’ASOLOPITO

a. O le ā le mafuaaga autū e mana’omia ai lo tatou su’esu’eina o le tala fa’asolopito, aemaise lava i le tala fa’asolopito paia fa’alelagi? **Failaūga 3:15.**

---

“O le galuega a le Atua i le lalolagi, o lo’o fa’ailoa mai ai se tulaga mata’ina ma le maoa’e mai i lea taimi i lea taimi i toefuata’iga tetele aemaise lava i fa’agaioiga fa’alēlotu. O mataupu fa’avae o ‘osigāfeagaiga a le Atua ma tagata e tumau pea lava. O galuega sili ona tāua i le taimi lenei e tutusa lelei lava ma gaioiga o aso ua mavae, o molimau sa i ai i le ekalesia i augātupulaga ua mavae o lo’o i ai ni lesona tāua ma aogā mo i tatou i aso nei.”—*The Great Controversy, p. 343.*

e. Talu ai ona o le su’esu’eina o le talafa’asolopito lea ua fa’alautele mai ai ia i tatou le fa’amoemoe o le talalelei (Roma 15:4) o le ā se mea tāua ua aumaia e lenei fa’amoemoe i le agaga ua ma’i i le agasala? **Roma 1:16; Luka 19:10.**

---

“O vaega uma lava o le Tusi Paia e aumaia e le Agaga o le Atua, ma e matuā tāua tele ma aogā. Auā o tusi o le Feagaiga Tuai e lē itiiti ifo nai lo tusi o le Feagaiga Fou lea e tatau ona gaua’i atu i ai. A o tatou su’esu’eina tusi o le Feagaiga Tuai o iinā o le a tatou maua ai vaipuna ola e puna mai i le mea e iloa ai e le tagata faitau o ia ua na’o se toafa lava ona o lona fa’atalalē ma le fa’atamāla.” —*Education, p. 191.*

## 2. O LE ATOATOAGA O LE FOAFOAGA

- a. **O le ā le ituaiga o uiga ma le amio sa i ai i le ulua'i tane ma le fafine ina ua aumaia i la'ua i a'ao o Lē na Foafoaina i la'ua? Kenese 1:31; Failaūga 7:29.**

“Na tau'ave e le tagata le fa'atusa o le Atua, e lē gata i foliga va'aia i fafo ae fa'apea foi i ona uiga. Peita'i ua na'o Keriso lava 'o le fa'atusa moni lava lea' (Eperu 1:3) o le Tamā, auā o le fa'atusa o le Atua na faia ai le tagata. O lona natura sa ōgatūsa lelei ma le finagalo o le Atua. Sa mafai e lona mafaufau ona malamalama i mea fa'alelagi. Sa mamā ona manatunatuga; o ona fa'anaunauga ma ona mana'oga sa i lalo o le pule o le mafaufau. Sa paia ma fiafia i lō lā tauaveina o le fa'atusa o le Atua ma lā usiusita'i atoatoa atu i Lona finagalo.”—*Patriarchs and Prophets*, p. 45.

- e. **O le ā se mea na mana'omia ina ia tumau ai le aiga tagata i lenei tulaga lelei atoatoa ma ola ai e fa'avavau? Kenese 2:16, 17.**

“E le'i fa'aitiitia e Keriso ia folafolaga ma ta'utinoga o tulafono. O se gagana e lē fa'asesēina, ua Ia fa'aioa mai ai le usiusita'i i ai o le tulaga lea o le ola e fa'avavau, ma o le tulaga lava foi lea e tasi na mana'omia mai iā Atamu a'o le'i pa'ū o ia i le agasala. E lē itiiti ifo le fuafuaga a le Alii mo le tagata i le taimi lenei nai lo le mea na Ia fuafuaina mo le tagata i le Parataiso, i le usiusita'i atoatoa, ma le amiotonu e lē ponā. E tutusa lelei lava le mana'oga ma āiaiga na faia i Etena ma āiaiga e mana'omia ona faia i lalo o le feagaiga o le alofa tunoa ina ia mafai ona ōgatūsa ma le tulafono a le Atua, lea e paia, e tonu, ma lelei.”—*Christ's Object Lessons*, p. 391.

- i. **Talu ai ona ua “to'ilalo le tagata ma agasala, (Kenese 3), o ā ni tu'utu'uga oga'oga e lē gata mo o tatou ulua'i matua, ae mo augātupulaga uma lava? Roma 5:12; 6:23.**

“O le usiusita'i i le tulafono a le Atua, ua si'omia ai le tagata e pei o se pa e puipuia mai ai i le leaga. O lē na te soloia ma talepeina i lalo nei pā fa'alelagi i so'o se taimi lava, ua fa'aleagaina e ia lona malosi e puipuia mai ai o ia; auā ua ia tatalaina atu le faitoto'a e mafai ai e le fili ona ulufale atu ai i le fa'atafunaga ma le malaia.

“O le lē amana'iaina o le finagalo o le Atua i le isi itu, o iinā na tatalaina ai e o tatou ulua'i matua faitoto'a o puapuagā i le lalolagi. Ma o i latou uma o ē taumafai e mulimuli i le la fa'ata'ita'iga, o le a latou seleseleina fo'i se uiga fa'apenā. O le alofa o le Atua o lo'o fa'avae ai mataupu uma o Lana tulafono, ma o lē ua alu ese mai i poloāiga, ua na faia lona lava auala i fa'anoanoaga ma le malaia.”—*Thoughts From the Mount of Blessing*, p. 52.

### 3. UA FA'AMATALAINA LE AGASALA

- a. **Fa'apefea ona tatou iloa o le solitulafono a Atamu na a'afia ai le soliga o le tulafono a le Atua? Roma 7:7; fa'atusatusa i le Esoto 20:17; 1 Ioane 3:4.**

“O le to'atele ua latou a'oa'o atu e fa'apea, o le tulafono a le Atua e lē o noatia ai le tagata, ma latou fa'apea mai ai e lē mafai ona latou usiusita'i i ai i ona fa'avae. Ae afai e moni lenei mea, aiseā na mafatia ai Atamu i le fa'asalaga o le solitulafono? O le agasala a ō tatou ulua'i matua ua aumaia ai le sesē ma fa'anoanoa i le lalolagi, ana lē seanoa le agalelei ma le alofa tunoa o le Atua, semanū e goto ifo i le leai o se fa'amoemoe. Aua ne'i fa'asesēina se tasi. 'Auā o le totoi o le agasala o le oti' Roma 6:23. O le tulafono a le Atua, e lē mafai ona solia e aunoa ma se fa'asalaga i onapō nei, e pei o fa'asalaga i luga o le tamā o le aiga tagata.”—*Patriarchs and Prophets*, p. 61.

“A aunoa ma le tulafono, o se malamalama'aga tonu o tagata i le mamā ma le paia o le Atua, po ua malamalama foi i lo latou nofosala ai ma le tulaga lē mamā, semanū e leai fo'i so latou talitonuga moni e fa'atatau i le agasala ma latou lē lagonaina ai le mana'omia o le salamō. O le a latou lē vaa'ia lo latou tulaga moni lava i le aveva ai o i latou o ni tagata latou te solia le tulafono a le Atua, ma ua latou lē iloa ai lo latou tulaga mana'omia o le toto togiola o Keriso. Auā o le fa'amoemoega o le fa'aolataga o le taliaina lea e aunoa ma se fesuisuia'i o le loto po'o se toefuata'iga o le olaga. O nei liuaga papa'u matāutia, ua fa'apenā ona tu'ufa'atasia ai le anoanoa'i o tagata i le ekalesia o ē e le'i ia i se so'otaga ma Keriso.”—*Great Controversy*, p. 468.

- e. **Pe a tatou faitau i nei mau, e fa'apefea ona fa'ailoa mai e le Tusi Paia na afio moni lava Iesu e lavea'iina i tatou mai le soliga o le tulafono? Mataio 1:21.**

“Na maliu Keriso e lavea'iina Ona tagata mai a latou agasala, ma o le fa'aolataga iā Keriso, o lona uiga o le taofia lea o le soliga o le tulafono a le Atua ma tu'usāunoa mai ai i agasala uma; e leai se loto ua fa'aosofia i le ita i le Atua e mafai ona savavali fa'atasi ma Keriso, o Lē na puapuagātia i Kalevario ina ia fa'amaonia ai le si'itia ma le fa'aeaina o le tulafono i luma o le atulaulau.”—*Faith and Works*, p. 95.

“O lo'o ia i tatou Iesu o se uo agalelei, o Lē na afio mai e lavea'i Ona tagata mai le solitulafono. O le ā le agasala? E tasi lava le fa'auigaina o le agasala, o le soliga lea o le tulafono. A afio mai Iesu Keriso, o le a foa'iina mai e Ia Lana amiotonu mo i tatou; e lē mafai ona tatou manumāloina i lo tatou lava malosi, ae e ala i le fa'atuatua iā te Ia. Afai e te talitonu iā Iesu Keriso, o le a ē mauaina foi o Ia taimi i le asō. E tatau ona e talitonu nei o Ia lava o lou Fa'aola, o le a Ia foa'iina mai iā te oe Lana amiotonu e ala i Lona maliu, ona sa Ia usiusita'i i mana'oga uma o le tulafono a le Atua lea na solia e le tagata. Afai e te faia lenei mea, o le a iloa e lavea'iina ai e ala iā Iesu Keriso. Na leiloa e Atamu ma Eva ia Etena ona o le solia o lenā tulafono, ae o le a lē iloa e oe le lagi pe afai e te solia.”—*The Ellen G. White 1888 Materials*, p. 128.

#### 4. O LE TAMĀ O E FA'ATUATUA

- a. **Aiseā ua avea ai le pateriaka o le Feagaiga Tuai o Aperaaamo ma tagata lauiloa o le tamā o le 'au fa'atuatua? Kalatia 3:6-9.**

---

“O tofotofoga na o’o iā Aperaaamo o ni tofotofoga aupito i sili ia ona oga’oga e mafai ona o’o i tagata ola. Ana se mea e to’ilalo o ia i lalo o le tulafono, semanū e lē mafai ona ta’ua o ia o le tamā o le ‘au fa’atuatua. Ana se mea foi na ia liliu ese mai i le fa’atonuga a le Atua, semanū ua lē iloa e le lalolagi se fa’aa’oa’oga fa’aeaina o le fa’atuatua ma le tulaga lē māfesiligia o le usiusita’i. O se lesona lava lenei na tu’uina mai ina ia fa’apea ona fa’aalia atu lona pupula i augātupulaga uma, ina ia tatou iloa ai e leai se mea e sili atu ona tāua e tu’uina atu i le Atua. Pe afai tatou te va’ava’ai atu i meaālofa uma a le Alii, ina ia fa’aaogāina mo Lana galuega, ma ia tatou o ni fa’amanuiaga fa’alelagi. Ia toe fa’afou’i atu i le Atua lou ‘oa ua tu’uina atu, ona fa’aopoopoina atu ai lea o mea iā te oe. O lou taofia o mea ua iā te oe, o le a e lē maua ai se tau i le olaga nei, ma o le a aveesea ma ē leiloa ai le tau mo le olaga a sau.”—*The SDA Bible Commentary [E.G. White Comments], vol. p. 1094.*

“O le nofoaga lea na fausia ai le malumalu na manatu tagata o se nofoaga paia lea. Auā o iinā lea na fa’aalia ai e Aperaaamo, le tamā o le ‘au fa’atuatua lona naunau i le ofoina atu o lona atali’i e to’atasi ona o lona usiusita’i i le fa’atonuga a Ieova. O iinei na toe fa’afou ai e le Atua le feagaiga ma Aperaaamo, e aofia ai ma le folafolaga e uiga i le Mesia mo le fanau a tagata i le lavea’iga lea e ala i le taulaga a le Alo o Lē Silisili Ese.”—*Prophets and Kings, p. 37.*

- e. **Na fa’apefea ona fa’ailoaina mai i le folafolaga o le talalelei o le fanau na folafola mai e o’o lava i le taimi o Aperaaamo? Kenese 22:15-18; Kalatia 3:16.**

---

“O le feagaiga lava lenei na fa’afouina iā Aperaaamo i le folafolaga, ‘O lau fanau e manuia ai atunu’u uma lava o le lalolagi’ Kenese 22:18. O lenei folafolaga sa fa’asino atu lea iā Keriso. Na malamalama iā Aperaaamo, (vaai le Kalatia 3:8,16), ma ia fa’alagolago atu ai iā Keriso mo le fa’amagaloina o agasala. O le fa’atuatua lea na ta’ua iā te ia o lē amiotonu. O le feagaiga ma Aperaaamo na fa’atumauina ai foi ma le pule a le tulafono a le Atua.”—*Patriarchs and Prophets, p. 370.*

- i. **Aiseā na filifilia ai Aperaaamo o sē na mauaina le talalelei, a ua lē o se tasi nai le to’atele o isi i lona taimi? Kenese 26:5; Iakopo 2:19-24.**

---

“Na talitonu Aperaaamo i le Atua. E fa’apefea ona tatou iloa na talitonu? O ana galuega na molimau i lona olaga fa’atuatua, o lona fa’atuatua na ta’ua ai iā te ia o lē amiotonu.”—*The SDA Bible Commentary [E.G. White Comments], vol. 7, p. 936.*

## 5. O LE TULAFONO I ASO O LE FEAGAIGA TUAI

- a. O ā nisi fa'ata'ita'iga po'o fa'aa'oa'oga o lo'o iā i tatou e iloa ai sa i ai le tulafono a'o le'i fetalai mai e le Atua le tulafono i luga o le mauga o Sinai (Teuteronomie 5:22-26)? Esoto 15:26; 16:28.

“O vaiaso uma lava na latou aumau ai i le vao i se taimi umi, na molimauina ai e Israelu se vavega sātuatolu, ma na fuafuaina ina ia si'itia a'e ai o latou mafaufau i le paia o le Sapati: a o'o i le aso lona ono ona fa'alua lea ona pa'ū le manai, auā e leai se mea e pa'ū i le aso lona fitu, ma o le vaega lea na mana'omia ona teuina mo le aso Sapati sa lelei atoatoa ma leai se leaga na i ai, ana fai na tu'u mo se isi taimi o lona uiga ua lē aogā mo lona fa'aaogāina.

“I le tulaga e pei ona i ai le feso'ota'iga i le tu'uina atu o le manai, ua aumaia ai i a'i tatou se fa'amaoniga maumaututū, e le'i fa'apea na fa'atoā fa'avaeina le Sapati ina ua tu'uina mai le tulafono i Sinai, e pei ona fai mai ai le to'atele. A'o le'i o'o i le taimi o le fanauga a Israelu i Sinai, na latou malamalama lelei o le Sapati o se mea na fa'atonuina iā i latou. Na fa'atonuina i latou ia fa'aputuina le manai i aso Faraile uma e fa'alua ona fa'aputu mo le sauniuniga o le Sapati, afai e leai se mea e paū, o le natura paia auā o le aso e malolo ai na fa'aauau pea ona tausaiaina. Ina ua o atu nisi o le nu'u i le Sapati e fa'aputu le manai, na fetalai mai Ieova, 'Tou te lē mafafai ea ona tausiusi i A'u poloa'iga ma A'u tulafono se'ia āfea?'—*Patriarchs and Prophets*, pp. 296, 297.

- e. O le ā se mea na finagalo le Atua mo Israelu ia faia e pei ona Ia fetalai ma tusiaina o tulafono tau i le amio o Poloa'iga e Sefulu? Teuteronomie 6:1-9.

- i. E fa'apefea ona tatou iloa na fa'atumauina e Ieova lea tulaga mai le auala na sau a'i se'ia o'o mai lava i le i'uga o le Feagaiga Tuai? Malaki 4:4; 3:6.

## FESILI TOE FA'AMANATU

1. Fa'apefea ona fa'atatau mataupu fa'avae o le talafa'asolopito o le Tusi Paia i o tatou taimi?
2. O le ā se mana'oga talu mai Etena o lo'o fa'aalia ai o le Atua e lē liliu lava?
3. O le a le fa'apogai o le affio mai o Iesu i leni lalolagi e fa'atatau i le fa'afitāuli o le agasala?
4. Na fa'apefea ona fa'aalia le fa'atuatua o Aperamo i ana galuega?
5. O le ā la tatou so'otaga po'o le faia e tatau ona i ai ma le tulafono a le Atua?

## O le Tulafono e Fa'avavau a le Atua

**MAU AUTŪ:** “Auā o lenei lava le alofa i le Atua, ia tatou tausi i ana poloa'iga; e lē mamafa foi ana poloa'iga” (1 Ioane 5:3).

“Ua fa'atonu mai e [Keriso] iā i tatou ia feālolofoa'i le tasi i le isi e pei ona Ia alofa mai iā i tatou. O Tapua'iga e fa'avae i luga o le alofa i le Atua, lea e ta'ita'ia atu ai fo'i i tatou ia feālolofoa'i. E tumu i le loto fa'afetai, lotomauualalo, ma le fa'apalepale. O le fa'ataulaga'ofoina o le tagata lava ia, onosa'i, alofa mutimutivale, ma le loto fa'amagalo. E fa'apa'iaina ai le olaga atoa ma fa'alautele atu ai le a'afiaga e fa'aosofia ai nisi.”—*Testimonies for the Church, vol. 4, p. 223.*

**Faitauga Fautuaina:** *Patriarchs and Prophets, pp. 303-314.*

*Ulua'i Aso*

*Fepuari 5*

### 1. O LĒ NA FOAFOAINA MEA E LĒ MAFAI ONA SUIA

a. O le ā se mea e tatau ona tatou iloa e uiga i le so'otaga a Keriso ma le tulafono o le amio a le Atua a'o soifua ai o Ia i lenei lalolagi o le Atali'i o le tagata? Mataio 5:17, 18.

e. Fa'apefea ona ta'ita'ia fa'apitoa e ta'ita'i o Iutaia le tausiana i fafo o le tulafono? Mataio 23:23; Filipi 3:4.

“[O ta'ita'i Iutaia] sa maēlegā e fa'amautūina foliga o le paia, ae latou tu'ulafoāiina le paia o le loto. A o avea i latou ma tagata e pipi'i mau i le tusi o le tulafono, sa latou solia pea lona agaga. O lo latou mana'oga tele o le suiga lava lea na fa'amalamalama atu e Keriso iā Nikotemo—le fanaufouina o le amio, o le fa'amamāina mai i agasala, ma le fa'afouina o le mālamalama'aga ma le paia.”—*The Desire of Ages, p. 174.*

i. O le ā e mafai ona tatou maitauina i le fa'amasinoga o Iesu e fa'aalia ai e lē o Ia o se tagata solitulafono? Mataio 26:59, 60.

“E le'i solia foi e le Fa'aola po o ē na mulimuli iā te Ia le tulafono o le Sapati. O Keriso o se sui ola o le tulafono. E leai se soligātulafono o tusitusiga paia na maua i Lona soifua'aga. I le va'ava'ai atu i molimau o se malo o ē na saili se avanoa e fa'asala ai o Ia, sa mafai ai ona Ia fetalai mai e aunoa ma se tete'e. ‘O ai ea so outou na te ta'utino mai sa'u agasala?’ Ioane 8:46, R.V.”—*Ibid., p. 287.*

## 2. O LE TULAFONO I LE FINAGALO O IESU

### a. O le ā sa sauniaina mo Iesu ina ua Ia afio mai i le lalolagi? Eperu 10:5-10.

“E le o se avanoa, ae o se fuafuaga ina ia tu’u’ese e le Togiola o le lalolagi Lona paleali’i, tu’u’ese Lona ofu tautupu, ae afio mai i lo tatou lalolagi o se tagata. Na Ia fa’aofuina Lona paia i le ufiufi o le tino tagata, ina ia tula’i o Ia o le ulu o le aiga tagata, o Lona tagata soifua ua fefiloi fa’atasi ma tagata o le tupulaga ua pau’ū ona o le lē usiusita’i o Atamu.”—*Southern Work*, p. 85.

### e. Pe a tatou faitau i le soāfuaitau lava lea e i le Feagaiga Tuai e uiga ia Keriso, o le a le mea na valoia e i ai i Lona finagalo? Salamo 40:6–8.

“O le soliga o le tulafono e i’u atu ai i le agasala, fa’anoanoa, ma le oti. Na folafola atu e Satani o le a ia fa’amaonia atu i lalolagi na foafoaina e le Atua, ma ē atamai fa’alelagi, o se mea e lē mafaia ona fai le tausiaina lea o le tulafono a le Atua. Ina ua gaua’i atu Atamu i le fa’asoosoga a le fili, ma pa’ū ese mai lona tulaga maualuga ma paia, sa olioli Satani ma ana agelu. Peitai na fa’alogoina mai i le nofoali’i o le Atua se si’ufofoga o fetalai mai i upu e uiga ese. [Salamo 40:6-8 ia si’itiaina.] Ina ua paū le tagata, na fofogaina mai ai e Keriso Lona finagalo o le avea ma sui ma mautinoāga mo le tagata.”—*The Review and Herald*, September 3, 1901.

### i. Pe a tatou taliaina Keriso i totonu o ō tatou loto, o le ā le mea o lo’o tatou taliaina i se auala faigofie fa’atasi ma Ia? Salamo 119:70, 72, 77, 174.

“O le amo e fusifusia ai le auauna atu, o le tulafono lea a le Atua. O le tulafono sili o le alofa na fa’aalia i Etena, na folafolaina atu i luga o Sinai, ma le feagaiga fou ua tusia i le loto, o le tulafono lea e fusia ai le tagata faigaluega i le finagalo o le Atua. Afai e tu’ua i tatou e mulimuli i o tatou lava fa’anaunauga, e ō atu i le mea tonu o le a ta’ita’i atu i ai i tatou e o tatou loto, e tataua ona tatou pau’ū atu i vaega ‘au a Satani ma avea ai ma e ē mauaina ona uiga. O le mea lea e taōfi’ofia ai i tatou e le Atua i Lona finagalo, lea e maualuga, mamalu, ma fa’aeaina. E finagalo o Ia ina ia tatou tauaveina ma le onosa’i ma le potu tiute o le auauna atu. O le amo o le auaunaga ua amoina e Keriso lava Ia i le tino tagata.”—*The Desire of Ages*, p. 329.

“O le amiotonu o le paia lea, e foliga i le Atua, ma ‘o le Atua o le alofa lava ia.’ 1 Ioane 4:16. E ōgatasi ma le tulafono a le Atua, ‘aua ua tonu Au poloāiga uma lava’ (Salamo 119:172), ma ‘o le alofa o le atoatoa lea o le tulafono’ (Roma 13:10). O le amiotonu o le alofa lea, ma o le alofa o le malamalama ma le soifua’aga o le Atua. O le amiotonu a le Atua ua fa’aalitino mai iā Keriso. Tatou te maua le amiotonu e ala i le taliaina o Ia.”—*Thoughts From the Mount of Blessing*, p. 18.

### 3. E TUSA AI MA LE TULAFONO MA ‘AU PEROFETA

- a. **Ina ua fa’amatala atu e Iesu i le ‘au so’o o Lona soifua’aga o se fa’amaoniga ola lea o Ia o le Mesia, o ā mau na Ia fa’aaogāina? Luka 24:27, 44.**
- 
- 

“O Lona fa’amoemoega o le fa’amalamalamaina o lo latou malamalama ma fa’amau atu lo latou fa’atuatua i le ‘upu mautinoa o le valoaga.’ Na Ia finagalo ina ia maua’ a le upumoni i o latou mafaufau, ae e lē na o le lagolagoina e ala i Lana lava molimau patino, ae ona o fa’amaoniga e lē māfesiligia ua tu’uina mai e fa’atusa ma ata o le tulafono masani, ma valoaga o le Feagaiga Tuai. Sa mana’omia e so’o o Keriso ona i ai se fa’atuatuga poto, e le gata mo i latou lava, ae ina ia mafai ai ona latou aveina atu le malamalama o Keriso i le lalolagi, na fa’asino atu ai e Iesu le au so’o iā ‘Mose ma perofeta uma.’ O le molimau lenā na tu’uina mai e le Fa’aola toetū i le aogā ma le tāua o Tusitusiga Paia o le Feagaiga Tuai.”—*The Great Controversy*, p. 349.

- e. **Fa’apefea ona fa’amaonia e le ‘au so’o, a o latou tala’ia le fe’au o le tala lelei, o Iesu o Lē na folafolaina mai? Galuega 28:23.**
- 
- 

“Na fa’atasi le Agaga o le Atua i upu na fetalai mai, ma sa o’otia ai o latou loto. O le olega a le ‘au aposetolo i valoaga o le Feagaiga Tuai, ma o lana ta’utinoga ua fa’ataunu’uina nei mea uma i le galuega a Iesu le Nasareta, na aumaia ai le talitonuga i le to’atele o tagata o lo’o mo’omo’o mo le afio mai o le Mesia folafolaina. Ma o upu fa’amautinoa a le failaūga e fa’apea o le ‘tala fiafia’ o le fa’aolataga sa mo Iutaia ma Nu’u’ese, na aumaia ai le fa’amoemoe ma le olioli iā i latou o e ē le’i faitaulia fa’atasi ma fanau a Aperamo e tusa ma la le tino.”—*The Acts of the Apostles*, i. 172, 173.

“I le lauga atu ai o Paulo i tagata Tesalonia, na talosaga atu ai Paulo i valoaga o le Feagaiga Tuai e uiga i le Mesia. O Keriso i Lana galuega na tatalaina ai mafaufau o Ona so’o i nei valoaga; ‘ua amata mai iā Mose ma le ‘au perofeta uma, ona fa’amatala ai lea e Ia iā te i latou o mea ua tusia iā te Ia i Tusitusiga uma,’ Luka 24:27. I le tala’iga o Keriso e Peteru na ia aumaia ai ana fa’amaoniga mai le Feagaiga Tuai. Sa mulimuli foi Setefano i le ala lava lea e tasi. Ma o Paulo foi i lana tala’iga na talosaga atu ai i tusitusiga paia o lo’o valoia ai le fanau mai, o puapuagā, o le maliu, toetū, ma le afio a’e o Keriso i le lagi. E ala i le molimau musuia a Mose ma perofeta sa ia fa’amaonia ai ma le manino le fa’asinomaga o Iesu le Nasareta fa’atasi ma le Mesia ma fa’ailoa mai ai talu mai onapō o Atamu o le si’ufofoga lava o Keriso lea na fetalai mai e ala i pateriaka ma perofeta.”—*Ibid.*, pp. 221, 222.



#### 4. TULAFONO MA LE FA'ATUATUA

- a. Pe o le tu'uina atu ea o lo tatou fa'atuatua iā Iesu o lo tatou Fa'aola patino ua aveesea ai le tulafono? Aiseā pe aiseā e leai ai? Roma 3:31.
- 
- 

- e. O le a le fa'amanuiaga ua fofogaina mai i luga o e tausia poloa'iga? Fa'aaliga 22:14.
- 
- 

“O le solia o poloa'iga a le Atua na o'o mai ai se fetu'u i luga o Atamu ma Eva, ma sa aveesea uma mai ai iā i la'ua lo la aiā tatau i le laau o le ola. Na maliu Keriso e fa'aolaina ai le tagata, ae na ia fa'asoina le mamalu o le tulafono a le Atua. Ua Ia fetalai mai 'Amuia i latou o e fai Ana poloa'iga ina ia tāga iā i latou le laau o le ola, ma ia ulu atu ai i le A'ai i ona faitoto'a.' Ua fa'ailoa mai iinei e le Alo o le Atua o le faia o poloa'iga a le Atua o le tulaga lea o le a tatou maua ai le aiā tatau i le laau o le ola. O le solia o poloa'iga a le Atua na aveesea mai ai i le tagata le aiā tatau i le laau o le ola. Na maliu Keriso, ina ia mafaia ai e ala i Lona toto, o le usiusita'i i le tulafono a le Atua e mafai ai ona agava'a le tagata mo le vi'iga fa'alelagi, ma toe tu'uina atu ai iā te ia le aiā tatau lea i le laau o le ola.”—*Spiritual Gifts, vol. 3, p. 88.*

“Sa si'omia i matou e agelu a o matou savavali atu i luga o le sami tioata i le faitoto'a o le a'ai. Ua si'i a'e e Iesu Lona a'ao malosi ma le mamalu, ma tago atu i le faitotoā penina, ma toe sulu i ona so'oga feīlafi, ma fetalai mai iā i matou, 'Ua outou ta o outou ofu i Lo'u toto, ua outou tutumau mo La'u upu moni, ulu maia i totonu. Sa matou savavali atu i totonu ma lagona ua iā i matou se aiā tatau atoatoa i totonu o le a'ai.”—*Early Writings, p. 17.*

- i. E fa'aapefea ona fa'aalia e lenei mea le Atua e lē suia lava? Eperu 13:8.
- 
- 

“E faia e Iesu mea tetele mo i tatou, pe afai tatou te faia ma le fa'amaoni o tatou tiute. E tatau ona gaua'i atu o tatou loto i le finagalo o le Atua. E tatau ona tatou ava ma fa'amamaluina le Alii e ala i le usiusita'i i Ana poloa'iga uma, e o'o lava i mea tatou te ta'ua o mea laiti. O le upu moni, e pei o lona Tusitala paia, e lē māsua i ona mana'oga, e tutusa lava ananafi, o le asō, ma le fa'avavau. E le ōgatasi ma tū ma aga a tagata, e lē ōgatūsa ma o latou manatu. Ua aumaia e le upu moni se vavae'ese i le va o tagata o le Atua ma le lalolagi. Ae afai na fa'amaonia e le Atua lo tatou tulaga i tausaga ua mavae, o se nu'u uiga ese, e fa'aapefea la ona Ia silasila mai i lo tatou tulaga i le taimi nei? Pe ua tatou maua ea le fa'alēagaga talu ona tatou ō ese mai lo tatou olaga faigofie?”—*The Signs of the Times, Me 25, 1882.*

## 5. TUSIAINA I LE LOTO

- a. **E mafai fa’apefea ona i ai le tulafono a le Atua i o tatou olaga i le auala lava lea e tasi na iā e Iesu? Eperu 10:16; 8:10.**

“Ua tu’uina mai e le Atua iā i tatou Ana poloa’iga paia, auā e alofa o Ia i tagata. Ina ia puipuia i tatou mai taunu’uga o le solitulafono, ma ua Ia fa’aalia mai ai mataupu fa’avae o le amiotonu. O le tulafono o se fa’ailoaga o le finagalo o le Atua; pe a talia Keriso, e avea ma o tatou manatu. E si’itia a’e ai i tatou i luga a’e o le malosi o mana’oga fa’alēnatura ma tu’inanauga, i luga a’e o fa’aosoosoga e ta’ita’iina atu i le agasala.”—*The Desire of Ages*, p. 308.

- e. **O le ā le mea ua fa’aali mai e le Atua iā i tatou ae tatou te le’i amataina lenei malaga fa’alelagi? 1 Ioane 4:19, 8.**

“Sa pogisa le lalolagi ona o le lē malamalama i le Atua. Ina ia mafai ona ave’esea le pogisa, ina ia mafai ona toe fa’afo’i atu le lalolagi i le Atua, o le a fa’aumatia ai le malosi taufa’asesē o Satani. E lē mafai ona faia fa’amalosi lenei mea. O le fa’aaogaina o le malosiaga e fete’ena’i ma mataupu fa’avae o le malo o le Atua; E na o le auauna atu lava o le alofa e fa’anaunau i ai o Ia; ma e lē mafai ona poloa’iina le alofa; e lē mafai ona manumalo ai i le fa’amalosi po o le pule. E na o le alofa lava e fāgua ai le alofa. O le iloa o le Atua o le alofa lea ia te Ia; O Ona uiga e tataua ona fa’aalia e ese mamao mai i uiga o Satani. O lenei galuega e na o le to’atasi lava le Tagata i le atulaulau uma e mafai ona faia. E na o Ia lava na te silafia le maualuga ma le loloto o le alofa o le Atua na te mafaia ona fa’ailoa mai.”—*Ibid.*, p. 22.

- i. **O le ā se mea e mafai pe a uma ona i ai lenei alofa o le Atua i o tatou loto? Ioane 14:15-17.**

## FESILI TOE FA’AMANATU

1. **Fa’apefea ona fa’atumauiina e Iesu le amio a le Atua a o soifua i le tino tagata?**
2. **Fa’apefea ona fa’aalia le uiga tutusa o Keriso i tagata talitonu moni?**
3. **Ina ia talitonu moni o Iesu o le Mesia, o ā valoaga e tataua ona tatou iloa lelei?**
4. **Fa’apefea ona maua e tagata agasala le aiā tataua i le laau o le ola lea na taofia ai i latou e le agasala?**
5. **O le ā le auala e tasi e mafai ai ona tatou maua le usiusita’i fa’amaoni?**

## O Le Mea Lilo o le Talalelei

**MAU AUTŪ:** “Na finagalo foi le Atua ona fa’ailoa atu i ai le uiga o le silisili o le lelei o lenei upu lilo o i nu’u ese, o Keriso lea o lo’o iā te outou o le fa’amoemoe i le manuia” (Kolose 1:27).

“E mafai lava ona tatou malamalama i Lana feūtana’iga ma i tatou, ma le fa’amoemoega o lo’o galue ai o Ia, ina ia tatou iloaitino ai le alofa le fa’atuāoia ma le alofa mutimutivale ua tu’ufa’atasia i le mana e lē gata mai. E mafai ona tatou malamalama i le tele o Ona fa’amoemoega mo lo tatou lelei ia iloa; ma i tua atu o lenei, e tatau ona tatou fa’alagolago i le malosi o le Silisiliese, le alofa ma le poto o le Tamā ma le Pule Silisili Ese o tagata uma.”—*Testimonies for the Church, vol. 5, p. 699.*

**Faitauga Fautuaina:** *Education, pp. 169–172.*

*Ulua’i Aso*

*Fepuari 12*

### 1. TUSITUSIGA PAIA E FAIGATA ONA MALAMALAMA I AI

- a. **O le ā na maitauina e Peteru e uiga i nisi o tusitusiga a Paulo? 2 Peteru 3:14–17. O le ā e tatau ona tatou iloa e fa’atatau i nisi o mea o lo’o i le Tusi Paia? Teuteronome 29:29.**

---

“O alii agava’a ua tu’utōina atu le olaga atoa i su’esu’ega ma tatalo i le su’esu’eina o le Tusi Paia, ae e tele lava vaega o le Tusi Paia e le’i su’esu’eina atoatoa. O nisi mau o le Tusi Paia o le a lē mafai lava ona malamalama atoatoa i ai se’ia o’o lava i le olaga amulī o le a fa’amalamalamaina ai e Keriso i latou. E i ai mea lilo e tatau ona fofola, ma o fa’amatalaga e lē mafai ona ōgatūsa ma mafaufau o tagata. Ma o le a taumafai le fili e fa’atupu finauga i luga o nei manatu, ma o lea e sili ai ona tumau pea i le lē talanoaina.”—*Gospel Workers, p. 312.*

- e. **O le ā le uiga e tatau ona tatou fa’asoa atu ai i le Tusi Paia? Ioane 7:17.**

---

“O le agaga lea o le a ē sau ai i le su’esu’eina o Tusitusiga Paia o le a iloa ai uiga o le fesoasoani o lo’o i ou autafa. O le a fa’atasi agelu mai le lalolagi o le malamalama ma i latou o ē saili ma le lotomauualalo mo le ta’ita’iga fa’alelagi. Ae afai e tatalaina le Tusi Paia ma le lē migao, fa’atasi ai ma se lagona o le fa’amalieina o le tagata lava ia, afai e tumu le loto i le fa’ailoga tagata, o le a i ai Satani i ou tafatafa, ma o le a ia tu’uina atu fa’amatalaga manino o le afioga a le Atua i se malamalama fa’api’opi’o.”—*Testimonies to Ministers, p. 108.*

## 2. ILOAINA O MEA LILO

- a. **O ā mea patino na fa’ailoa atu e le Atua iā Paulo mo le fa’amoemoe e tufa ma fa’asoa atu i isi tagata i le lalolagi atoa? Roma 16:25, 26; Kolose 1:27.**

---

“Iā Paulo o le satauro o le tasi lea o ona fa’amoemoega sili ona fiafia i ai. Talu mai lava ona saisaitia o ia i lana galuega o sauaga e fa’asaga i ē na mulimuli i le tagata Nasareta na fa’asatauroina, e le’i muta lava lona mitamita i le satauro. O le taimi lenā na tu’uina atu ai iā te ia se fa’aaliga o le alofa e lē mafa’atusalia o le Atua, e pei ona fa’aalia i le maliu o Keriso; ma sa i ai se suiga ofoofogia na galueāina i lona olaga, i le aumaia o ana fuafuaga uma ma fa’amoemoega ina ia ōgatasi ma le lagi. Ma i lena itula sa avea o ia ma se tagata fou iā Keriso. Sa Ia silafia e ala i a’afiaga patino e fa’apea, pe a mafai ona iloa e se tagata agasala le alofa o le Tama, e pei ona va’aia i le taulaga a Lona Alo, ma gaua’i i le ūna’iga paia, o le a o’o ai se suiga fou i le loto, mai i lea lava taimi ua na’o mea uma o Keriso ma ia i mea uma.”—*The Acts of the Apostles*, p. 245.

- e. **Pe afai e faigatā ona malamalama i se mea o lo’o i le Tusi Paia, aiseā e tatau ai ona tatou taumafai e sa’iliili i mataupu? 2 Timoteo 3:16, 17.**

---

“O le satauro o Keriso ua ufitia uma lava i le fa’alumaina ma le ma’asiasi, ae o le fa’amoemoega o le ola ma le fa’aeaina i le tagata. E leai se tasi e mafai ona malamalama i le mealilo o le amioatua pe a ma’asiasi o ia e tau’ave le satauro o Keriso. E leai se tasi e mafai ona iloaitino ma talisapaia fa’amanuiaga ua fa’atauina e Keriso mo le tagata i se tau e lē mafa’atusalia iā te Ia lava, se’ivagana ua latou naunau e fa’ataulagafo ma le olioli ‘oa fa’alelalolagi ina ia mafai ai ona avea i latou ma Ona so’o. O olaga fa’afitia ma taulaga ofo na faia mo Keriso e fa’atamāoa’igaina ai lē na te foa’i atu, ma o puapuagā uma ma le fa’alumaina na onosa’ia mo Lona suafa pele e fa’atupuina ai le olioli mulimuli ma le tau i le ola pea i le malo mamalu.”—*Confrontation*, p. 93.

- i. **Fa’amatala mea tatou te mana’omia ina ia maua se i’uga sa’o. Ioane 16:13.**

---

“A aunoa ma le ta’ita’iga a le Agaga Paia o le a fa’aauau pea ona tatou taumafai e fa’auiga ese ia tutusa ma o tatou manatu ia Tusitusiga Paia pe fa’auiga sesē foi. O le tele e manatu o le faitauina o le Tusi Paia e leai se aogā, ma i le tele o vaega, o le a i ai ona taunu’uga lelei. Pe a tatalaina le afioga a le Atua e aunoa ma le migao ma le aunoa ma le tatalo; pe a lē taula’i atu mafaufauga ma lagona alofa i le Atua po o le ōgatasi ma Lona finagalo, o le a fa’apogisaīna le mafaufau i le masalosalo; ma i le su’esu’eina lava o le Tusi Paia, e fa’amalosia ai le masalosalo. E pulea e le fili mafaufauga, ma na te fautuaina ni fa’auigana e lē sa’o.”—*Testimonies for the Church*, vol. 5, pp. 704, 705.

### 3. O LE TULAFONO SILISILI TAU I LE AMIO

- a. **E ese mai le talitonuga masani, e fa’apefea ona tatou iloa o le tulafono o Poloa’iga e Sefulu e le’i aveesea i luga o le satauro? Iakopo 2:8, 9.**

“E toatele faia’oga fa’alēlotu ua ta’utino mai o Keriso, e ala i Lona maliu na fa’aumatia ai le tulafono, ma ua sa’oloto tagata mai ona tulaga mana’omia. E i ai nisi ua fa’atusaina i ai o se avega mamafa, ma e ese mai le nofo pologa o le tulafono ua latou tu’uina mai le sa’olotoga e olioli ai i lalo o le talalelei.

“Ae sa lē fa’apea manatu o perofeta ma aposetolo i le tulafono paia a le Atua. Fai mai Tavita: ‘Ou te savali foi i le mea lautele; auā ua ou saili i ‘au feau.’ Salamo 119:45. O le aposetolo o Iakopo, o lē na tusia ‘ina ua mavae le maliu o Keriso, e fa’asino atu i le tu’ufa’atasia o Poloa’iga e sefulu o ‘le tulafono silisili’ ma ‘le tulafono o le sa’olotoga ua atoatoa ona lelei.’ Iakopo 2:8; 1:25. Ma o le tali-fa’aaliga, o le afa seneturi talu ona mavae le fa’asatauroga, na folafola mai ai se fa’amanuiaga i luga o i latou ‘o ē faia Ana poloa’iga, ina ia latou maua le aiā tataui i le la’au o le ola, ma ia ulu atu i le a’ai i ona faitoto’a.’ Fa’aaliga 22:14.”—*The Great Controversy*, p. 466.

“Pe a gaua’i ma tu’uina atu se tasi iā Keriso, o le a aumaia ai le mafaufau i lalo o le puleāga o le tulafono; ae o le tulafono silisili, lea ua folafola atu ai le sa’olotoga i tagata uma ua fa’atagataotauaina. O le tasi ma Keriso, ua fa’asa’olotoina ai le tagata. O le usiusita’i i le finagalo o Keriso o lona uiga o le toefuata’iga lea i le tulaga atoatoa o le tagata.”—*The Ministry of Healing*, p. 131.

- e. **O le fea o tulafono o lo’o fa’amatalaina ai le alofa i o tatou tuaoi e pei o i tatou lava? Roma 13:9; fa’atusatusa i le Esoto 20:1–17.**

“O ulua’i poloa’iga e fa, o Poloa’iga e Sefulu, o lo’o aoteleina i le poloa’iga sili e tasi, ‘E te alofa atu i le Alii lou Atua ma lou loto atoa.’ O le isi ono mulimuli o loo aofia i le isi, ‘E te alofa atu i le lua te tuāoi ia pei o oe lava iā te oe.’ O nei poloa’iga uma e lua o se fa’ailoaga lea o le matāupu fa’avae o le alofa. E lē mafai ona tausia le muamua ae fa’alēaogāina le lona lua, e lē mafai foi ona tausia le lona lua ae fa’alēaogāina le muamua. Pe a i ai i le Atua Lona tulaga tonu i le nofoali’i o le loto, o le a tu’uina atu le nofoaga sa’o i o tatou tuāoi. O le a alolofa iā te Ia e fa’apei o i tatou lava. Ma e na o lo tatou alolofa atoatoa i le Atua e mafai ai ona tatou alolofa i o tatou tuāoi ma le lē fa’ailoga tagata. . . .

“Na a’oa’o atu Keriso i Ona tagata fa’alogologo e fa’apea o le tulafono a le Atua e lē tele ni mataupu ese’ese, o nisi o nā mataupu e tāua tele, ae o isi e fa’atauva’a lo latou tāua ma e ono lē amana’iaina ma lē fa’asalaina. Ua tu’uina mai e lo tatou Alii poloa’iga muamua e fa ma poloa’iga mulimuli e ono o se ato’atoāga paia, ma a’oa’o mai ai le alofa i le Atua o le a fa’aalia e ala i le usiusita’i i Ana poloa’iga uma.”—*The Desire of Ages*, p. 607.

#### 4. FA'AMASINOINA I LE TULAFONO

- a. **Fa'amatala le tulaga mamao o le fa'amasinoga i luga o tagata. Failaūga 11:9; Roma 14:10; 2 Korinito 5:10; Eperu 9:27.**
- 
- 

“O le a fa'amasinoina tagata uma e tusa ma le malamalama ua tu'uina atu i ai. E auina atu e le Alii Ana amepasa ma se savali o le fa'aolataga, ma o i latou o ē fa'alogo o le a Ia tali atu i le ala latou te taulimaina ai upu a Ana auuina. O i latou o ē saili ma le fa'amaoni mo le upumoni o le a faia se su'esu'ega ma le fa'aeteete, i le malamalama o le afioga a le Atua, i a'oa'oga fa'avae ua tu'uina atu ia i latou.”—*The Acts of the Apostles*, p. 232.

- e. **O le ā le fa'atūlagana o le a fa'aaogā i le fa'amasinoga? Iakopo 2:12.**
- 
- 

- i. **O lē fea o tulafono nei? Iakopo 2:11; fa'atusatusa i le Esoto 20.**
- 
- 

“I Ana a'oa'oga, na fa'aalia ai e Keriso le mamao e o'o i mataupu fa'avae o le tulafono na tautalagia mai i Sinai. Na Ia faia se fa'atatauga ola o lenā tulafono o ona mataupu fa'avae e tumau pea e fa'avavau o le tagāvai lea o le amiotonu—o le tagāvai lea e fa'amasinoina ai tagata uma i lenā aso pe a nofoia le fa'amasinoga, ma o le a tatalaina tusi.”—*Selected Messages*, bk. 1, p. 211.

“O le tulafono a le Atua o le tulaga lea o le a tofotofoina ai olaga o tagata i le fa'amasinoga. Fai mai le tagata poto: ‘Ia e mata'u i le Atua, ma e ana'ana i Ana poloa'iga; auā o mea ia e tatau i tagata uma. Auā e fa'amasinoina e le Atua galuega uma lava.’ Failaūga 12:13, 14. Ua apoapoa'i atu le aposetolo o Iakopo i ona uso: ‘Fa'apei ona outou tautatala, ia fa'apea foi ona outou faia, pei o ē a fa'amasinoina i le tulafono o le sa'olotoga.’ Iakopo 2:12.”—*The Great Controversy*, p. 482.

“Pe a nofoia le fa'amasinoga, ma tatalaina tusi, ma o le a fa'amasinoina tagata ta'ito'atasi e tusa ma mea ua tusia i tusi, ona tu'uina mai ai lea o papama'a, na nātia e le Atua se'ia o'o i lenā aso, o le a tu'uina atu ai i luma o le lalolagi e fai ma tagāvai o le amiotonu. Ona iloa ai lea e alii ma tamaita'i o le tulaga mana'omia o lo latou fa'aolataga o le usiusita'i lea i le tulafono atoatoa a le Atua. E leai se tasi o le a i ai se 'alofaga mo le agasala. E ala i mataupu fa'avae amiotonu o lenā tulafono, o le a maua ai e tagata lo latou fa'asalaga o le ola po o le oti.”—*Selected Messages*, bk. 1, p. 225.

## 5. O LE TULAFONO O SE TA'ITA'ITAMA

- a. **O le ā le fa'amoemoega autū o le malamalama i le tulafono po o le iloaina o le upumoni? Ioane 3:18–21; Roma 7:7.**

---

“O le la'asaga muamua lava i le fa'aleleiga ma le Atua o le mautinoāga lea o le agasala. ‘O le agasala o le solitulafono lava lea.’ ‘O le tulafono e iloa lelei ai le agasala.’<sup>1</sup> Ioane 3:4; Roma 3:20. Ina ia mafai ona iloa lona nofosala, e tatau i le tagata agasala ona tofotofoina ona uiga e ala i tapula'a po o le tulaga sili o le amiotonu a le Atua. O se fa'ata lea e fa'aalia ai le atoatoa o se uiga amiotonu ma mafai ai ona iloaitino e ia fa'alētonu i lona lava tagata.—*The Great Controversy*, p. 467.

- e. **E ala i le fa'aalia o lo tatou tulaga moni, o le ā le mea e fai e le tulafono i lenā fa'aaliga? Kalatia 3:24.**

---

“Sa fesiligiaina a'u e uiga i le tulafono i Kalatia. O le ā le tulafono o se ta'ita'itama e mafai ai ona aumaia ai i tatou iā Keriso? Na ou tali atu: O poloa'iga uma e lua, o fa'asauniga ma poloa'iga e sefulu tau i le amio.

“O Keriso o le fa'avae lea o le tamāoa'iga atoa o Iutaia. O le oti o Apelu na mafua ona o le musu o Kaino e talia le fuafuaga a le Atua i le a'oa'oina lea o le usiusita'i, ina ia fa'aolaina e ala i le toto o Iesu Keriso, ua fa'amanino mai ai, o osigātaulaga na faia e fa'asino atu lea iā Keriso. Na te'ena e Kaino le fa'amaligiina o le toto, lea e fa'atusa i le toto o Keriso na fa'amaligiina mo le lalolagi. Na saunia e le Atua leni sauniga atoa, ma na avea Keriso ma fa'avae o le faiga atoa. O le amataga leni o le galuega i le avea ai o se ta'ita'itama o le aumaia lea o tagata agasala ina ia manatunatu iā Keriso.”  
—*The SDA Bible Commentary [E. G. White comments]*, vol. 6, p. 1109.

## FESILI TOE FA'AMANATU

1. **O le ā le tāua o le sauniuniga a le tagata o lona lava loto i su'esu'ega Fa'a-Tusi Paia?**
2. **E mafai fa'aapefea ona malamalama lelei i se mea lilo e pei o le talalelei o le fa'aolataga?**
3. **O ā mafuaāga ia malamalama ai pea i le mavae le satauro, o lo'o fa'amalasia pea le tulafono a le Atua?**
4. **O le ā le tulaga sili o le amio, o se tulaga mana'omia lea mo le ola e fa'avavau?**
5. **Aiseā e tatau ai i le tulafono, o lo tatou ta'ita'i, ona aumaia i tatou iā Keriso?**

## Fa'amauina i Fao o Lona Satauro

**MAU AUTŪ:** “Ina ua solōia le tusilima na sala ai i tatou i tulafono sa tete’e mai iā te i tatou, ua ave’eseina ai foi nai le vaeloto, ma fa’amauina ai i fao i le satauro” (Kolose 2:14).

“O lo’o tumau pea le tulafono o poloa’iga e sefulu ma o le a i ai pea e o’o i le fa’avavau. O taulaga ofo ma faigātaulaga na uma lona aogā, ina ua fetaia’i mea-fa’atusa ma le tino moni, i le maliu o Keriso. Auā o Ia na fa’asino atu i ai le ata o mea atalī i lona tino. O le Tama’i Mamoe a le Atua o le atoāga ma le taulaga atoatoa.”—*The SDA Bible Commentary [E.G. White Comments], vol. 6, p. 1116.*

**Faitauga Fautuaina:** *Selected Messages, bk. 1, pp. 229-235.*

*Ulua’i Aso*

*Fepuari 19*

### 1. O LE ISI TULAFONO

a. Na fa’apefea ona fa’amatalaina e le Tusi Paia le tulafono lea na tete’e mai iā i tatou, a ua fa’amauina i fao o le satauro? Kolose 2:14; Efeso 2:15. Talu ai ona o le fa’avae autū o poloa’iga e sefulu sa i ai pea lava i Etena i Lona tulaga atoatoa, e fa’apefea la ona tatou iloa o lenei fa’amatalaga e lē o fa’atatau atu lea i lenā tulafono? Kenese 1:31.

e. O ā nisi vaega maōti o lo’o i ai i lenei tulafono fa’a-sauniga? Kolose 2:16, 21. Fa’amata e feso’ota’i atu nei Sapati ma isi tulafono i le ulua’i tulafono tau i le amio lea a tu’uina mai i le foafoaga—po’o se ata o mea atalī ua uma ona tu’uina mai? Kolose 2:17.

“O Etena, na fa’atūina ai e le Atua le fa’amanatuga o Lana galuega o le Foafoaga, e ala lea i le tu’uina atu o Ana fa’amanuiaga i le aso lona fitu. O le Sapati na tu’uina atu iā Atamu, o le tamā ma le sui o le aiga tagata atoa uma lava. O lona tausaiaina o lenei fa’atonuga o le a fa’ailoa atu ai le agaga fa’afetai, o se vaega lea e tataua ona faia e i latou uma lava o le a nonofo ma aumau i le lalolagi, o Ia o le Atua o lo tatou Foafoa ma lo tatou Tupu Silisili Ese; auā o i latou uma o galuega a Ona ‘Aao atoa ai ma mea uma o i ai Lana pule. Na fa’apenā ona fa’amanatuina ai pea lava, le tu’uina atu ai i le aiga tagata atoa uma lava. E leai se mea o i totonu o mea fai ata e tāua mo le tagata pe fa’atulafonoina lona fa’aaogāina.”—*Patriarchs and Prophets, p. 48.*



## 2. O LE TULAFONO FA'A-SAUNIGA

- a. **O mea ea nei o ni fa'atusa o ni mea e mulimuli ane tupu ma ta'ua ai loa o se tulafono moni lava ma afai e moni, o lē fea ituaiga o tulafono? Eperu 10:1.**

---

“O le nu’u o le Atua, o ē ua Ia ta’ua o Lana oloa fa’apitoa, sa fa’amanuiaina i vaega autū e lua o tulafono; e aofia ai le tulafono tau i le amio ma tulafono fa’asauniga. O le tasi, o lo’o fa’asino atu aga’i i tua i le foafoaga ina ia fai ma fa’amanatuga faifai pea o le Atua soifua, o lē na faia le lalolagi, ma o Ana folafolaga e aofia ai tagata uma o augātupulaga uma, ma o le a i ai pea mo le olaga atoa ma le fa’avavau. Peita’i o le isi, na tu’uina mai ona o le soliga o le tulafono tau i le amio, e aofia ai ma le usiusita’i i taulagaofa ma osigātaulaga lea e fa’asino atu i le lumana’i i le togiola. E matuā iloa lelei le ese’esega o le tasi ma le isi.”—*The SDA Bible Commentary [E.G. White Comments], vol. 6, p. 1094.*

- e. **E ui lava o taulaga o manu fasia sa a’oa’o atu lea i tagata Eperu anamua e fa’aata atu ai le taulaga a le Tama’i Mamoe a le Atua o le a afio mai, peita’i o le ā se mea e tatau lava ona tatou malamalama i ai? Eperu 10:2-4.**

---

“O Keriso lava ia o le amataga lea o faigātapua’iga fa’a-Iutaia, o lea, e tusa ai ma fa’atusa ma mea fai ata, na fa’asino pe na fa’aatina mai ai mea fa’alēagaga ma mea fa’alelagi. O le fa’ateleina o taulaga, o le toto o povi po’a ma ‘oti, e lē mafai ai ona aveesea le agasala.”—*Ibid., vol. 7, p. 933.*

- i. **O le ā le mea e tasi e iai le mana e fa’amamā ai mai le ta’usalaina o le agasala? 1 Ioane 1:7.**

---

“O se lesona na fa’aatina mai e ala i taulagaofa uma, ma fa’ailogaina i sauniga uma. . . . ua fa’ailoa mai ai le toto o Keriso ua na’o Ia lava e i ai le fa’amagaloina o agasala.”—*Ibid.*

“O le maliu ai o Keriso mo le togiolaina o le tagata agasala ua aveesea ai le veli ma ua ātagia mai ai le tafe ma le susulu mai o le malamalama i tua atu o le faitau selau ma selau o tausaga, i fa’atulagana atoa lava o sauniga fa’ale-lotu o faiga fa’a-Iutaia. Ma e leai ma se uiga o nei sauniga uma pe ana fai e aunoa ma le maliu o Keriso. O le te’ena ai o Keriso e tagata Iutaia, o le mea lea, o a latou fa’atulagana uma lava o a latou tapua’iga e le’i iai iā i latou se mautinoāga, ma le lē mautonu. Na sili atu iā i latou le tāua o sauniga fa’afa’atusa o mea fai ata e pei ona latou faia i le tulafono o poloa’iga e sefulu, lea e lē pei o mea fai ata, auā o se mea moni e tumau e pei o le nofoali’i o Ieova.”—*Ibid., vol. 6, p. 1097.*

### 3. O FA'ATULAGANA O FAIGA FA'ASAUNIGA

- a. **O ai le tagata na ulua'i faia taulaga i manu i lenei auala? Kenese 3:21, 24; 4:2-4; Eperu 11:4.**

---

“Na fa'atūina ma filifilia e le Atua taulaga osia e fai ma fa'amanatuga faifai pea i tagata ma avea o se fa'ailoga o le salamō mai lana agasala a'o se fa'ailoga foi lea i le Fa'aola na folafolaina mai. Sa latou fa'anaunau e fa'aioa atu i le fanau a tagata pa'ū le upu moni o le agasala na mafua ai ona o'o mai le oti. O se mea sili lea ona tigā iā Atamu lava ia a'o ia faia le osiga o le ulua'i taulaga. Na ia iloa e na'o le Atua lava e mafai ona foa'iina mai ai le ola lea o le a si'itia lona lima e ave'eseina ai. O le taimi muamua lea ua ia molimauina ai le oti, ma na ia iloaina lelei ana fa'apea na usiusita'i o ia i le Atua, semanū e lē fa'aumatiaina se ola o se meaola po'o ua lē o'o foi le oti i se tagata. A'o ia fasimatea le manu e lē sala, na ia lagonaina lona gatete ona na ia iloaina o lana agasala ua mafua ai ona fa'amaligiina le toto o le Tama'i Mamoe lē ponā a le Atua. O lenei va'aiga na aumaia ai iā te ia se lagona loloto ma le tele na'uā o lana solitulafono, lea e leai ma se mea e mafai ona faia i ai ua na'o le maliu lava o le Alo pele o le Atua e mafai ona togiolaina ai. Na ia matuā ofo lava i le agalelei e lē mafa'amatalaina o le Atua i le ofoina mai lea o se togiola fa'apea e lavea'iina ai lē ua agasala. O se fetū o le fa'amoemoe na fa'amalamalamaina ai le lumana'i pogisa ma le mata'utia, ma fa'apea ona aveesea mai ai nai lona fa'afanoga atoa lava.”—*Patriarchs and Prophets*, p. 68.

- e. **O le ā se fa'atulagana na ati'ina a'e pea ina ua lē malamalama tagata i le fuafuaga o le fa'aolataga i le mauga o Sinai? Esoto 25:8.**

- i. **Aiseā na tatau ai le fa'amaligiina o le toto? Eperu 9:22. O le ā le fa'atusa o le tama'i mamoe na fai ma taulaga? 1 Korinito 5:7; 1 Peteru 1:19; Ioane 1:29.**

---

“Na ia aumaia ma fa'asino atu tagata na fa'alogologo iā te ia i ata fa'afa'atusa ma ata o tulafono fa'asauniga iā Keriso—i Lona fa'asatauroga, o Lana fa'afaitaulaga, ma Lana galuega i le malumalu—o nei mea na fa'asino atu lea i tua i sauniga fai ata i le taimi o Iutaia. O Ia, o se Mesia, o le fa'atusa o osigātaulaga uma. Na fa'aioa mai e le aposetolo, e tusa ai ma valoaga ma fa'amoemoega autū o tagata Iutaia, o le a tupu mai le Mesia i le gāfa o Aperaamo ma Tavita. Ina ua ia sa'ilia Lona tupuāga mai le pateriaka o Aperaamo e o'o atu ai i le fai Salamo. Na ia fa'amaonia mai i le Tusi Paia le uiga ma galuega a le Mesia na folafolaina atoa ai ma le talisapaia ma le taliaina e le lalolagi, e pei ona molimau ai le 'au perofeta paia. Na ia fa'aioa mai foi, o nei valoaga na fa'ataunu'uina i le soifua'aga, auaunaga, ma le maliu o Iesu, o le mea lea e moni lava o Ia o le Fa'aola o le lalolagi.”—*Sketches from the Life of Paul*, pp. 103, 104.

#### 4. AISEĀ NA AVEESEA AI?

- a. **A’o fa’aaauau pea ona fai sauniga i le malumalu, o le ā le mea na talitonu i ai Israelu o lo latou fa’amoemoega lea mo le fa’aolataga? Isaia 1:10-15.**

“O le Alo o le Atua o le totonugalemū lea o le fuafuaga sili o le fa’aolataga e mai lava i augātupulaga uma lava, o Ia o le ‘Tama’i Mamoe na fasia talu ona fa’avaeina le lalolagi.’ O Ia o le Fa’aola o atali’i ma afafine na pau’ū o Atamu mai augātupulaga uma o le olaga nofo va’ava’aia o le aiga tagata. . . . O Keriso o le ata po’o le tino lea o mea fai ata lea sa fa’asino atu i sauniga fa’afa’atusa i augātupulaga ua mavae. Ina ua maliu Keriso, o iinā na muta ai sauniga o mea fai ata fa’afa’atusa. O le maliu ai o Keriso na aveesea ai nei ituaiga o sauniga masani, auā o le soliga o le tulafono a le Atua, na mafua ai ona mana’omia sauniga o mea fai ata ma fa’atusa mo le fa’aolataga ma avea o se mea na fa’alateleina ma fa’amamaluina. O se talalelei o se tala fiafia na fa’aolioliina ai Atamu, Noa, Aperamo, ma Mose; auā na fa’aalia atu iā te i latou o le a afio mai le Fa’aola.”—*The Signs of the Times, February 20, 1893.*

“O Ierusalemā o le ‘a’ ai sili lea o tagata Iutaia, ma o iinā na maua ai le fa’amauualuga fa’asausili ma le manatu fa’apito fa’aailoga tagata. O Kerisiano Iutaia o ē na nonofo i totonu o le mea o i ai le malumalu, e masani lava ona fa’atagaina o latou mafaufau e toe manatunatu ai i le fa’aeaina fa’apitoa o tagata Iutaia o se malo. A’o latou va’aia le aveesea atu o le fa’a-Kerisiano mai sauniga ma uputu’u a Iutaia, ma latou iloa ai o le tulaga ese ma le paia lea sa tu’uina atu i aganu’u fa’a-Iutaia, o le a leiloa ma mou ese atu ona o le malamalama o le fa’atuatua fou, e to’atele na latou ita iā Paulo, o lē na ia fa’atupu lenei faiga, i se tulaga maoa’e, lea na mafua ai lenei suiga. . . . O nisi sa sili ona maēlegā i tulafono fa’asauniga.”—*From the Life of Paul, p. 71.*

- e. **E ui i taulaga uma na osia, o le ā le mea na fia silasila i ai le Atua? Isaia 1:16-18; Salamo 51:17-19.**

- i. **O le ā le mea na aumaia e le fuafuaga o le fa’aolataga e ala i le toto o Iesu Keriso lea na lē mafaia e faiga fa’aosigātaulaga ona faia? Galuega 4:12; Eperu 7:28, 19.**

“O se malamalama sili atu ona manino ma le mamalu ua susulu mai nei i luga o le au Kerisiano. O i latou o ē na ola i ia ona po a’o le’i afio mai Keriso, na latou tulimata’i i le fa’atuatua i Lona afio mai, ae peita’i, o le mea ia ‘u’umau e le fa’atuatua o se fa’amautinoāga lea iā i tatou; auā ua tatou iloa ua afio mai Keriso e pei ona valoia mai e le au perofeta. E taūa lo tatou fa’atuatua i le Togiola, o lē na afio mai i le lalolagi ma maliu mo lo tatou taulaga, e pei ona talitonu tagata anamua i le Fa’aola e afio mai, o fa’atusa o a latou osigātaulaga.”—*The Signs of the Times, February 20, 1893.*

**5. TATOU TE MANA'OMIA EA TULAFONO FA'A-SAUNIGA I ASO NEI?**

a. Aiseā ua fa'amauina ai i totonu o le Tusi Paia le tulafono fa'a-sauniga? 2 Timoteo 3:16.

---

e. O le ā le mea o lo'o faia e Iesu i le lagi i le taimi nei? Eperu 8:1-5; 3:1.

---

i. O le ā le mea e tatau ona tatou faia ona o le tulaga o lo'o faia ai lenei faiga fou i le lagi? Eperu 4:14-16.

---

“O le finagalo o Keriso ina ia faia e Ona so'o le mea tonu lava lea e tatau ona latou faia mo i latou e pei ona mana'omia—lea o le a fesoasoani e vavae'ese mai ai i latou i a latou tū ma tulafono fa'asauniga lea na latou masani ai lea na o'o mai lava i le taimi lenei o se mea tāua lea iā i latou, ma o le taliaina ai o le talalelei ua lē o toe fa'amalosia ai ia mea. O le fa'aaauuina ai o nei sauniga o se mea lea e fa'alumaina ai Ieova.”—*The SDA Bible Commentary [E. G. White Comments], vol. 5, pp. 1139, 1140.*

“O avefeau o le satauro e tatau ona fa'aa'uupegaina i latou lava i le tatalo ma mataāla, ma aga'i pea i luma i le fa'atuatua ma le lototele, ma galulue ma le lē aunoa i le suafa o Iesu. E tatau ona latou si'itia Keriso o le puluvaga o tagata i le malumalu fa'alelagi, o Lē na fa'asino atu iai taulaga uma o le Feagaiga Tuai, auā e na'o Lana taulaga toggiola lava e mafai ai e i latou o ē solia le tulafono a le Atua ona maua ai le manuia filemu ma le fa'amagaloga.”—*The Acts of the Apostles, p. 230.*

**FESILI TOE FA'AMANATU**

1. Fa'aapefea ona tatou iloa o le Sapati aso fitu e lē o aumaia pe o aofia mai foi i totonu o tulafono fai ata po'o sauniga fa'afa'atusa o le Feagaiga Tuai?
2. O le ā le ese'esega e iloga ai tulafono e lua—tau i le amio ma fa'asauniga?
3. Talu ai ona o le tele o le fasi mateina, o a ni uiga ua tatou leiloa i le fasi matea o meaola?
4. O le ā na faigatā ai i tagata Iutaia na nonofo latalata ane i le malumalu ona latou malamalama ua uma le aogā ma le tāua o sauniga fai ata ma fa'atusa?
5. O ā ni vaega aogā ua tatou maua i aso nei mai le su'esu'eina o le auaunaga i le malumalu?

## Taulaga Fa'apitoa Sapati Muamua mo se Falesa i Pathankot, North India Union

O Pathankot o se taulaga i le setete o Punjab o India. E tuaoi ma Pakisitana i sisifo ma o se nofoaga autu mo femalaga'iga mo setete o Punjab, Himachal Pradesh, ma Jammu ma Kashmir.

O le fe'au o le Toefuata'iga na taunu'u mai iinei i le 2015, ma ua fa'atupula'ia lo tatou faitau aofa'i i le tele o tausaga. E ala i le fa'asalalauina atu o a tatou Lesona o le Aoga Sapati Fa'a-le Tusi Paia, ma ua naunau ai le to'atele o tagata fou e sa'ili mo le upumoni mo le taimi nei.

E o'o mai i le 2011, ua i ai i le nofoaga o Pathankot se faitau aofa'i o tagata e 159,909 ma le numera o e ua iloa faitau ma tusitusi e 88.71%. O loo si'omia e le vaega o le Shivalik (o se vaega o auvae mauga o Himalayas) ma le vaitafe o Chakki. O nofoaga lauiloa e latalata i Pathankot e aofia ai Shahpur Kandi ma se fale e malōlō ai mo turisi ma Ranjit Sagar Dam, o le pā aupito i maualuga lea o le kalave i Asia. O fale gaosimea i lea nofoaga e lata ane e aofia ai le gaosiga o susu, saito, araisa, ie, la'au su'isu'i, oloa o mea tau ta'aloga, suka, masoā, mea e fa'aaogā i le eletise, uila vilivae, mea faigaluega fa'asaïenisi, eletise, mea faigaluega o masini, ma le suā'u o le paina.

O lotu i Pathankot o le Hindu ma e 88.89%, o le Sikhism 8.01%, ma le Kerisiano 1.73%, soso'o ai ma le lotu Isalama ma isi tapua'iga. O lo'o nonofo i auvae mauga matagofie o Kangra ma Dalhousie, ma o le vaitafe o Chakki e tafe latalata ane, o lenei a'ai e masani ona fa'aaogāina e avea ma se nofoaga e malōlō ai a'o le'i aga'i atu i atu mauga o Jammu ma Kashmir, Dalhousie, Chamba, Kangra, Dharamshala, Mcleodganj, Jwalaji, Chintpurni ma sili atu i le Himalayas. O le tele o tamaiti a'oga i nu'u maotua o setete tuaoi, e o mai i Pathankot mo a'oa'oga.

O Pathankot e feso'ota'i lelei i nofoaafi ma auala ma isi vaega o India, ma e feso'ota'i e ala i ūpega tafāilagi o auunaga tū ma'oti ma fa'alaua'itele o pasi i isi a'ai i Punjab, i Himachal Pradesh, Delhi, Haryana, Jammu ma Kashmir. O nofoaga tāua e aofia ai Delhi, Manali Chandigarh, Jammu, Dharamshala, Dalhousie ma Amritsar.

O lea la, e pei o Kapanaumi i le taimi o Iesu, sa avea Pathankot o se fetaulaiga ala mo tagata faimalaga—ma o lea, e ono mafai ai mo le tala'iga! E leai ni a matou lava puna'oa e fa'atau mai ai ni fanua ma fausia ai se falesa, o lea matou te mana'omia ai le lagolago a o tatou uso ma tuafafine i le lalolagi atoa e auina atu ma le agalelei a outou taulaga limafoa'i e fausia ai se ma'afaamanatu mo le Alii i Pathankot, India. “E alofa le Atua i lē e foai ma le loto malie” (2 Korinito 9:7), o lea la, fa'atasi ai ma lenei fa'amoemoe tatou te tatalo atu ai i lo tatou Alii o Iesu ia fa'amanuia tele atu i tagata ta'ito'atasi.



*O ou uso ma tuafafine mai le Ekalesia Pathankot.*

## Afai Tatou te Fa'aali

**MAU AUTŪ:** “Ae afai tatou te fa'aali a tatou agasala, e fa'amaoni o ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava” (1 Ioane 1:9).

“Ia ta'uta'u atu a outou agasala i le Atua, e na o Ia lava e mafai ona fa'amagaloina, ma o outou sesē o le tasi i le isi.”—*Steps to Christ*, p. 37.

**Faitauga Fautuaina:** *Steps to Christ*, pp. 23–35, 37–41;  
*Testimonies for the Church*, vol. 5, pp. 635–650.

*Ulua'i Aso*

*Fepuari 26*

### 1. O LE METOTIA LAVA E TASI I LE FOU MA LE TUAI

- a. Talu ai e lē suia lava le Atua (Malaki 3:6, Eperu 13:8), o le ā se mea e tatau ona tatou iloa e uiga i Lona fa'anaunauga e fa'atatau i le fa'aolataga o agaga uma na Ia foafoaina? Salamo 78:38; Esekielu 18:32; 2 Peteru 3:9.

“E lē finagalo [le Atua] ia fano se tasi, ae peita'i e naunau e vaai i tagata uma lava ua o'o i le salamō. . . . Na pa'ū ifo le pelu o le fa'amasinoga tonu i luga o [Keriso] ina ia latou sa'oloto ai. Na Ia maliu ina ia latou ola ai.”—*God's Amazing Grace*, p. 326.

- e. I le fa'apaiaga o le malumalu na fausia e Solomona, o le a le soāfuitau maoa'e i le Feagaiga Tuai o lo'o ta'utino ai le naunau o le Atua e fa'amagalo? 2 Nofoaiga Tupu 7:12–14. Fa'apefea ona toe fa'aleoina lenei mea i le Feagaiga Fou? 1 Ioane 1:9; 2:1.

“O le agasala a le tagata lava ia e tatau ona ta'uta'u atu iā Keriso, ua na o le pau lea o le puluvaga e tasi i le va o le Atua ma le tagata. . . . O agasala uma lava o se solitulafono i le Atua, ma e tatau ona ta'uta'u atu iā te Ia e ala iā Keriso. O agasala fai fa'aaliali uma e tatau ona ta'uta'u atu fa'aaliali. O mea sesē e faia e sou uso a tagata e tatau ona toe fa'alelei ma lē ua tigā. Afai e i ai nisi o lo'o sa'ilia le soifua maloloina ma ua ta'usalaina i le tautala leaga, afai ua latou fa'atupuina fe'ese'esea'iga i totonu o le aiga, tuāoi, po o le ekalesia, ma ua fa'aosofia ai le fa'atu'iese ma le fe'ese'esea'i, pe afai o i ai se faiga sesē ua latou ta'ita'ia atu ai nisi i le agasala, e tatau ona ta'uta'u atu nei mea i luma o le Atua ma luma o ē ua māsei ma fa'atigā i ai.”—*Gospel Workers*, pp. 216, 217.

## 2. O LE LA'ASAGA MUAMUA IA MAUAINA AI LE FA'AMAGALOGA

- a. **E fa'apei o le galuega a le Agaga Paia o le aumaia lea o se talitonuga maumaututū i le loto (Ioane 16:8), o le ā sa tatou tali muamua? Salamo 86:5.**

---

“O se talitonuga maumaututū e taofi mau i le mafaufau ma le loto. E i ai i le tagata agasala se lagona o le amiotonu a Ieova ma lagona le mata'u o le fa'aali mai, i lona lava nofosala ma le lē mamā, i luma o Lē e su'esu'e i le loto. E mafai ona ia va'aia le alofa o le Atua, o le matagofie o le paia, o le olioliga o le mamā; e naunau o ia i le fa'amamāina ma ia toe fa'afo'isia i le feso'ota'iga ma le Lagi.”—*Steps to Christ*, p. 24.

“O lenā salamō e maua mai i le ūna'iga o le alofa tunoa paia i luga o le loto ma o le a ta'ita'ia atu ai i le ta'uta'u atu ma le lafoa'ia o le agasala. O fua fa'apenā na folafola mai e le apotolo na va'aia i olaga o tagata talitonu i Korinito.”—*The Acts of the Apostles*, p. 324.

- e. **I le va'ava'ai atu i le fa'aa'oa'oga i le aso o le Penetekoso, o le ā le mea na tupu o se fa'ai'uga o le loto fuatiaifo i le talitonuga o le agasala? Galuega 2:36, 37.**

---

“E ala i le ta'uta'u atu ma le lafoa'ia o le agasala, e ala i le tatalo fa'atauana ma le tu'uina atu fa'apaiaina o i latou lava i le Atua, ina ia saunia ai ulua'i so'o mo le liligiina ifo o le Agaga Paia i le Aso Penetekoso. O le galuega lava lea e tasi, ua na o se tikeri sili atu, e tatau ona faia i le taimi nei.”—*Testimonies to Ministers*, p. 507.

- i. **E mafai fa'apefea ona tatou fa'amatalaina le taunu'uga o le talitonuga maumaututū e ta'ita'iina atu ai i se suiga i le olaga? Galuega 2:38.**

---

“A o le'i mafai e [tagata Isaraelu] ona maua le filemu moni, e ao ona ta'ita'iina i latou e vaai ma fa'aali atu le agasala lava lea na ta'usalaina ai i latou.”—*Patriarchs and Prophets*, p. 614.

“O le ta'uta'u atu o agasala ma le fa'amaoni e masani lava ona i ai se uiga patino, ma fa'ailoa mai ai ni agasala fa'apitoa. Atonu o se natura e nā o le aumaia i luma o le Atua, atonu o ni mea sesē e tatau ona ta'uta'u atu i luma o tagata ta'ito'atasi o ē na mafatia i ni manu'aga ona o i latou, pe atonu foi o ni ituaiga lautele e tatau ona fa'ailoa atu i le fa'apotopotoga o tagata. Ae o le ta'uta'u atu o agasala uma lava e tatau ona manino ma tonu, i le fa'aalitino atu o agasala lava ia ua ē ta'usalaina ai.”—*Testimonies for the Church*, vol. 5, p. 639.

### 3. O SE FA'ATA'ITA'IGA O LE SALAMŌ SĒSĒ

- a. **Pe na salamō Iuta i le fa'alataina o Keriso i le 'au faitaulaga sili (Mataio 26:14–16, 47–49)? Aiseā pe aiseā na leai ai? Mataio 27:3, 4.**

“Ua fa'apaū ifo Iuta i a'ao o Iesu, ma ta'u atu o Ia o le Alo o le Atua, ma aioi atu iā te Ia e lavea'i ia te Ia lava. E lei fa'alumaina e le Fa'aola lē na fa'alataina o Ia. Sa silafia e le Fa'aola e le'i salamō Iuta; o lona fa'aali atu na fa'amalosia mai e lona agaga fa'asalaina e ala i se lagona leaga o le ta'usala ma le sailiga mo le fa'amasinoga, ae na te le'i lagonaina le loloto, o se fa'anoanoaga loto nutimomoia ona ua ia fa'alataina le Alo e lē ponā o le Atua, ma fa'afitia le Paia e To'atasi o Isaraelu. Peita'i e le'i fetalai Iesu i se upu e ta'usalaina ai. Ona silasila atu lea o Ia ma le alofa iā Iuta, ma fa'apea atu, O le itu aso nei na Ou sau ai i le lalolagi.”—*The Desire of Ages*, p. 722.

“Pe a fa'aumatia e le agasala le manatu mamā, o lē e fai mea sesē na te lē iloatino ia fa'alētonu o lana amio pe iloa foi le mata'utia o le leaga na ia faia; ma se'iloga ua gaua'i o ia i le mana fa'atalitonuina o le Agaga Paia, o le a tumau ai pea o ia i se vaega tauaso o lana agasala. O ana ta'utinoga e lē tu'uina atu ma le loto atoa ma le fa'amaoni. O ta'utinoga uma lava o lona ta'usalaina, na ia fa'aopoopoina atu ai se fa'atō'esega e fai ma 'alofaga o lona ala, ma ta'utino atu, ana lē seanoa ma tulaga fa'apitoa semanū e lē faia lenei mea po'o se mea e a'oa'ina ai o ia.”—*Steps to Christ*, p. 40.

“O le fa'atuatua ma le tatalo e mafai ai e tagata uma ona ausia tulaga mana'omia o le talalelei. E leai se tagata e mafai ona fa'amalosia le solitulafono. O lana lava māliega e tatau ona maua muamua; e tatau i le agaga ona fuafuaina le fa'atinoga o le agasala a o le'i mafai e le tu'inaanau ona pulea le mafaufau lelei po o le amiolētonu i le loto fuatiaifo. O fa'aosoosoga, po o le a lava le malosi, e lē o se alofaga mo le agasala.” Po o le a lava le malosi o tofotofoga, e lē o se 'alofaga lea mo le agasala.”—*Testimonies for the Church*, vol. 5, p. 177.

- e. **Fa'amatala pe o se ituaiga salamō lea e ta'ita'i atu ai i le ola e fa'avavau pe leai. Mataio 27:5; 2 Korinito 7:8–11.**

“E to'atele o lo'o fa'asesēina i latou lava, ma ulu atu i fuafuaga e leai se mea e faia i ai e le Alii. Ae na o le pau lava le ala saogalemu e tulituliloaina o le usiusita'i lea i le afioga a le Alii. Na i lo le faia o lenei mea, e to'atele ua manatu e faia ni mea ofoofogia. Latou te iloa e faigofie ona fuafua se mea sili mo le lumana'i nai lo le lafoa'ina o i latou lava, o le tu'uina atu o le loto i le Atua, o le mafaufau, ma le finagalo, ma gaua'i atu ina ia fa'atusaina e lenā mana lea e mafai ona foafoaina ma fa'aumatia ai. Ia iloilo toto'a e talavou o latou fa'anaunauga, e ala i le tatalo ma le su'esu'eina o le Tusi Paia, ma vaai pe e lē o ta'ita'ia ese ai e o latou lava loto ma fa'anaunauga mai le finagalo ma mea e mana'omia e le Atua.”—*The Youth's Instructor*, March 23, 1893.



#### 4. O SE FA'AA'O A'OGA O LE SALAMŌ MONI (SALAMO 51)

a. O le ā le mea e tupu pe a tatou lē fa'ailoa atu a tatou agasala i luma o le Atua ae ua lē tautala fa'atatau i ai? Salamo 32:3, 4.

---

e. Ina ua uma ona fa'aali sa'o e le perofeta o Natano le agasala a Tavita (2 Samuelu 12:1–12), na fa'apectea ona tali atu le tupu? 2 Samuelu 12:13.

---

“Na o’otia le loto o Tavita i le a’oa’iga a le perofeta; sa fa’aosofia lona loto fuatiaifo; o lona ta’usalaina na o’o i se tulaga maoa’e. Sa ifo to’ēle lona agaga i le salamō i luma o le Atua.”—*Patriarchs and Prophets*, p. 722.

“Sa fa’amaoni ma loloto le salamō o Tavita. Sa leai se taumafaiga e fa’afilemuina lana solitulafono. Sa leai se mana’o e sola ese mai fa’amasinoga ua fa’amata’uina, na musuia ai lana tatalo. Peita’i na ia va’aia le telē o lana solitulafono fa’asaga i le Atua; na ia va’aia i le fa’aleagaina o lona agaga; na ia ino’ino i lana agasala. E lē na o le fa’amagaloga na ia tatalo ai, ae mo le loto mamā. E le’i fa’avaivai Tavita i lana tauiviga. I folafolaga a le Atua i tagata agasala ua salamō na ia va’aia ai le fa’amaoniga o lana fa’amagaloga ma lona taliaina.”—*Ibid.*, p. 725.

i. Na fa'apectea foi ona tupu lenei mea i le loto o Simona le Petania? Luka 7:40–48. O le ā le auala e tasi e mafai ona maua ai le filemu ma le fa'aleleiga? Salamo 32:5; Ieremia 3:13; 1 Ioane 1:9.

---

“E pei ona faia e Natano ma Tavita, sa nātia e Keriso Lona aiga i lalo o le veli o se fa’ataōto. Na Ia tu’uina atu i luga o Lana auaua le avega o le tu’uina atu o le fa’asalaga i ona lava luga. Na ta’ita’ia e Simona le fafine ua ia inosia nei i le agasala. Sa matuā lagona e lenei fafine lona sesē iā te ia. O tagata aitalafu e to’alua o le fa’ataōto, o Simona ma le fafine na fai ma sui. E le’i fa’atatauina e Iesu e a’oa’o atu fa’apea e ese’ese tikeri o matāfaioi e tataua ona lagonaina e tagata e to’alua, auā e tofu le tagata ma le aitalafu o le loto fa’afetai e le’i mafai ona toe totogiina. Ae na lagona e Simona o ia lava e sili atu le amiotonu nai lo Maria, ma sa fa’anaunau Iesu iā te ia ina ia va’ai lava o ia i le tele o lona sesē. O le ā Ia fa’ailoa atu iā te ia o lana agasala e sili atu nai lo Maria, e pei o se aitalafu e lima selau pene e sili atu i se aitalafu e limasefulu pene.

“Ua amata nei ona va’ava’ai Simona iā te ia lava mo se malamalama fou. . . . Ua i ona luga le ma’asiasi, ma ua ia iloa ai o lo’o i ai o ia i luma o Lē e sili atu iā te ia. . . .

“Sa o’otia Simona i le agalelei o Iesu i le lē a’oa’ia fa’aaliali o ia i luma o le ‘au vala’aulia. . . . O apoapoa’iga onosa’i na fa’atalitonuina ai o ia i lona sesē. Sa ia va’aia le telē o le aitalafu na ia nofo aitalafu ai i lona Alii. Sa fa’amauualoina lona fa’amauualuga, sa salamō o ia, ma avea ai le Faresaio fa’amauualuga o sē e fa’atauavaa, o se so’o e fa’ataulaga’ofoina.”—*The Desire of Ages*, pp. 566–568.

## 5. O LE MEAĀLOFA O LE FA'AMAGALO

- a. **Afai tatou te matuā a'afia i le solitulafono, e mafai fa'apefea ona ta'ita'ia i tatou i le loloto, ma le fa'anoanoa moni i a tatou agasala? Galuega 5:30, 31; Isaia 55:6, 7; Eperu 4:16.**

---

“O se salamō fa'apenei, e lē mafai ona ausia e lo tatou lava malosi; ua na'o Keriso lava e maua ai, o lē na afio a'e i lugā ma foa'iina mai meaālofa i tagata.”—*Steps to Christ*, p. 25.

“Afai e te va'ai atu i lau agasala, aua le toe fa'atali a ia fa'aleleia oe lava. E to'afia i latou ua manatu e lē o lava lo latou lelei e ōmai ai iā Keriso. Pe e te fa'amoemoe e fa'aleleia atili oe e ala i au lava taumafaiga? 'E mafai ea ona liua e le Aitiupe o lona pa'u, pe liua e le nameri o lona ila? a mafai loa, ona mafai foi lea ona amio lelei o outou ua masani i amio leaga.' Jeremia 13:23. E na o le Atua lava e i ai le fesoasoani mo i tatou. E lē tatau ona tatou fa'atalitali mo se malosi e fa'atauānu atu, mo ni avanoa e sili atu ona lelei, po o ni mea e sili atu ona malolosi. E leai se mea e mafai ona tatou faia e i tatou lava. E tatau ona tatou ōmai iā Keriso e pei ona tatou i ai.”—*Ibid.*, p. 31.

- e. **E fa'apefea ona tatou fa'atalitalia le faia o lenei galuega e le Atua mo i tatou ma totonu iā i tatou? Eperu 12:12; Filipi 1:6.**

---

“O le salamō, e fa'apea foi i le fa'amagaloga, o meaālofa ia a le Atua e ala iā Keriso. E ala i le ūna'iga a le Agaga Paia tatou te ta'usalaina ai i le agasala, ma lagona ai lo tatou mana'omia o le fa'amagaloga. E leai se tasi ua na o lē ua salamō e fa'amagaloina; ae o le alofa tunoa o le Atua e salamō ai le loto. Na te silafia o tatou vaiva'iga uma ma fa'alētonu, ma o le a Ia fesoasoani mai iā i tatou.”—*Selected Messages*, bk. 1, p. 353.

- i. **O le ā le taunu'uga o lea ituaiga o le ta'uta'u atu ma le fa'amaoni? Roma 8:1.**

## FESILI TOE FA'AMANATU

1. **O le ā e mafai ona tatou a'oa'oina mai i le tatalo a Solomona i le fa'apaiaga o le malumalu?**
2. **O ā la'asaga e mana'omia ona tatou manatu mamafa i ai pe a tatou fia auai i le fa'ai'uga o le galuega a le Atua i lalo o le mana a le Uaga Mulimuli?**
3. **Aiseā e mana'omia ai ona ta'uta'u atu a tatou agasala i le Atua? O le ā lo tatou tiute tau'ave moni o lo tatou faia o le agasala?**
4. **O le ā le fa'aetetega e mana'omia ina ia fa'aילו i se tasi ua nofosalaina?**
5. **E mafai fa'apefea e se tagata agasala ona salamō?**

## Fa'apaiaina i Latou i Lau Upu Moni

**MAU AUTŪ:** “A’o le ala o lē amiotonu, e tusa ia ma le malamalama o le ao, e tuputupu pea lona malamalama se’ia o’o i le tū tonu o le la” (Fa’ataoto 4:18).

“Pe afai tatou te tu’uina atu atoatoa i tatou i le Atua, atoa ai ma le talitonu atoatoa, o le toto o Keriso e mafai ai ona fa’amamāina ai agasala uma. E mafai ona fa’asa’olotoina ai le loto fuatiaifo mai le ta’usalaina. E ala i le fa’atuatua i Lona toto, e mafai ai ona fa’aato’atoaina tagata uma iā Keriso Iesu. Fa’afetai i le Atua ona e lē o fesāga’i i tatou ma ni mea e lē mafaia ona lavātia. E mafai ona tatou olioli ona o le finagalo alofa o le Atua. E lē tatau ona tatou popolevale pe o le a le finagalo o Keriso ma le Atua e uiga iā i tatou, ae pe o le a le finagalo o le Atua e uiga iā Keriso, o Ia o lo tatou Sui.”—*Selected Messages, bk 2, pp. 32, 33.*

**Faitauga Fautuaina:** *The Acts of the Apostles, pp. 557-567.*

*Ulua’i Aso*

*Mati 5*

### 1. TA’UAMIOTONUINA

- a. **Pe a fa’amaoni ona fa’aali atu a tatou agasala ma tu’uina atu atoa o tatou ola iā Iesu—po’o le amataga o lo tatou molimau fa’a-Kerisiano po’o la’asaga uma o le ala—o le ā se mea tatou te maua mai i le Atua? Roma 3:24-26.**

---

“Sa mafai e Atamu a’o le’i pa’ū, ona fausia se amio mamā ma le tonu e ala i le usiusita’i i le tulafono a le Atua. Peita’i na le’i faia e ia lenei mea, ma o lana agasala na mafua ai ona pa’ū lo tatou natura ma ua lē maua ai e i tatou le amiotonu. Talu ai o i tatou o tagata agasala, lē paia, ua lē mafai ai ona tatou usiusita’i atoatoa i le tulafono paia. Auā e lē iā te i tatou sa tatou lava amiotonu e mafai ona tali atu ai pe fa’afetaia’ia ai mana’oga o le tulafono a le Atua. Peita’i ua faia e Keriso le ala e mafai ona tatou sao mai ai. Auā na Ia soifua i lenei lalolagi i le lotolotoi o tofotofoga ma fa’aosoosoga lea e fetaia’i ma i tatou. Na soifua o Ia i se olaga e aunoa ma se agasala. O Ia lava na maliu mo i tatou, o lea ua ofoina mai ai e Ia Na te tauaveina a tatou agasala ma Ia ofoina mai ai Lana amiotonu mo i tatou. Afai e te tu’uina atu oe lava iā te Ia, ma talia o Ia e avea ma ou Fa’aola, ona lē ta’ua ai lea o lau agasala iā te oe lava, auā o Ia ua ta’uamiotonuina ai oe. O le amio a Keriso ua avea ma suitulaga i lau amio, ma taliaina ai oe e le Atua e pei lava e te le’i agasala.”—*Steps to Christ, p. 62.*

- e. **O le ā le umi o lenei e alu ai lenei faigāmalaga? Fa’ataoto 4:18; Mareko 13:13.**
-

## 2. FA'ALELEIA O LE ALOFA TUNOA FA'A-KERISIANO

- a. **E ese mai i le fa'amagaloga/ta'uamiotonuina, o le a se isi mea e finagalo le Atua e foa'iina ia i tatou? 2 Korinito 7:1; Eperu 6:1; Filipi 3:12-14.**

“O suiga fa'apenā o le amio e pei ona va'aia i le soifua'aga o Ioane, o se taunu'uga lea o le so'otaga ma Keriso. Atonu e iloga ni fa'alētonu i uiga o le tagata, peita'i afai ae avea o ia ma so'o moni o Keriso, o le mana o le alofa tunoa fa'alalalolagi o le a suia ma fa'apaiaina ai o ia. O lo'o va'ava'ai atu i le pupula o le Alii e pei o le fa'ata, ona liua ai lea o ia e mai le pupula i le pupula, se'ia o'o ina avea o ia e pei o Ia o lē ua ia naunau i ai.”—*The Acts of the Apostles*, p. 559.

“A aunoa ma le alofa tunoa o Keriso, o le tagata agasala ua leai se fa'amoemoe; ma ua leai se mea e mafai ona faia mo ia; peita'i e ala i le alofa tunoa fa'alelagi, ua foa'iina mai ai i le tagata le mana fa'alelagi, e galueāina ai le mafaufau ma le loto, atoa ma le amio. O le foa'iina o le alofa tunoa o Keriso e iloatino ai le natura inosia o le agasala, se'ia tuli'esea mai ai i le malumalu o le loto.”—*Selected Messages*, bk 1, p. 366.

“Ua na'o le mana fa'alelagi lava e mafai ai ona toe fa'afouina le loto o le tagata ma fa'atumulia ai agaga i le alofa o Keriso e aunoa ma se isi lava mea, lea o le a fa'aalia mai ai ia lava i le alofa mo i latou na Ia maliu ai. Auā o fua o le Agaga o le alofa, o le olioli, o le filemu, o le onosa'i, o le fa'apalepale, o le agalelei, o le fa'amaoni, o le agamalu, ma le fai fa'atatau lelei. Pe a liua le tagata i le Atua, o iinā o le a ia maua ai se tofo fou o le amio mamā, ma o le a foa'iina mai i ai le malosi fou e fa'aosofia ai, ma fa'aosofia ai o ia e fiafia i mea e mana'o i ai le Atua, auā o lona olaga ua fusia i le filifili auro o folafolaga e lē māsua o le soifua'aga o Iesu. O le alofa, o le olioli, o le filemu, ma le agaga fa'afetai e lē mafa'amatalaina o le ā fa'atumulia ai le agaga, ma o le gagana a lē ua fa'amanuiaina o le a fa'apea mai, ‘Auā o Lou agamalū ua fa'asilisiliina ai a'u’ (Salamo 18:35).”—*Ibid.*, p. 336.

- e. **O ā nisi o la'asaga i le fa'atuputeleina atili o le alofa tunoa fa'a-Kerisiano tatou te mana'omia i le ala i le malō o le lagi? 2 Peteru 1:5-11.**

“O Keriso, o Ia lē na Ia soso'oina le lalolagi ma le lagi, o le ala fa'aapefa'i. O le fa'avae ua mausalī le totōina i luga o le ele'ele e ala i Lona soifua'aga fa'alētagata; o le fa'atumutumuga e o'o atu lea i le nofoali'i o le Atua i Lona natura paia. O le itu tagata o Keriso o lo'o fusia ai le aiga tagata pa'ū, a'o Lona itu Atua o lo'o taofimau atu i le nofoali'i o le Atua. E lavea'iina i tatou e ala i le a'e atu i la'asaga o le ala fa'aapefa'i, ma va'ava'ai atu iā Keriso, ma taofimau atu iā Keriso, o le fa'amautū o lea sitepu i lea sitepu i le maualuga o lo'o i ai Keriso, ina ia faia ai e Ia mo i tatou le potu, ma le amiotonu, ma fa'apaiaina, ma le togiola.”—*Testimonies for the Church*, vol. 6, p. 147.

### 3. O LE MANA E ALA I LE AFIGA A LE ATUA

- a. E fa'apefea ona fa'amalamalamaina e le Atua o tatou mafaufau ina ia taula'i pea i luma le tuputupu a'e fa'a-Kerisiano? 2 Korinito 4:4-6; Salamo 119:105; Levitiko 20:7, 8.

“A ōgatūsa le loto o le tagata ma le finagalo o le Atua, e aumaia ai o ia ma avea ma pule aoao. So'o se mea e faia i Lana upu e mafai ona fa'ataunu'uina e ala i Lona mana. Auā o Ana poloa'iga uma lava e mafai ai.”—*Christ's Object Lessons*, p. 333.

“O le ato'atoāga o le amio e fa'avae lea i luga i le i ai lea o Keriso iā i tatou. Afai tatou te fa'alagolago i taimi uma e ala i le galuega a lo tatou Fa'aola, ma savavali i Ona tulaga'a'ao, ona avea ai lea o i tatou fa'apei o ia, e paia ma lē ponā.

“E lē finagalo lo tatou Fa'aola ina ia lē mafai e so'o se agaga ona faia se mea. Na te lē o fa'alagolago mai i Ona so'o i se mea e lē o tusa ai ma Lona finagalo i le tu'uina atu lea iā i latou le alofa tunoa ma le malosi e faia ai. Na te lē o vala'au atu iā i latou ia atoatoa pe ana fai e lē o i ai i Lana upu le ato'atoāga uma o le alofa tunoa lea e ofoina atu iā i latou o le a Ia tu'uina i ai se avanoa sili ona maualuga ma le paia. Ua Ia aumaia iā i tatou se mautinoāga e sili atu e ala lea i Lona naunau e foa'iina mai Lona Agaga Paia iā i latou o ē ole atu iā te Ia, nai lo le tu'uina atu e matua i a latou fanau o meaālofa sili ona lelei.”—*That I May Know Him*, p. 130.

- e. O le ā le ta'uga tatou ta'ua ai lenei fa'asologa o le tuputupu a'e fa'a-Kerisiano i le upu moni e ala i le mana o le Afiga Paia a le Atua? Ioane 1:14; 17:17.

“Pe afai e avea le upu moni ma mataupu fa'avae autū o le olaga, ona 'fanaufouina ai lea o le agaga, e lē o le fatu e pala a'o le fatu e lē pala lava, o le Afiga lea a le Atua, ua ola ma ua tumau e fa'avavau.' O lenei fanaufouina o le taunu'uga lea o le taliaina o Keriso o le Upu a le Atua. A aumaia e le Agaga Paia upu moni paia i le loto, ona fafaguina ai lea o manatunatuga fou, ma fafaguina ai le malosi i ē o momoe ina ia galulue fa'atasi ma le Atua.”—*The Acts of the Apostles*, p. 520.

“O le olaga fa'apaiaina o le ekalesia o le fa'anaunauga sili lea o le Atua i Ana feso'ota'iga uma ma Ona tagata. Na Ia filifilia i latou talu mai le vavau, ina ia avea ma tagata paia. Na ia ofoina mai Lona Alo ina ia maliu mo i latou, ma ia fa'apaiaina i latou e ala i le gau'i i le upu moni, ma ia tu'ueseina ai mea fa'atauva'a uma lava mai iā te oe. E mafai ona vi'ia le Atua e i latou o ē fai mai e talitonu iā te Ia, peita'i se'ivaganā ua tusa i latou ma Lona fa'atusa ma pulea e Lona Agaga. Ona avea ai lea o i latou o ni molimau mo le Fa'aola, ma latou fa'ailoa atu ai mea ua faia e le alofa tunoa fa'alelagi mo i latou.” —*Ibid.*, p. 559.

#### 4. TULAGA O MEA SĒSĒ

- a. **Pe a tatou tō manatu i tagata paia o le Atua i taimi uma i le Tusi Paia, o le ā e tatau ona tatou malamalama i ai, i le mauaina o le manumalo mulimuli? 1 Ioane 1:8, 10; Roma 7:18; Kalatia 6:14.**

“O le malumalu na tu’uina atu iā Tanielu na fa’aosofia ai le lotoleaga o alii sili o le malo. Na saili e peresitene ma perenise se mea e ta’uleagaina ai o ia. ‘A ua lē maua e i latou se mea e fa’alani po’o se mea leaga e tasi, auā sa fa’amaoni o ia, ua lē maua foi sona sesē e tasi, po’o se mea leaga iā te ia’ (Tanielu 6:4).”

“E ma’eu le tāua o le lesona ua aumaia iinei mo le ‘au Kerisiano uma. O mata o le fuā na taula’i atu iā Tanielu i lea aso ma lea aso; o o latou foliga na va’aia ai le ino’ino, peita’i e leai se upu po’o se gaioiga o lona olaga na o latou fa’auigasesēina. Na te le’i faia pe fa’aalia i lona olaga se lē fa’apa’iaina, auā na ia faia le mea e sili ona ta’uleleia—auā na ola o ia i se olaga fa’amaoni ma fa’apaiaina.”—*The Sanctified Life*, p. 42.

“O le fa’apaiaina fa’afoliga e ta’ita’i’eseina mai ai mai le Tusi Paia. Ua fa’aitiitia ai tapua’iga ua o ni talafa’agogo. Ua fua a latou tapua’iga i lagona ma o latou manatu. O lo’o latou ta’utino mai e lē o ta’u agasalaina i latou ma taupelopelo gugutu i la latou amiotonu, o lo’o latou a’oa’o mai foi le fa’apaiaina o lo’o i ai lea i tagata le sa’olotoga e solia ai le tulafono a le Atua ma o lē e usita’i i ai ua pa’ūū ese i latou mai le alofa tunoa. O ā latou fa’amatalaga o lo’o fa’aalia mai ai le tete’e ma fa’aosofia ai lo latou ita ma le ino’ino. Ua avea lenā ma mea ua fa’aalia mai ai o latou uiga ma amio, auā ‘o le loto i la le tino o le ita lea i le Atua; auā e lē ususita’i i le tulafono a le Atua, e lē mafai foi ona ususita’i i ai’ (Roma 8:7).”—*Faith and Works*, p. 53.

- e. **Pe o le talitonuga ea i le mauaina o le olaga fa’apaiaina o lona uiga o lo tatou mauaina lea o lo tatou fa’aolataga? Ioane 14:15; 1 Ioane 3:5, 6.**

“O le amiotonu e fa’apogai mai lona maua’a i le amio Atua. E leai se tagata e sili atu ona avea ma tagata amiotonu nai lo tagata e fa’atuatua i le Atua ma fa’atumauina lo la so’otaga mausalī ma Ia. E fa’apei o fugālā’au o le fanua e i ai ona a’a i le palapala; e pei foi ona tatau i le laau ona ia mauaina le ea, o le sau; o le timu, fa’apea foi ma le susulu mai o le la, e tatau foi ona tatou maua mai le Atua mea e auauna atu ai i le ola o le agaga. Auā e na’o le avea lava ma ē e tofusia fa’atasi ma Ia i Lona natura e mafai ai ona tatou maua le mana e ususita’i ai e tausia Ana poloa’iga. E leai se tagata e maualuga po’o le maualalo, poto po’o le leai foi, e mafai ona fa’atumauina pea i luma o ona uso a tagata se olaga mamā ma le mausalī, se’ivaganā ua nātia lona ola fa’atasi ma Keriso i le Atua. O le tele ma le sili atu o galuega ma fa’atinoga a tagata, o le sili atu foi lea o le vavalalata o le feso’ota’iga o le loto ma le Atua.”—*Testimonies for the Church*, vol. 7, p. 194.

## 5. O LE A LE FA'APAIAINA?

- a. **O le fa'apaiaina—tuputupu a'e i le amio fa'a-Kerisiano—e mafai ona iloa e lē o lo'o tupu ai? Mareko 4:26-29. Ae fa'apefea i isi?**

---

“O a'afiaga e le'i su'esu'eina, ma le lē iloa o se olaga paia, o le lauga sili lea e fa'atalitonuina ai, e mafai ona tu'uina atu mo le lelei o le fa'a-Kerisiano. O finauga, e masani lava ona lē taliaina, e ono fa'aosofia ai le tete'e; peita'i o le fa'aa'oa'o i le amio Atua, e i ai lona mana e lē mafai ona te'ena.”—*The Acts of the Apostles*, p. 511.

- e. **O le ā le mea e fa'aalia ai lenei tuputupu a'e o lo'o fa'aauau pea ma e lē mafai ona fa'amalieina i lo tatou aga'i pea i luma e o'o lava i mea na ausia? 1 Korinito 15:31; Mataio 10:22; Filipi 3:12-16.**

---

“E finagalo le Alii i Ona atali'i ma afafine uma ina ia fiafia, filemu, ma usiusita'i. . . E ala i le fa'atuatua, e mafai ona fa'aalia ai vaivaiga ma fa'alētonu uma o le amio, ma fa'amamāina ai mea leaga uma, ma fa'asa'oina ai māsei o le olaga, ma atina'e uiga lelei uma.”—*The Acts of the Apostles*, p. 564.

“O le olaga fa'apaiaina e lē o se galuega mo na'o sina taimi, mo se itula, po o se aso e tasi, ae mo le olaga atoa. E lē maua mai i se lagona o le fiafia, peita'i o le i'uga lea i le avea ma tagata oti i le agasala, ma ola ai mo Keriso. O mea sesē e lē mafaia ona fa'asa'oina pe faia foi se toe fuata'iga e le tagata e ala i ana lava taumafaiga vaivai ma le lē tusa. E na'o se taimi umi, o tauiviga finafinau, o le amio pulea, ma tima'iga malosi e mafai ona tatou manumalo ai. E lē mafai ona tatou iloa se taimi ae po'o le ā foi le malosi o le a o'o i ai a tatou fete'ena'iga ma isi mea o lo'o aga'i mai. O le ā lava le umi e pulea ai e Satani, e tatau ona tatou fa'ato'ilaloina i tatou lava, ma fa'aauauina ai le fa'ato'ilaloina o le agasala; po o le ā lava le umi o le olaga, o le a leai se nofoaga e taofia ai, leai se avanoa e o'o iai ma fa'apea mai, o a'u ua ou atoatoa. O le fa'apaiaina moni o le i'uga lea o le usiusita'i mo le olaga atoa.”—*Ibid.*, pp. 560, 561.

## FESILI TOE FA'AMANATU

1. **Fa'apefea ona taulimaina i tatou e le Atua i taimi uma o le ta'uamionuina?**
2. **Fa'apefea ona fa'ailoa e le Atua Lona fa'anaunauga mo i tatou e sili atu nai lo lē na'o le fa'amagalo?**
3. **O le ā le mea lilo o le liuaga?**
4. **O le ā le mea e ta'ita'i'eseina i tatou mai le fa'apaiaina fa'afoliga?**
5. **Fa'apefea ona tatou iloa o le fa'apaiaina e aofia ai le tuputupu a'e faifaipea?**

## O le Feagaiga Tuai

**MAU AUTŪ:** “Auā ua ta’ua e ia ua le sao le na muamua, ona fetalai atu lea o ia iā te i latou, O lo’o fetalai mai le Alii, Fa’auta mai, e o’o mai, ona aso ou te osi ai se feagaiga fou ma le aiga o Isaraelu atoa ma le aiga o Iuta” (Eperu 8:8).

“Na silafia e le Atua le mea o lo’o tupu i le togālauapiga. Na ia va’aia ai o tagata, e ui lava sa i ai pea le mamalu paia i luga o Sinai, ae sa latou gaua’i atu i fa’aosoosoga a Satani, ma sa latou taupulepule e tete’e atu i le pule na latou folafola atu e usita’i i ai.”—*The Youth’s Instructor, November 21, 1901.*

**Faitauga Fautuaina:** *Patriarchs and Prophets, pp. 370–373.*

*Ulua’i Aso*

*Mati 12*

### 1. O LE POLOGA E FA’AFENUMIA’I AI MAFAUFAU

- a. O le a le tulaga o Isaraelu mo le tele o tausaga—ma na fa’apefea e lenā tulaga ona a’afia ai lo latou malamalama i le Atua ma Ana tulafono? Esoto 20:1, 2; Teuteronomie 5:15.

---

“O lo latou nofo pologa, sa matuā leiloa ai e tagata le malamalama o le Atua ma mataupu fa’avae o le feagaiga fa’a-Aperaamo. I le lavea’iina o i latou mai Aikupito, na saili ai le Atua e fa’ailoa atu iā i latou Lona mana ma Lona alofa mutimutivale, ina ia ta’ita’iina atu ai i latou e alolofa ma fa’atuatua iā te Ia. Na Ia aumaia i latou i lalo i le Sami Ulaula—lea na tuliloaina ai e Aikupito, na foliga mai e lē mafai ona sosola—ua latou iloa ai lo latou matuā lē mafaia lava, o lo latou mana’omia o le fesoasoani fa’alelagi; ona Ia faia lea o le lavea’iga mo i latou. O lea na fa’atumulia ai i latou i le alofa ma le agaga fa’afetai i le Atua ma le talitonu i Lona mana e fesoasoani iā i latou. Sa Ia noatia i latou iā te Ia lava e avea ma o latou lavea’i mai le nofo pologa fa’alētino.

“Ae sa i ai se upumoni sili atu e tataua ona fa’agae’etia ai o latou mafaufau. O le ola ai i le lotolotoi o le ifo i tupua ma faiga pi’opi’o, sa leai so latou manatu moni i le paia o le Atua, o le agasala tele o ō latou lava loto, o lō latou lē agava’a, iā i latou lava, e tu’uina atu ai le ususita’i i le tulafono a le Atua, ma lo latou mana’omia o se Fa’aola. O nei mea uma e tataua ona a’oa’oina ai i latou.”—*Patriarchs and Prophets, p. 371.*

- e. O fea na aumai ai i latou e le Atua ina ia mafai ona latou malamalama i le paia ma le ta’ua o Lana tulafono? Esoto 19:1, 5, 6.
-



## 2. O LE MATUĀ AGASALA TELE O LE AGASALA

- a. **Na fa’apefea ona tali atu tagata Israelu i folafolaga o fa’amanuiaga e ui ina latou malamalama i le tulafono ina ua fetalai mai le Atua? Esoto 19:8; 24:3.**

---

“Ua lē iloa e tagata le agasala o ō latou lava loto, ma a aunoa ma Keriso e lē mafai ona latou tausia le tulafono a le Atua; ma sa latou ulu atu ma le loto malie i le feagaiga ma le Atua. Na latou lagonaina ua mafai ona latou fa’atūina la latou lava amiotonu, sa latou ta’utino mai ai, ‘O mea uma ua fetalai mai ai Ieova matou te faia lava, ma matou usiusita’i i ai.’ Esoto 24:7. Na latou molimauina le folafolaga o le tulafono i le mamalu mata’utia, ma sa latou gatete i luma o le mauga i le mata’u; ae peita’i sa na o ni nai vaiaso na mavae ona latou solia lea o la latou feagaiga ma le Atua, ma ifo toēle e tapua’i i se tupua ua ta. Sa lē mafai ona latou fa’amoemoe mo le finagalo malie o le Atua e ala i se feagaiga ua latou solia; a o lenei, i le va’aia o lo latou agasala ma lo latou mana’omia o le fa’amagaloga, sa aumaia ai iā i latou le lagona o lo latou mana’omia o le Fa’aola na fa’aalia mai i le feagaiga fa’a-Aperaamo ma o se ata lafoia mai i faiga o osigātaulaga. O lenei, o le fa’atuatua ma le alofa na noatia ai i latou i le Atua o lo latou lavea’i mai le pologa o le agasala. A o lenei ua saunia i latou e talisapaia fa’amanuiaga o le feagaiga fou.”—*Patriarchs and Prophets*, pp. 371, 372.

- e. **O a tu’utu’uga o lenei feagaiga? Teuteronomie 27:26; Esekielu 20:11; Levitiko 18:5.**

- 
- i. **E pei o lo tatou tulaga fa’alēnatura, o le ā se mea sa lē mafai ona latou malamalama i ai? Ieremia 17:9; Isaia 1:5, 6; 64:6.**

---

“ ‘Tou te lē mafafai ea ona auauna iā Ieova,’ o le tala lea a Iosua: ‘auā o Ia o le Atua paia; . . . O le a ia lē fa’amagaloina a outou solitulafono po o a outou agasala.’ A o le’i i ai se toe fuata’iga tumau e tatau ona ta’ita’iina tagata ina ia lagona lo latou lē atoatoa i iā i latou lava e tu’uina atu le usiusita’i i le Atua. Na latou solia Lana tulafono, na ta’usalaina ai i latou o ni tagata solitulafono, ma leai se auala e sosola ese ai. E ui ina latou fa’alagolago i lo latou lava malosi ma le amiotonu, ae sa lē mafai ona latou maua le fa’amagaloga mo ā latou agasala; sa lē mafai ona latou ausia ia ta’utinoga po’o mana’oga o le tulafono atoatoa a le Atua, ma sa lē aoga lo latou ta’utino atu o i latou e auauna atu i le Atua. E na o le fa’atuatua lava iā Keriso e mafai ai ona latou maua le fa’amagaloga o agasala ma maua ai le malosi e usiusita’i ai i le tulafono a le Atua. E tatau ona tu’u lo latou fa’alagolago i ā latou lava taumafaiga mo le fa’aolataga, e tatau ona latou fa’alagolago atoatoa i galuega lelei ma le manuia a le Fa’aola na folafolaina, pe afai e talia i latou e le Atua.”—*Ibid.*, p. 524.

### 3. TALIAINA O LE FEAGAIGA

- a. **Ina ua uma ona faitau e Mose le tulafono ma ona tu'utu'uga uma o fetu'u ma fa'amanuiaga, na fa'apefea ona tali atu pea Isaraelu? Esoto 24:7.**
- 
- 

“O mafaufau o tagata, ua fa'atauasoia ma fa'alumaina e le nofo pologa, e le'i saunia e talisapaia atoatoa mataupu silisili o mataupu fa'avae e sefulu a le Atua. Ina ia mafai ona malamalama atoatoa ma fa'amalosia ia matāfaioi o le tulafono, na tu'uina atu ai mataupu fa'aopoopo, e fa'amatala ma fa'aaogāina ai mataupu o poloāiga e sefulu. E lē pei o le tulafono, o nei mea na tu'uina atu fa'alilolilo iā Mose, o lē o le a feso'ota'i atu i tagata.”—*Fundamentals of Christian Education*, p. 506.

“Na tusia e Mose, e lē o poloa'iga e sefulu, ae o fa'amasinoga e finagalo le Atua latou te tausia, ma folafolaga i se tu'utu'uga ina ia latou usiusita'i iā te Ia. Sa ia faitauina atu nei mea i tagata, ma sa latou ta'utino mai latou te usiusita'i i afioga uma na fetalai mai ai le Alii. Ona tusia lea e Mose la latou tautōga fa'amaoni i le tusi, ma avatu ai le taulaga i le Atua mo le nuu. 'Ona tago lea o ia i le tusi o le feagaiga, ma faitau i luma o le nu'u; ona latou fai mai lea, O mea uma ua fetalai mai ai le Alii o le a matou faia, ma usiusita'i i ai. Ona ave lea e Mose o le toto ma sausau i luga o le nuu, ma fa'apea atu: Fa'auta i le toto o le feagaiga na outou osia ma Ieova i nei upu uma.' Na toe fai atu e le nuu la latou tautōga fa'amaoni iā Ieova o le a latou faia mea uma na Ia fetalai mai ai, ma usiusita'i i ai.”—*The Spirit of Prophecy*, vol. 1, p. 240.

- e. **O le ā le mea na vave ona faia e fa'aalia ai le mātuiā o lenā māliega? Esoto 24:6, 8.**
- 
- 

“O lea na talia ai e tagata la latou ta'utinoga fa'amaoni i le Alii e faia mea uma na Ia fetalai mai ai, ma usiusita'i i ai.”—*The Signs of the Times*, May 6, 1880.

“O iinei na maua ai e tagata tu'utu'uga o le feagaiga. Sa latou osia se feagaiga paia ma le Atua, e fa'atusa i le feagaiga na osia i le va o le Atua ma tagata talitonu uma iā Iesu Keriso. Sa tu'u atu ma le manino tu'utu'uga uma ia i luma o tagata. E le'i tu'ua i latou e lē malamalama iā i latou. Ina ua talosagaina i latou e filifili pe latou te mālilie i tu'utu'uga uma na tu'uina atu, sa latou mālilie fa'atasi e usiusita'i i matāfaioi uma. Ua uma ona latou mālilie e usiusita'i i poloa'iga a le Atua. O mataupu fa'avae o le tulafono ua patino nei, ina ia latou iloa ai le tele o mea na aofia ai i le osigāfeagaiga e usita'i ai i le tulafono; ma sa latou taliaina au'iliiliga patino o le tulafono.”—*Manuscript Releases*, vol. 1, p. 114.

#### 4. O SE TUPULAGA UA LEILOA

- a. **O le ā le mea na tupu i le to’atele o le nuu o Isaraelu ona sa latou le’i malamalama i lo latou lē mafai ona fa’asaoina i latou lava ma tausia atoatoa le tulafono e aunoa ma le fesoasoani fa’alelagi? Numera 26:63–65.**

“O mea uma lava e mafai e i tatou lava ona faia ua fa’aleagaina e le agasala.”—*Christ’s Object Lessons, p. 311.*

“Sa fa’alogo Nikotemo i le tala’iga a Ioane le Papatiso e uiga i le salamō ma le papatisoga, ma fa’asino atu tagata i Lē e tatau ona papatisoina i le Agaga Paia. O ia lava na lagonaina e leai se tulaga fa’alēagaga i totonu o tagata Iutaia, ma i se tulaga maoa’e, sa pulea ai i latou e le fa’ailoga tagata ma le mana’o fa’alelalolagi. Sa ia fa’amoemoe mo se tulaga lelei o mea i le afio mai o le Mesia. Peita’i ua lē mafai e le savali saili o le loto o le Papatisoga ona galue i totonu iā te ia ona o taunu’uga o le agasala. O ia o se Faresaio fa’amaoni, ma sa fa’amaualuga o ia lava i ana galuega lelei. Sa fa’aalologia tele o ia ona o lona agalelei ma lona matamau i le lagolagoina o le auaunaga i le malumalu, ma sa ia lagonaina le saogalemū o le finagalo malie o le Atua. Sa fa’ate’ia o ia i le manatu o se malo e mamā tele mo ia e va’ai i ai i lona tulaga o i ai nei.”—*The Desire of Ages, p. 171.*

- e. **O se fa’afitāuli ea i le Atua po o tagata lenei feagaiga “tuai”? Eperu 8:8.**

“ ‘O se Kerisiano moni!’ O lenei manatu tau fa’asesē ua ave ai le to’atele e pei o se ofu o le fa’afia-amiotonu, ma ua ta’ita’iina atu ai le to’atele i se fa’amoemoe iā Keriso, o lē sa leai se malamalama masani e uiga iā te Ia, e uiga i Ona a’afiaga, o Ona tofotofoga, o Lona soifua’aga o le fa’afitia e le tagata o ia lava ma le ositaulaga o le tagata lava ia. O lo latou amiotonu ua latou fa’amoemoe tele i ai ua na o ni ‘ie palapalā. Ua fetalai mai Keriso, le A’oa’o pele: ‘Ai sē fia mulimuli mai ia te A’u, aua ne’i fa’afiti o ia iā te ia, a ia ave lona satauro, i le mulimuli mai ai iā te A’u.’ Ioe, mulimuli ia te Ia i le leaga fa’apea foi i ripoti lelei. Mulimuli iā te Ia i le fa’auo atu i ē sili ona lē tagolima ma leai ni uo.”—*Testimonies for the Church, vol. 2, pp. 177, 178.*

“O le ā le mea ua tupu ai le malaia, o le lē lavalavā o i latou o ē ua manatu ua mau’oa ma fa’ateleina i oloa?—O le mana’o lea i le amiotonu a Keriso. I lo latou lava amiotonu ua fa’atusaina ai i latou ua fa’aofuina i ie palapalā, peita’i o lenei tulaga ua latou fa’avi’ivi’i ai ia i latou lava ona ua fa’aofuina i latou i le amiotonu a Keriso. Fa’amata e lē o se tau fa’asesē sili lenei? E pei ona fa’ailoa mai e le perofeta, atonu latou te alalaga, ‘O le malumalu o Ieova, o le malumalu o Ieova i matou’ (taga’i Ieremia 7:4), a o fa’atumulia o latou loto i femalaga’iga lē paia ma fefa’ataua’iga amiolētonu.”—*This Day With God, p. 228.*

## 5. MANA'OMIA SE ISI FEAGAIGA

- a. **Ona o le feagaiga tuai ua matuā leai lava se fa'amoemoe, o le ā le folafolaga e tasi e mafai ona tu'uina atu ai le fa'amoemoe iā i latou o lo'o soifua i le vaitaimi o le Feagaiga Tuai? Ieremia 31:31–33.**

“E ala i le fa'atuatua iā Keriso e mafai ai ona maua le usiusita'i i mataupu fa'avae uma o le tulafono.

“O le agaga o le nofo pologa e fa'atupuina e ala i le saili e ola e tusa ai ma tapua'iga fa'aletulafono, e ala i le taumafai e fa'ataunu'u ia ta'utinoga ai le tulafono i lo tatou lava malosi. E na o le pau le taimi e i ai le fa'amoemoe mo i tatou, pe a tatou o mai i lalo o le feagaiga fa'a-Aperaamo, o le feagaiga lea o le alofa tunoa e ala i le fa'atuatua iā Keriso Iesu. O le talalelei na folafolaina atu iā Aperaamo, lea na ia fa'amoemoe i ai, o le talalelei lava lea e tasi o lo'o folafola mai iā i tatou i aso nei, lea ua tatou maua ai le fa'amoemoe. Na va'ava'ai atu Aperaamo iā Iesu, o Ia fo'i o le Tusitala ma le Fa'ai'uina o lo tatou fa'atuatua.”—*The SDA Bible Commentary [E. G. White comments], vol. 6, p. 1077.*

- e. **Ta'u mai nisi o toa i Tusitusiga Paia o ē na taliaina nei folafolaga o le fesoasoani fa'alelagi. Eperu 11:4–32.**

“Mai i lea tupulaga i lea tupulaga, o toa o le fa'atuatua ua fa'ailogaina i lo latou fa'amaoni i le Atua, ma ua aumaia fa'aaliali i latou i luma o le lalolagi ina ia mafai ona susulu atu lo latou malamalama i ē o i le pouliuli. O Tanielu ma ana uo e to'atolu o ni fa'aa'oa'oga mata'ina o le loto toa fa'a-Kerisiano. . . . Mai mea na tutupu iā i latou i le lotoā o Papelonia, tatou te a'oa'oina mai ai le mea o le a faia e le Atua mo i latou o ē auaua iā te Ia ma le loto atoa.”—*My Life Today, p. 68.*

## FESILI TOE FA'AMANATU

1. **Fa'apefea ona tatou mulimuli i le a'afiaga lava lea e tasi o tagata Eperu i le lē mafai ona malamalama i le uiga moni o le tulafono paia tau i le amio?**
2. **Aiseā na latou vave ulu atu ai i folafolaga e lē mafai ona latou tausia?**
3. **Fa'apefea ona faigofie ona ta'ita'ina i tatou i le faia o folafolaga fa'apenā i le Atua i aso nei?**
4. **O le ā le mea na fa'aauau pea ona tupu i taimi totoe o le talafa'asolopito o Israelu?**
5. **O ā ni fa'aa'oa'oga o iā i tatou, e fa'aalia ai o le fa'aseseina fa'ale-malō e lē o se 'alofaga lea mo lo tatou fa'atuatua māluelue?**

## O mai ia, Inā tatou Filifili ia

**MAU AUTŪ:** “O lo’o fa’apea ona fetalai mai Ieova, O mai ia, inā tatou filifili ia, e ui lava ina pei o ofu mūmū a outou agasala, e sinasina ia e pei o le kiona; e ui lava ina mūmū e pei o le ie ulaula, e avea e pei o fulufulu mamoe” (Isaia 1:18).

“O le tulafono a le Atua o le fa’avae lea o le feagaiga (fou) lenei, lea na avea o se fa’atulagana i le toe aumaia lea o le tagata ina ia ōgatūsa ma le finagalo paia o le Atua, ma tu’uina atu i latou i le auala e mafai ona latou usiusita’i ai i le tulafono a le Atua.”  
—*Patriarchs and Prophets*, p. 371.

**Faitauga Fautuaina:** *Thoughts From the Mount of Blessing*, pp. 45-77.

*Ulua’i Aso*

*Mati 19*

### 1. FEAGAIGA E LUA

a. Ina ia ta’uamionuina ai i luma o le Atua, o le ā le ituaiga maliliēga e tatau ona tatou faia? Salamo 50:5.

---

e. Ina ia faia se maliliēga fa’apenā, o le ā le uiga e tatau lava ona iā i tatou? Isaia 1:18.

---

i. O ā tu’utu’uga po’o ituaiga feagaiga ua tu’uina mai iā i tatou? Eperu 8:6-13.

---

“O tu’utu’uga o le ‘feagaiga tuai’ o le, Usiusita’i ma ola ai: ‘O mea ia a faia e le tagata, e ola ai lava ia’ (Esekielu 20:11; Levitiko 18:5); peita’i, ‘ia malaia lē na te lē fa’atumauina upu uma o lenei tulafono ia faia.’ Teuteronomie 27:26. A’o le ‘feagaiga fou’ na fa’avaeina i luga o ‘folafolaga e sili ona lelei’—o le folafolaga lea o le fa’amagaloga o agasala ae fa’apea foi ma le alofa tunoa o le Atua e fa’afouina ai le loto ma aumaia ai le tagata ia ōgatūsa ma mataupu fa’avae o le tulafono a le Atua. ‘O lenei le feagaiga Ou te osia ma le aiga o Isaraelu, pe a mavae atu ia aso, o lo’o fetalai mai ai Ieova, Ou te tu’uina la’u tulafono i totonu iā te i latou, ma Ou tusi ai i o latou loto . . . . Ou te fa’amagalalo i a latou amio leaga, Ou te lē toe manatua foi a latou agasala.’ Ieremia 31:33, 34.”—*Patriarchs and Prophets*, p. 372.

## 2. AISEĀ E TĀUA /TATAU ONA FAIA SE FEAGAIGA?

- a. **O le ā le mea e vavaeeseina i tatou mai le mafutaga ma lo tatou Foafua? Isaia 59:2. O le ā se mea e tatau iā i tatou ona fai? Kenese 2:17; Roma 6:23.**
- 
- 

“O le taimi lava na gaua’i atu ai Atamu i fa’aosoosoga a Satani, ma ia faia ai le mea tonu lava lea na fetalai mai ai le Atua e lē tatau ona ia faia; o le taimi foi lenā na tū ai Keriso, le Alo o le Atua, na tū i le va o ē ola ma ē ua oti, ua fetalai mai: ‘Ia pa’ū mai le fa’asalaga i O’u luga.’ O le ā Ou tū i le tulaga o le tagata. Ia tu’u atu iā te ia se isi avanoa. Auā o le solitulafono na tu’uina ai i lalo le lalolagi atoa i lalo o le fa’asalaga o le oti. Peita’i na fa’alogoina le si’ufofoga mai le lagi ua fa’apea mai, ‘Ua Ou maua se togiola.’ O lē na lē iloa le agasala, na faia lea e ia ma agasala mo le tagata pa’ū. ‘Auā ua fa’apea lava ona alofa mai o le Atua i le lalolagi, ua Ia auina mai ai Lona Atali’i pele e to’atasi, ina ia lē fano se tasi e fa’atuatua iā te Ia, a ‘ia maua e ia le ola e fa’avavau.’ Na tō’ese e Keriso Lona ofu fa’atupu ma Lona paleali’i, ma tu’ua ai e Ia Lana pule uma i le lagi. Na Ia fa’aofuina Lona itu Atua i le tino tagata, ina ia mafai ai ona Ia tauaveina tigā uma ma onosa’ia tofotofoga uma fa’alētagata. O Ia o se Tagata fa’anoanoa, ua masani foi ma le tigā. Ua manu’a o Ia ona o ā tatou solitulafono, na momomo o Ia ona o ā tatou amio leaga; O le a’oa’iga e filemu ai i tatou sa i Ona luga lea, o Ona fa’alavalava foi ua malōlō ai i tatou. Ua avea o Ia ma tagata mativa ona o i tatou, ina ia avea i tatou ma tagata mau’oa i Lona mativa. Na tu’ua e Ia le ifoga a agelu iā te Ia ona o i tatou e ala i upu leaga ma tauemuga a se motu o tagata ua liliu’eseina e faitaulaga ma ta’ita’i o a’oa’o tulafono.”—*The Signs of the Times, June 27, 1900.*

- e. **O le ā le sauniuniga na faia e le Atua mai le amataga ina ia taofia ai lenei fa’asalaga oti? Iopu 33:24; fa’atusatusa i le 1 Ioane 4:19; Fa’aaliga 13:8.**
- 
- 

“O le fuafuaga o lo tatou fa’aolataga e lē o se mea na mafaufauina, o se fuafuaga na faia ina ua mavae le pa’ū o Atamu. O se fa’aaliga lea ‘o le mea lilo sa nātia talu mai tausaga o le vavau.’ Roma 16:25, R.V. O le tatalaina lea o matāupu fa’avae o le nofoali’i o le Atua talu mai augātupulaga o le vavau. Na silafia lava e le Atua ma Keriso talu mai le amataga o le pa’ū ma le liliuese o Satani, ma le pa’ū o le tagata e ala i le malosia o le fili taufa’asesē. E le’i taofia e le Atua lenā agasala ina ia i ai pea, auā na Ia mua’i silafia lava le i ai o le agasala, o le mea lea na Ia faia ai se fuafuaga e fa’afetaia’i ai le malosia ma le mata’utia o lona a’afiaga. O le tele o Lona alofa i le lalolagi, na Ia osia ai le feagaiga e ala i le foa’iina mai o Lona Alo e to’atasi, ‘ina ia lē fano se tasi e fa’atuatua iā te Ia, a ‘ia maua e ia le ola e fa’avavau.’ Ioane 3:18.”—*The Desire of Ages, p. 22.*

### 3. O LE FANAU A LE FAFINE

- a. **Ina ua fa’asesēina o tatou ulua’i matua i Etena e lenā Gata tuai, o le Ti’apolo lea, o le ā le folafolaga na faia e le Atua ua aumaia ai le fa’amoemoe i le aigatagata? Kenese 3:15.**

“E lē mafai ona fa’asa’oina o tatou uiga masani po’o o tatou natura fa’alētagata, se’ivaganā ua fa’asa’oina e le Agaga Paia o le Atua, auā ua i totonu iā i latou le fatu o le uiga-oti. Se’ivaganā ua tatou feso’ota’i vavalalata ma le Atua, o le ā lē mafai ona tatou tete’e atu i a’afiaga lē paia o le alofa fa’apito, o tu’inauga o le tagata lava ia, ma fa’aosoosoga o le agasala.”—*Testimonies for the Church, vol. 8, pp. 315, 316.*

- e. **O ai le fanau a le fafine? Kenese 22:18; Kalatia 3:8, 16; Eperu 2:14.**

“Talu ai ona ua folafolaina mai le ulua’i lauga o le talalelei, ina ua folafola mai i Etena o le a tu’imomoina e le fanau a le fafine le ulu o le gata, ona si’itia ai lea o Keriso o Ia o le ala, ma le upu moni, ma le ola. O Ia o le ala na ola ai Atamu, ina ua ofoina atu e Apelu i le Atua le toto o le tama’i mamoe na fasia, o le fa’atusa lea o le toto o le Fa’aola. O Keriso o le ala lea na lavea’iina ai le au pateriaka ma au perofeta. O Ia o le auala e mafai ona tatou ō atu ai i le Atua.”—*The Desire of Ages, p. 663.*

- i. **Talu ai e le’i fa’alagolago Aperamo i se isi a ua na’o Keriso lava mo le fa’amagaloina o agasala (Kalatia 3:8, 16), o le ā la le taunu’uga o lenā ituaiga fa’atuatua? Kenese 26:5.**

“O le maliu o Keriso i luga o le satauro, ua fa’amautinoa ai le fa’aumatiaga o lē ua i ai le pule a le oti, o lē na amataina le agasala. Pe a fa’aumatia Satani, o le a leai se tasi e toe fa’aoso’osoina i le leaga, o le a lē toe i ai se togiola e mana’omia, ma o le a leai foi se lamatiaga o se isi fouvalēga i le univesa a le Atua. E na’o Ia lava e mafai ona taofia mai ai le agasala mai lenei lalolagi pogisa, e taofia mai ai foi le agasala i le lagi. O le a iloa e le au paia ma agelu le tāua o le maliu ai o Keriso. E lē mafai e le tagata pa’ū ona maua sona aiga i le parataiso a le Atua e aunoa ma le Tama’i Mamoe na fasia a’o le’i fa’avaeina le lalolagi. E lē tataua ea ona tatou si’itia i luga le satauro o Keriso? Ua tu’uina atu e agelu le mamalu ma le vi’iga iā Keriso, auā e o’o lava iā i latou e le’i mautū vaganā ai le va’ava’ai atu i puapuagā o le Alo o le Atua. O le fuafuaga na faia i luga o le satauro na puipuia mai ai agelu o le lagi mai i le fa’asesēina. Ana lē seanoa le satauro, e lē maua le saogalemū mai i le leaga, e pei o agelu a’o le’i pa’ū Satani. O le ato’atoāga o le ‘au agelu na fa’alētonu i le lagi. O le ato’atoāga o le tagata na fa’alētonu i Etena, o le parataiso o le fiafia. O i latou uma o ē naunau i le saogalemu i le lalolagi po’o le lagi foi, e tataua ona latou va’ava’ai atu i le Tama’i Mamoe a le Atua.”—*The SDA Bible Commentary [E. G White Comments], vol. 5, p. 1132.*

#### 4. FA'AMAONIGA O LE FEAGAIGA

- a. **E ui lava o lenei feagaiga na osia ma Atamu ma fa'afouina mai iā Aperaaamo, ae o anafea na mafai ona fa'amaonia ai—ma na fa'apefea ona ta'ua ai o le feagaiga fou po'o le feagaiga lona lua? Eperu 9:16.**

---

“E ui lava ina ōsia lenei feagaiga ma Atamu ma toe fa'afou mai iā Aperaaamo, e le'i mafai ona fa'amaonia se'ivaganā ua o'o atu i le maliu ai o Keriso. Sa i ai lava e ala i le folafolaga a le Atua talu ona tu'uina mai le ulua'i fa'aaliga o le togiola; ma talia ai e ala i le fa'atuatua; ina ua fa'amaonia e ala iā Keriso, ona ta'ua ai lea o le feagaiga fou.”—*Patriarchs and Prophets*, pp. 370, 371.

- e. **Afai e le'i fa'amaonia lenei feagaiga se'ivaganā ua o'o atu i le maliu o Iesu, na fa'apefea ona ta'ua i latou o fanau a le Tupu fa'alelagi a'o lumana'i le maliu ai o Iesu i le satauro? Eperu 6:13-18.**

---

“O le feagaiga fa'a—Aperaaamo na fa'amaonia i le toto o Keriso, ona ta'ua lea o le feagaiga lona 'lua' po'o le feagaiga 'fou', auā o le toto na fa'amaufa'ailogaina ai ina ua fa'amaligiina le toto o le feagaiga na muamua ma o le aogā o le feagaiga fou i ona po o Aperaaamo, na fa'amaonia mai lea i le mea moni i le folafolaga ma le tautōga na faia e le Atua—'auā o nei feagaiga e lua e lē māsua, e lē mafai foi ona pepelo ai le Atua.' Eperu 6:18.”—*Patriarchs and Prophets*, p. 371.

“Ua tautō o Ia i Lana upu. E mavae atu mauga ma ave'eseina mea maupu'epu'e, a'o Lona alofa e lē mavae lea ai Lona nu'u, e lē aveesea foi ma mavae atu le feagaiga o Lona filemu. O Lona si'ufofoga foi ua fa'apea mai, 'O Lo'u nei alofa ua Ou alofa atu ai iā te oe e fa'avavau lea' (Isaia 54:8). O se alofa inā a tele o lenei alofa ma e maeu le ofoofogia o lenei alofa ina ua fa'amaualalo le Atua e aveesea ai mafua'aga uma o le masalosalo ma le lē mautonu mai le popole i vaivaiga fa'alētagata ma a'apa atu ai i le a'ao na Ia taofia atu ai i le fa'atuatua; auā e fesoasoani mai foi o Ia iā i tatou pe afai tatou te fa'alagolago atu iā te Ia ina ia fa'aopoopoina ai le tele o le mautinoāga atoa ma le puipuiga. Ua Ia faia i tatou o se feagaiga mausalī e fa'avae i luga o 'ai'aiga ma tu'utu'uga o lo tatou ususita'i, ma e afio mai foi o Ia e fetaia'i ma i tatou e tusa ma lo tatou lava malamalama ma le iloa o mea. Auā ua tatou iloa afai e faia se tautōga po'o se folafolaga ma o tatou uso a tagata, afai e fa'amauina e mana'omia lava ona i ai se fa'amaoniga. Ua fa'afetaia'i e Iesu nei popolega e tau fa'amata'u mai, ma Ia fa'amautinoaina i Ana folafolaga e ala i se tautōga e fa'apea: 'O le mea lea, ua finagalo ai le Atua e fa'ailoa atili atu ai i suli o ē ua tofia i mea na folafolaina, o Lana lava pule e lē māsua, na Ia fa'aopoopo i ai ma le tautōga . . . .' O le ā se isi mea e mafai ona faia e lo tatou Alii e fa'amalosia ai lo tatou fa'atuatua i Ana folafolaga?”—*That I May Know Him*, p. 262.



## 5. PAPA A'ANO O LE LOTO

a. E tusa ai ma le taulaga na faia e Keriso i luga o le satauro, o le ā se avanoa ua tatou maua ai? Eperu 9:15.

---

e. O le ā le olega a le Atua iā i tatou ta'ito'atasi a'o tatou su'esu'eina o tatou tiute i luma o le Atua? 2 Korinito 6:2.

---

“O le tulafono lava lea na togitogiina ma tusia i papa ma'a o le tulafono lava foi lea na tusia e le Agaga Paia i papa a'ano o le loto. Nai lo le taumafai e fa'atūina la tatou lava amiotonu, e tatou te taliaina ai le amiotonu a Keriso. O Lona toto e togiolaina a'i a tatou agasala. Auā o Lona usiusita'i ua taliaina ai i tatou. O le loto ua fa'afouina e le Agaga Paia o le fua mai ai 'fua o le Agaga'. E na'o le alofa tunoa lava o Keriso tatou te ola ai i le usiusita'i i le tulafono a le Atua lea ua tusia i o tatou loto. O le mauaina o le Agaga o Keriso, o le a tatou savavali ai foi e fa'apei ona savali o Ia. Na Ia folafola mai e uiga iā te Ia e ala mai i le perofeta, 'Lo'u Atua e, ou te fiafia lava e fai lou finagalo, o lo'o i totonu lava iā te A'u Lau tulafono.' Salamo 40:8. Ma ina ua i ai o Ia fa'atasi ma tagata, na Ia fetalai mai, 'E lē tu'ua na'o A'u e to'atasi e le Tamā; auā ou te faia pea lava o mea e fa'afiafia ai o Ia.' Ioane 8:29.

“Ua fa'ailoa manino mai e le aposetolo o Paulo le so'otaga o le fa'atuatua ma le tulafono i lalo o le feagaiga fou. Na ia fa'apea mai: 'Ua ta'uamiotonuina i tatou i le fa'atuatua, o lea ua tatou maua aia le filemu i le Atua e ala i lo tatou Alii o Iesu Keriso.' 'Pe fa'alēaogāina ea e i tatou le tulafono i le fa'atuatua? 'aua ne'i fa'apea, a ua tatou fa'atumaui ai le tulafono. 'Auā o le mea na lē mafaia e le tulafono, ina ua vaivai ona o le tino'—e le'i mafaia ona ta'uamiotonuina ai le tagata, auā o lona natura agasala ua lē mafai ai ona ia tausia le tulafono—'na auina mai ai e le Atua Lona lava Alo i le fa'atusa o le tino agasala, ma ia fa'asalaina ai le agasala i le tino; ina ia fa'ataunu'uina le amiotonu o le tulafono iā i tatou, o ē lē savavali i la le tino, a o la le Agaga.' Roma 5:1; Roma 3:31; 8:3, 4.”—*Patriarchs and Prophets*, pp. 372, 373.

## FESILI TOE FA'AMANATU

1. O ā ni molimau ua e maua e fa'atatau i le faia o le osigāfeagaiga ma le Atua?
2. Aiseā na sauni ai le Atua ina ua agasala Atamu?
3. O ā talafa'afa'atusa na fa'aaogā e le Atua e manatua ai pea le afio mai o le Mesia?
4. E fa'apefea ona tatou iloa sa i ai Aperaamo i lalo o le feagaiga fou?
5. O ā ituaiga o feagaiga po'o maliliega ua e saunia e osia ma lou Foafoa?

## Mafua'aga mo le Toefuata'iga

“O Iesu na fa'aoso'osoina o Ia i mea uma pei foi o i tatou, ina ia silafia ai e Ia le auala e mafai ona fesoasoani atu ai iā i latou o le a fa'aoso'osoina. O Lona olaga o lo tatou fa'aa'oa'oga lea. Ua Ia fa'ailoa mai e ala i Lona usiusita'i le mafaia lea e le tagata ona tausia le tulafono a le Atua, ma o le solia o le tulafono, ua fa'aalia ai le lē usiusita'i i ai, ma aumaia ai le tagata i le pologa. Na fa'atumuina le finagalo o le Fa'aola i le alofa mutimutivale ma Lona alofa, Na te le'i te'enaina foi lē ua salamō moni lava, tusa lava po'o le ā le tele o lo latou solitulafono ma le ta'usalaina; ae peita'i sa mātūā ta'usalaina lava e Ia uiga uma o le pepelo. Auā e Na te silafia agasala uma a tagata, e Na te silafia lava a latou amio uma ma faitauina manatunatuga lilo i loto o tagata; ae peita'i e lē liliuese lava o Ia mai iā i latou ona o a latou amio leaga. Na te aioi mai ai i le tagata ma Ia fai finauga fa'atasi ma le tagata agasala, ae i lea taimi—o le tauaveina ai e Ia lava o vaivaiga o le tagata—Na te tu'uina ai o Ia i lalo i se tulaga e tutusa ai o Ia ma le tagata. 'O mai ia, inā tatou filifili ia, e ui lava ina pei o ofu mūmū a outou agasala, e sinasina ia e pei o le kiona; e ui lava ina mūmū ia e pei o le ie ulaula, e aveā e pei o fulufulu mamoe.’


“Ua fa'aleagaina e le tagata le fa'atusa o le Atua i totonu o lona loto e ala i se olaga leaga, ma ua lē mafai ai e ala i taumafaiga fa'alētagata ona faia se suiga po'o se liuaga tele i lona olaga. E tatau ona ia talia 'ai'aiga o le talalelei; e tatau ona fa'alelei o ia ma le Atua e ala i le usiusita'i i Lana tulafono ma le fa'atuatua iā Iesu Keriso. O le taimi lava lenā e tatau ona pulea ma ta'ita'iina ai lona olaga e ala i ni mataupu fa'avae fou. Auā o le salamō, fa'atuatua, atoa ai ma galuega lelei e mafai ai e le tagata ona fa'aato'atoaina se uiga o le amiotonu, ma fa'aalia ai, e ala i fa'ata'ita'iga ma galuega a Keriso, e ta'ua ai i latou o fanau po'o atali'i o le Atua. O mataupu fa'avae o upu moni paia, e tatau ona tatou taliaina ma fa'apelepeleina i le loto, auā e mafai ona ta'ita'iina atu ai i tatou i se tulaga maualuga o le ola fa'apaiaina lea na tatou le'i mafaufauina e mafai ona tatou ausia. . . .

“E tatau ona faia e le tagata le galuega lenei, ma va'ava'ai i le fa'aata, o le tulafono lea a le Atua, ina ia iloa ai fa'alētonu o lana amio, ma lafoa'i lana agasala, ma tā lona ofu i le toto o le Tama'i Mamoe. O le mata'uā, lotoleaga, taufa'asesē, o le misa, ma solitulafono, o le a fa'amāmāina ma fufulu'eseina mai ai le loto o lē na te mauaina le alofa o Keriso ma taula'i atu i le fa'amoemoe i le aveā lea e fa'apei o Ia. . . .

“Peita'i o le a'afiaga o le fa'amoemoe o le talalelei o le a lē ta'ita'ia atu ai le tagata agasala e va'ava'ai atu i le fa'aolataga peisea'i o se mataupu o le alofa tunoa foa'ifua i tagata o lo'o fa'aauau pea ona ola i le soliga o le tulafono a le Atua. A'o susulu mai le malamalama o le upu moni i lona mafaufau ma fa'amalamalamaina atoatoa ai o ia i le mana'oga o le Atua ma ia iloa ai le tele o ana solitulafono, o le a ia toe fuata'ina loa ona ala, ma fa'amaoni ai i le Atua e ala i le malosia na maua mai i Lona Fa'aola, ma ta'ita'ina atu ai o ia i se olaga fou ma le mamā.”—*Testimonies for the Church, vol. pp. 294, 295.*

**Mo Manatu Fa'a'opo'opo**

# Taulaga o Ulua'i Sapati



## Ianuari 1

mo Nofoga Autū o  
A'oa'oga ma le Soifua  
Maloloina i Adygea,  
North Caucasus, Rusia  
(va'ai, itulau, 3)

## Fepuari 5

mo To'omaga  
mai Fa'alavelave  
i le Lalolagi  
(va'ai, itulau. 24)



## Mati 3

mo se Falesa i  
Pathankot, North  
Initia Union  
(va'ai, itulau. 45)